

第二冊

古今名醫驗方類編

上海大東書局印行





# 古今名醫驗方類編目錄

## 卷四 通治部

### 諸火門

- 肝火爲痛……………一
- 肺中有火……………一
- 陰火爲病……………一
- 陰虛火動……………一
- 三補丸……………一
- 中暑門
- 暑月暈死……………一
- 伏暑發熱……………一
- 中暑發昏……………一
- 中暑不省……………一
- 傷暑吐瀉……………一
- 熱暈昏沉……………一
- 熱瘴昏迷……………一
- 一切傷暑……………一

- 伏暑引飲……………二
- 中暑毒死……………二
- 熱渴心悶……………二
- 太陽中暈……………二
- 暑月解毒……………二
- 伏暑傷冷……………二
- 飲水停滯……………二
- 注夏虛病……………二
- 消暑止渴……………二
- 益元散……………三
- 桂漿湯水……………三
- 發熱門
- 驚癇發熱……………三
- 熱厥氣痛……………三
- 發熱口乾……………三
- 火黃身熱……………三
- 骨蒸發熱……………三

- 骨蒸勞熱……………四
- 虛勞發熱……………五
- 骨蒸肺痿……………五
- 骨蒸勞瘦……………五
- 骨蒸咳嗽……………五
- 虛熱作渴……………五
- 婦人骨蒸……………五
- 婦人發熱……………五
- 血虛發熱……………五
- 脾勞發熱……………五
- 飲酒發熱……………六
- 預防熱病……………六
- 上氣發熱……………六
- 沙症壯熱……………六
- 熱病蟲匿……………六
- 心病邪熱……………六
- 身體發熱……………六

急勞煩熱.....六

熱病譫狂.....六

服丹發熱.....六

碧雪.....六

仙乳丸.....六

風熱門

風熱汗出.....七

風熱癰瘰.....七

風熱心躁.....七

老人風熱.....七

體如蟲行.....七

熱病生蠱.....七

風熱驚狂.....七

風熱毒氣.....七

發斑熱病.....七

發斑怪病.....七

三焦積熱.....七

中焦熱痞.....七

心經實熱.....七

骨節積熱.....八

三消骨蒸.....八

五心煩熱.....八

膚熱如燎.....八

風熱上衝.....八

時氣餘熱.....八

心痛解熱.....八

天行熱狂.....八

虛火背熱.....八

大風熱疾.....八

熱氣結滯.....八

熱病食復.....九

熱病勞復.....九

肺勞風熱.....九

胃虛風熱.....九

肺臟壅熱.....九

熱病發黃.....九

諸虛寒熱.....九

風熱邪病.....九

大熱狂渴.....九

熱氣濕痺.....九

消毒解熱.....九

胸中積熱.....九

酸漿實丸.....九

煩躁門

服藥過劑.....九

熱渴煩悶.....九

膈上煩悶.....九

胸膈煩悶.....九

臥寐門

睡死不寤.....九

臥忽不寤.....九

一切瞾瞶.....九

夜不合眼.....九

虛煩不寐.....九

骨蒸不眠.....九

膽虛不寐.....九

虛勞不眠.....九

振悸不眠.....九

去熱少睡.....九

晝夜不眠.....九



膽熱多眠……………一一  
 穀勞嗜臥……………一一  
 人耽睡臥……………一一  
 目澀好眠……………一一  
 膽風沉睡……………一一  
 人好寤寐……………一一  
 鬼魔不寤……………一一  
 夜臥魔死……………一一  
 夜臥禁魔……………一一  
 房勞不眠……………一一  
 睡中汗出……………一一  
 夜多惡夢……………一一  
 人夜讖語……………一一  
 令臥不起……………一一  
 多忘喜臥……………一一  
 神困多睡……………一一  
 諸汗門  
 汗後奔豚……………一一  
 心悶汗出……………一一  
 脾虛汗出……………一一

老小虛汗……………一一  
 虛瘧自汗……………一一  
 虛勞盜汗……………一一  
 身熱多汗……………一一  
 濕溫多汗……………一一  
 自汗不止……………一一  
 盜汗……………一一  
 小兒盜汗……………一一  
 夜睡盜汗……………一一  
 病後虛汗……………一一  
 虛汗無度……………一一  
 諸虛自汗……………一一  
 氣虛盜汗……………一一  
 心虛自汗……………一一  
 血虛心汗……………一一  
 皮膚血汗……………一一  
 盜汗陰汗……………一一  
 盜汗自汗……………一一  
 虛汗盜汗……………一一  
 卒汗不止……………一四

盜汗遺精……………一四  
 出汗不滴……………一四  
 食即出汗……………一四  
 諸病汗法……………一四  
 消渴門  
 消渴引飲……………一四  
 消渴煩悶……………一七  
 遠行止渴……………一七  
 膈消飲水……………一七  
 消渴不止……………一七  
 口中乾燥……………一七  
 乳石發渴……………一七  
 消渴尿多……………一八  
 消渴煩躁……………一八  
 腎虛消渴……………一八  
 消渴便閉……………一八  
 下虛消渴……………一八  
 胃虛消渴……………一八  
 胃熱消渴……………一八  
 強中消渴……………一八

積熱消渴	一九
消渴羸瘦	一九
消渴有蟲	一九
消渴骨蒸	一九
老人消渴	一九
消渴便水	一九
虛勞苦渴	一九
消渴急方	一九
消渴補虛	一九
三消渴病	一九
除煩止渴	一九
三黃丸	一九
生津丸	二〇
聖惠水蛇丸	二〇
忍冬圓	二〇

古今名醫驗方類編卷四

通治部

諸火門

●肝火為痛

【丹溪方】黃連薑汁炒為末粥糊丸梧子大每服

三十九丸白湯下 左金丸用黃連六兩茱萸一

兩同炒為末神麩糊丸梧子大每服三四十丸

白湯下

●肺中有火

【丹溪纂要】清金丸用片芩炒為末水丸梧子大

每白湯下三十九丸

●陰火為病

【丹溪方】大補丸用黃蘗去皮鹽酒炒褐為末水丸梧子大血虛四物湯下氣虛四君子湯下

●陰虛火動

【肘后方】有痰不堪用燥劑者天門冬一斤水浸

洗去心取肉十二兩石臼搗爛五味子水洗去

核取肉四兩曬乾不見火共搗丸梧子大每服

二十九茶下日三服

●三補丸

【丹溪纂要】治上焦積熱瀉五臟火黃芩黃連黃

蘗等分為末蒸餅丸梧子大每白湯下三十三

丸



中暑門

●暑月喝死

【主治時珍方】中喝卒死者取地漿一升飲之甚

妙

【千金方】以熱湯徐徐灌之少舉其頭令湯入腹

即甦

【主治藏器方】以土積心口少冷即易氣通則甦

時珍亦可以熱土圍臍旁令人尿臍中仍用熱

土大蒜等分搗水去渣灌之即活

【千金方】屋上兩畔瓦熱熨心頭冷即易之

【外臺方】濃煮蓼汁一盞服

【千金方】中喝卒死井水和麵一大抄服之

●伏暑發熱

【和劑局方】作渴嘔惡及赤白痢消渴腸風酒毒

泄瀉諸病並宜酒煮黃龍丸主之黃連一斤切

以好酒二升半煮乾焙研糊丸梧子大每服五

十九熟水下日三服

●中暑發昏

【壽域方】小青葉井水浸去泥控乾入沙糖搗汁

急灌之

●中暑不省

【濟寮方】皂莢一兩燒存性甘草一兩微炒為末

溫水調一錢灌之

●傷暑吐瀉

【救急良方】硫黃滑石等分為末每服一錢米飲

下即止

【禹講師經驗方】滑石炒二兩藿香二錢半丁香

五分爲末每服一二錢浙米泔調服

【本草方】陳倉米二升麥芽四兩黃連四兩切同蒸熟焙研爲末水丸梧子大每服百丸白湯送

下

●熱暈昏沉

【本草方】地黃汁一盞服之

【本草方】中暈昏悶夏月人在途中熱死急移陰處就搗道上熱土擁臍上作窩令人溺滿暖氣透臍卽甦乃服地漿蒜水等藥 林億云此法出自張仲景其意殊絕非常情所能及本草所能關實救急之大術也蓋臍乃命蒂暑暈傷氣溫臍所以接其元氣之意

●熱瘴昏迷

【普濟方】煩悶飲水不止至危者一服見效生地

黃根生薄荷葉等分搗爛取自然汁入麝香少許并華水調服覺心下頓涼勿再服

●一切傷暑

【和劑局方】香薷飲治暑月臥溼當服或生冷不節真邪相干便致吐利或發熱頭痛體痛或心腹痛或轉筋或乾嘔或四肢逆冷或煩悶欲死並主之用香薷一斤厚朴薑汁炙白扁豆微炒各半斤剉散每服五錢水二盞酒半盞煎一盞水中沉冷連進二服立效 活人書去扁豆入黃連四兩薑汁同炒黃色用

●伏暑引飲

【和劑局方】脾胃不利消暑丸用半夏醋煮一斤茯苓半斤生甘草半斤爲末薑汁麵糊丸梧子大每服五十九熱湯下

●中暑毒死

【經驗後方】救生散用新胡麻一升微炒令黑攤

冷為末新汲水調服三錢或丸彈子大水下

【發明】時珍曰葉石林避暑錄云一僕暑月馳馬

忽撲地欲絕同食王相教用大蒜及道上熱土

各一握研爛以新汲水一盞和取汁決齒灌之

少頃即甦相傳徐州市門忽有版書此方咸以

為神仙救人云

●熱渴心悶

【聖濟總錄】溫水一盞調麵一兩飲之

【千金方】槐子燒末酒服方寸匕

●太陽中暈

【金匱要略】身熱頭痛而脈微弱此夏月傷冷水

水行皮中所致瓜蒂二七個水一升煮五合頓

服取吐即愈

●暑月解毒

【和劑方】桂苓丸用肉桂去粗皮不見火茯苓去

皮等分為細末煉密丸龍根大新汲水化服一

丸

●伏暑傷冷

【濟生方】二氣交錯中脘痞結或泄或吐或霍亂

厥逆二氣丹硫黃硝石等分研末石器炒成砂

再研糯米糊丸梧子大每服四十九丸新井水

下

●飲水停滯

【肘后方】大熱行極及食熱餅後飲冷水過多不

消停滯在胸不利呼吸喘息杜衡三分瓜蒂二

分人參一分為末湯服一錢日服二次取吐為



度

●注夏虛病

【攝生方】枸杞子五味子研細滾水泡封三日代

茶飲效

●消暑止渴

【事林廣記】百藥煎蠟茶等分爲末烏梅肉搗丸

和丸芡子大每含一九名水瓢丸

●益元散

【劉河間傷寒直格】又名天水散太白散六一散

解中暑傷寒疫癘饑飽勞損憂愁思慮驚恐悲

怒傳染並汗後遺熱勞復諸疾兼解兩感傷寒

百藥酒食邪熱治五勞七傷一切虛損內傷陰

痿驚悸健忘癩癧煩滿短氣痰嗽肌肉疼痛腹

脹悶痛淋悶瀉痛服石石淋療身熱嘔吐泄瀉

腸澼下痢赤白除煩熱胸中積聚寒熱止渴消  
蓄水婦人產後損液血虛陰虛熱甚催生下乳

治吹乳乳癰才瘡齒疳此藥大養脾胃之氣通

九竅六府去留結益精氣壯筋骨和氣通經脈

消水穀保真元明耳目安魂定魄強志輕身駐

顏益壽耐勞役飢渴乃神驗之仙藥也白滑石

水飛過六兩粉甘草一兩爲末每服三錢蜜少

許溫水調下實熱用新汲水下解利葱豉湯下

通乳用猪肉麵湯調下催生用香油漿下凡難

產或死胎不下皆由風熱燥瀼結滯緊斂不能

舒緩故也此藥力至則結滯頓開而瘥矣

●桂漿渴水

【圖經本草】夏月飲之解煩渴益氣消痰桂末一

大兩白蜜一升以水三斗先煎取一斗入新瓷

瓶中乃下二物打二三百轉先以油紙一種覆  
上加二重封之每日去紙一重七日開之氣香  
味美格韻絕高今人多作之

### 發熱門

●驚癩發熱

【聖惠方】鐵粉水調少許服之

●熱厥氣痛

【集簡方】元明粉三錢熱童尿調下

●發熱口乾

【外臺祕要】小便瀼用萎蕤五兩煎汁飲之

【外臺祕要】小便赤瀼取甘蔗去皮嚼汁嚥之飲

漿亦可

●火黃身熱

【三十六黃方】午後却涼身有赤點或黑點者不  
可治宜烙手足心背心百會下廉內服紫草湯  
紫草吳藍一兩木香川黃連一兩水煎服

●骨蒸發熱

【外臺祕要】雄黃末一兩入小便一升研如粉乃  
收黃理石一枚方圓一尺者炭火燒之三食頃  
濃淋汁於石上置薄氈于上患人脫衣坐之衣  
被圍住勿令洩氣三五度瘥

【千金方】芒硝末水服方寸七日二服良

【廣利方】骨節積熱漸黃瘦黃連四分切以童  
子小便五大合浸經宿微煎三四沸去滓分作

二服

【發明】元素曰牡丹乃天地之精為羣花之首葉  
為陽發生也花為陰成實也丹者赤色火也故

能瀉陰胞中之火四物湯加之治婦人骨蒸又  
曰牡丹皮入手厥陰足少陰故治無汗之骨蒸  
地骨皮入足少陰手少陽故治有汗之骨蒸神  
不足者手少陰志不足者足少陰故仲景腎氣  
丸用之治神志不足也又能治腸胃積血及吐  
血衄血必用之藥故犀角地黄湯用之 杲曰  
心虛腸胃積熱心火熾甚心氣不足者以牡丹  
皮爲君 時珍曰牡丹皮治手足少陰厥陰四  
經血分伏火蓋伏火卽陰火也陰火卽相火也  
古方惟以此治相火故仲景腎氣丸用之後人  
乃專以黃蘗治相火不知牡丹之功更勝也此  
乃千載祕奧人所不知今爲拈出赤花者利白  
花者補人亦罕悟宜分別之

【崔元亮海上方】骨蒸鬼氣童子小便五大斗澄

清青蒿五斗八九月揀帶子者最好細剉相和  
納大釜中以猛火煎取三大斗去滓漑釜令淨  
再以微火煎可二大斗入猪膽一枚同煎一大  
斗半去火待冷以瓷器盛之每欲服時取甘草  
二二三兩炙熟爲末以煎和搗千杵爲丸空腹粥  
飲下二十九漸加至三十九止

【十便良方】骨蒸煩熱青蒿一握猪膽汁一枚杏  
仁四十個去皮尖炒以童子小便一大盞煎五  
分空心溫服

【聖惠方】張文仲方用生地黃一升搗三度絞盡  
分再服若利卽減之以涼爲度

【外臺祕要】桃仁一百二十枚留尖去皮及雙仁  
杵爲丸平旦并華水頻服之令盡量飲酒至醉  
仍須任意喫水隔日一劑百日不得食肉



【濟生方】及一切虛勞煩熱大病後煩熱並用地  
仙散地骨皮二兩防兩一兩甘草炙半兩每用  
五錢生薑五片水煎服

【拾遺良方】多取諸朽骨洗淨土氣釜煮入桃柳  
枝各五斗煮枯再入棘針三斗煮減半去滓以  
酢漿水和之煮三五沸令患者正坐散髮以湯  
從頭淋之唯熱爲佳若心悶可少進冷粥當得  
大汗出惡氣汗乾乃粉身食豉粥

【孟詵必效】三歲童便五升煎取一升以蜜三匙  
和之每服二碗半日更服此後常取自己小便  
服之輕者二十日重者五十日瘥二十日後當  
有蟲如蚰蜒在身常出十步內聞病人小便臭  
者瘥也台州丹仙觀道士張病此自服神驗

●骨蒸勞熱

【發明】王燾外臺祕要治骨蒸勞熱久嗽用石膏  
文如束鍼者一斤粉甘草一兩細研如麵日以  
水調三四服言其無毒有大益乃養命上藥不  
可忽其賤而疑其寒名醫錄言睦州楊士丞女  
病骨蒸內熱外寒衆醫不瘥處州吳醫用此方  
而體遂涼愚謂此皆少壯肺胃火盛能食而病  
者言也若衰暮及氣虛血虛胃弱者恐非所宜

【外臺祕要】取人尿乾者燒令外黑納水中澄清  
每旦服一小升薄晚服童便一小升以瘥爲度  
既常服可就作坑燒屎三升夜以水三升漬之  
稍稍減服此方神妙非其人莫浪傳之

【婦人良方】又婦人勞熱心忪地黃煎用生乾地  
黃熟地黃等分爲末生薑自然汁入水相和打  
糊丸梧子大每服三十九丸用地黃湯下或酒醋

茶湯下亦可日二服覺臟腑虛冷則晨服八味丸地黃性冷壞脾陰虛則發熱地黃補陰血故也

●虛勞發熱

【本草衍義】麥門冬煎湯頻飲

【外臺】下焦虛熱骨節煩疼肌肉急小便利大便數少氣吸吸口燥熱淋用大麻仁五合研水

二升煮減半分服四五劑瘥

【千金方】枸杞根爲末白湯調服有痼疾人勿服

【澹寮方】柴胡人參等分每服三錢薑棗同水煎

服

【必效方】虛勞困乏地黃一石取汁酒三斗攪勻

煎收日服

●骨蒸肺痿

【外臺祕要】不能食者蘇遊蘆根飲主之蘆根麥

門冬地骨皮生薑各十兩橘皮茯苓各五兩水

二斗煮八升去滓分五服取汗乃瘥

【飲膳正要】煉羊脂煉羊髓各五兩煎沸下煉蜜

及生地黃汁各五合生薑汁一合不住手攪微

火熬成膏每日空心溫酒調服一匙或入粥食

●骨蒸勞瘦

【聖惠方】用鰻鱺二斤治淨酒二盞煮熟入鹽醋

食之

【張文仲備急方】勞極骨蒸亦名伏連傳尸此方

甚驗用人屎小便各一升新粟米飯五升六月

六日麴半餅以餅盛封密室中二七日並消亦

無惡氣每旦服一合午再服之神效

●骨蒸咳嗽

【奇效方】潮熱團魚丸用團魚一個柴胡前胡貝

母知母杏仁各五錢同煮待熟去骨甲裙再煮

食肉飲汁將藥焙研為末仍以骨甲裙煮汁和

丸梧子大每空心黃芪湯下三十九日二服服

盡仍須參芪藥調之

●虛熱作渴

【外臺祕要】桃膠如彈丸大含之佳

●婦人骨蒸

【活發機要】煩熱寢汗口乾引飲氣喘天門冬十

兩麥門冬八兩並去心為末以生地黄三斤取

汁熬膏和丸梧子大每服五十九以逍遙散去

甘草煎湯下

●婦人發熱

【保慶集】欲成勞病肌瘦食減經候不調地髓煎

用乾地黄一斤為末煉蜜丸梧子大每酒服五

十九

●血虛發熱

【東垣蘭室祕藏】當歸補血湯治肌熱燥熱困渴

引飲目赤面紅晝夜不息其脈洪大而虛重按

全無力此血虛之候也得於肌肉勞役證象白

虎但脈不長實為異耳若誤服白虎湯即死宜

此主之當歸身酒洗二錢綿黃芪蜜炙一兩作

一服水二鍾煎一鍾空心溫服日再服

●脾勞發熱

【刪繁方】有蟲在脾中為病令人好嘔者取東行

茱萸根大者一尺大春子八升橘皮二兩三物

咬咀以酒一斗浸一宿微火薄暖之絞去滓平

旦空腹服一升取蟲下或死或半爛或下黃汁



凡作藥時切忌言語

●飲酒發熱

【摘元方】瓜萸仁青黛等分研末薑汁蜜丸研膏

日食數匙一男子年二十病此服之而效

●預防熱病

【龐安常傷寒論】急防賊風葛粉二升生地黃一

升香鼓半升為散每食後米飲服方寸七日三

服有病五服

●上氣發熱

【肘后方】因奔趁走馬後飲冷水所致者竹葉三

斤橘皮三兩水一斗煎五升細服三日一劑

●沙症壯熱

【活人書】江南有沙症狀如傷寒頭痛壯熱嘔惡

手足指末微厥或腹痛悶亂須臾殺人先用蠶

蛻紙剪細安於瓷器中以碟蓋之滾湯沃之封固良久乘熱服暖臥取汗

●熱病蟲匿

【梅師方】上下用猪膽一枚醋一合煎沸服蟲立

死也

●心病邪熱

【奇效方】葦珠丸用猪心血一個淀花末一匙硃

砂末一兩同研丸梧子大每酒服二十九

●身體發熱

【普濟方】不拘大人小兒用鷄卵三枚白蜜一合

和服立瘥

●急勞煩熱

【發明】時珍曰秦芫手足陽明經藥也兼入肝膽

故手足不遂黃疸煩渴之病需之取其去陽明

之濕熱也陽明有濕則身體酸疼煩熱有熱則

日晡潮熱骨蒸所以聖惠方治急勞煩熱身體

酸疼用秦艽柴胡一兩甘草五錢為末每服三

錢白湯調下治小兒骨蒸潮熱減食瘦弱用秦

艽炙甘草各一兩每用一二錢水煎服之錢乙

加薄荷葉五錢

●熱病譫狂

【斗門方】奔走似癲如見鬼神久不得汗及不知

人事者以人中黃入大礮內以泥固濟煨半日

去火毒研末新汲水服三錢未退再服

●服丹發熱

【王清明餘話方】有人伏火丹藥多腦後生瘡熱

氣冉冉而上一道人教灸風市數十壯而愈仍

時復作又教以陰煉秋石用大豆黃卷煎湯下

遂愈和其陰陽也

●碧雪

【和劑局方】治一切積熱天行時疾發狂昏憤或

咽喉腫塞口舌生瘡心中煩躁或大小便不通

胃火諸病樸硝芒硝馬牙硝硝石膏水飛寒

水石水飛各一斤以甘草一斤煎水五升入諸

藥同煎不住手攪令消溶得所入青黛一斤和

勻傾盆內經宿結成雪為末每含嚙或吹之或

水調服二三錢欲通利則熱水服一兩

●仙乳丸

【普濟方】治上焦熱晝常好瞑用伏翼五兩重一

枚連腸骨炙燥雲母炒五兩威靈仙三兩牽牛

炒莧實各二兩丹砂鉛丹各一兩膩粉半兩為

末蜜丸綠豆大每服七丸木通湯下以知為度

# 風熱門

●風熱汗出

【千金翼】水和雲母粉服三錢不過再服立愈

●風熱癰瘰

【仲景金匱方】風引湯治風熱癰瘰及驚癇瘰瘰

紫石英白石英寒水石石膏乾薑大黃龍齒牡

礪甘草滑石等分咬咀水一升煎去三分食後

溫呷無不效者

●風熱心躁

【集驗方】口乾狂言渾身壯熱寒水石半斤燒半

日淨地坑內盆合四面濕上擁起經宿取出入

甘草末天竺黃各二兩龍腦二分糯米糕丸彈

子大蜜水磨下

●老人風熱

【養老方】內熱目赤頭痛視不見物石膏三兩竹

葉五十片沙糖一兩粳米三合水三大盞煎石

膏竹葉去滓取二盞煮粥入糖食

●體如蟲行

【外臺祕要】風熱也鹽一斗水一石煎湯浴之三

四次亦療一切風氣

●熱病生蠶

【梅師方】下部有瘡熬鹽熨之不過三次

●風熱驚狂

【宣明方】神白丹治傷寒積熱及風生驚搐或如

狂病諸藥不效粉霜一兩以白麵六錢和作餅

子炙熟同研輕粉半兩鉛白霜二錢半爲末滴

水丸梧子大每服十九至十五丸米飲下

【千金方】熱病狂邪不避水火欲殺人苦參末蜜

丸梧子大每服十九薄荷湯下亦可為末二錢

水煎服

●風熱毒氣

【千金方】煎過牛乳一升生牛乳一升和勻空心

服之日三服

●發斑熱病

【南陽活人書】赤色煩痛大青四物湯用大青一

兩阿膠甘草各二錢半豉二合分三服每用水

一盞半煎一盞入膠烱化服 又犀角大青湯

用大青七錢半犀角二錢半梔子十枚豉二撮

分二服每服水一盞半煎八分溫服

●發斑怪病

【夏子益奇疾方】有人眼赤鼻張大喘渾身出斑

毛髮如銅鐵乃熱毒氣結于下焦也白礬滑石

各一兩為末作一服水三盃煎減半不住服盡

即安

●三焦積熱

【丹溪方】元參黃連大黃各一兩為末煉蜜丸梧

子大每服三四十九白湯下小兒九粟米大

●中焦熱痞

【聖惠方】善忘不禁蘆茹三分甘草炙二兩硝石

為末每服一錢鷄鳴時溫酒下以知為度

●心經實熱

【和劑局方】瀉心湯用黃連七錢水一盞半煎一

盞食遠溫熱服小兒減之

【發明】宗奭曰卮子治心經留熱小便赤澀用去

皮卮子火煨大黃連翹炙甘草等分末之水煎

三錢服無不利也

●骨節積熱

【廣利方】漸漸黃瘦黃連四分切以童子小便五

大合浸經宿微煎三四沸去滓分作二服

●三消骨蒸

【易簡方】黃連末以冬瓜自然汁浸一夜晒乾又

浸如此七次爲末以冬瓜汁和九梧子大每服

三四十九大麥湯下尋常渴只一服見效

●五心煩熱

【易簡方】胡黃連末米飲下一錢

【食醫心鏡】熱攻心煩恍惚以牛蒡根搗汁一升

食後分爲二服

●膚熱如燎

【發明】王海藏言有人因虛服附子藥多病小便

閉服芩連藥而愈此皆熱厥之病也學者其可

拘乎子年二十時因感冒欬嗽既久且犯戒遂

病骨蒸發熱膚如火燎每日吐痰盈許暑月煩

渴寢食幾廢六脈浮洪遍服柴胡麥門冬荆瀝

諸藥月餘益劇皆以爲必死矣先君偶思李東

垣治肺熱如火燎煩躁引飲而晝盛者氣分熱

也宜一味黃芩湯以瀉肺經氣分之火遂按方

用片芩一兩水二鍾煎一鍾頓服次日身熱盡

退而痰嗽皆愈藥中肯綮如鼓應桴醫中之妙

有如此哉

●風熱上衝

【張潔古保命集】頭目暈眩或胸中不利川芎槐

子各一兩爲末每服三錢用茶清調下胸中不

利以水煎服



●時氣餘熱

【聖惠方】不退煩躁發渴四肢無力不能飲食用  
牛蒡根搗汁服一小盞效

●心痛解熱

【蘇頌圖經】白藥根野豬尾二味洗去粗皮焙乾  
等分搗篩酒服一錢甚效黔人用之

●天行熱狂

【日華子本草】芭蕉根搗汁飲之

【孟詵必用方】初起一二日者麻黃一大兩去節

以水四升煮去沫取二升去滓着米一匙及豉

為稀粥先以湯浴後乃食粥厚覆取汗即愈

【聖濟錄】白藥子為末漿水一盞冷調二錢服仰

臥少頃心悶或腹鳴疴痛當吐利數行如不止

喫冷粥一盃止之

●虛火背熱

【摘元方】虛火上行背內熱如火炙者附子末津  
調塗涌泉穴

●大風熱疾

【圖經方】近效方云婆羅門僧療大風疾並熱風  
手足不遂壓丹石熱毒用硝石一兩生烏麻油

二大升同納鑊中以土塹蓋口紙泥固濟細火

煎之初煎氣腥藥熟則香氣發更以生脂麻油

二大升和合細煎之以意斟量得所即內不津

器中凡大風人用屋子坐病人外面燒火發汗

日服一大合壯者日二服三七日頭面皴瘡皆

滅也

●熱氣結滯

【必效方】經年數發者胡荽半斤五月五日采陰

乾水七升煮取一升半去滓分服未瘥更服春

夏葉秋冬根莖並可用

●熱病食復

【梅師方】及交接後發動欲死不能語卮子三十

枚水三升煎一升服令微汗

●熱病勞復

【扁鵲方】丈夫熱病後交接復發忽卵縮入腸腸

痛欲死燒女人月經赤衣爲末熱水服方寸七

卽定

●肺勞風熱

【孟詵食療】止渴去熱天門冬去皮心煮食或曝

乾爲末蜜丸服尤佳亦可洗面

●胃虛風熱

【食療本草】不能食用生薑汁半盃生地黃汁少

許蜜一匙水二合和服之

●肺臟壅熱

【聖惠方】煩悶欬嗽者新百合四兩蜜和蒸軟時

時含一片吞津

●熱病發黃

【千金翼】甜瓜蒂爲末以大豆許吹鼻中輕則半

日重則一日流取黃水乃愈

●諸虛寒熱

【王好志醫壘元戎】冷痰虛熱冷香湯用沉香附

子炮等分水一盞煎七分露一夜空心溫服

●風熱邪病

【外臺祕要】蝦蟆燒灰硃砂等分爲末每服一錢

酒服日三甚有神驗

●大熱狂渴

【寇宗奭衍義】乾陳人尿爲末于陰地淨黃土中作五六寸小坑將末三兩匙于坑中以新汲水調勻良久澄清細細與飲卽解世俗謂之地清

●熱氣濕痺

【普濟方】腹內激熱用龜肉同五味煮食之微泄爲效

●消毒解熱

【錢氏小兒方】生犀角尖磨濃汁頻飲之

●胸中積熱

【主治元素方】甘草梢生用治胸中積熱去莖中痛加酒煮元胡索苦楝子尤妙

●酸漿實丸

【聖濟總錄】治三焦腸胃伏熱婦人胎熱難產用酸漿實五兩莧實三兩馬蘭子炒大鹽榆白皮

炒二兩柴胡黃芩栝樓根蘭茹各一兩爲末煉蜜丸梧子大每服三十九丸木香湯下

煩躁門

●服藥過劑

【肘后方】煩悶東流水飲一二升

【肘后方】卒嘔不已飲新汲水一升

【千金方】悶亂者水和胡粉服之

【肘后方】煩悶及中毒煩悶欲死搗藍汁服數升

【肘后方】苦煩生葛汁飲之乾者煎汁服

【外臺方】悶亂者粳米瀋飲之

【千金方】悶亂者豉汁飲之

【千金方】悶亂者飴糖食之

【百一方】白鴨屎爲末水服二錢效

【外臺方】犀角燒末水服方寸七

●熱渴煩悶

【聖惠方】地漿一盞飲之

【食醫心鏡】葛粉四兩先以水浸粟米半升一夜

漉出拌勻煮熟以糜飲和食

●膈上煩熱

【聖惠方】多渴利九竅滑石二兩搗水三大盞煎

二盞去滓入粳米煮粥食

●胸膈煩悶

【千金方】白朮末水服方寸七

### 臥寐門

●睡死不寤

【外臺祕要】蠶實根一握杵爛以水絞汁稍稍灌

之

●臥忽不寤

【肘后方】勿以火照但痛嚙其踵及足拇趾甲際

而多睡其面以井底泥塗其目令人垂頭入井

中呼其姓名便甦也

【肘后方】勿以火照之但痛齧拇指甲際為睡其

面則活取韭搗汁吹入鼻中冬月則用韭根

【本草方】若以火照之則殺人但睡其面痛齧其

踵及大趾甲際即活以犀角為枕即令不寤

●一切鰥鮑

【普濟方】處州瓷器為末發時用二錢以手指點

津液蘸藥點舌下嚙之即效

●夜不合眼

【集簡方】難睡燈草煎湯代茶飲即得睡

【發明】甲乙經用治夜不眠是果性燥者乎岐伯

云衛氣行於陽陽氣滿不得入於陰陰氣虛故

目不得瞑治法飲以半夏湯一劑陰陽既通其

臥立至方用流水千里者八升揚之萬遍取清

五升煮之炊以葦薪大沸入秫米一升半夏五

合煮一升半飲汁一杯日三以知為度病新發

者覆杯則臥汗出則已久者三飲而已

●虛煩不寐

【千金方】大棗十四枚葱白七莖水三升煮一升

頓服

【圖經本草】深師方酸棗仁湯用酸棗仁二升擘

母乾薑茯苓芎藭各二兩甘草炙一兩以水一

斗先煮棗仁減三升乃同煮取三升分服

●骨蒸不眠

【太平聖惠方】心煩用酸棗仁一兩水二盞研絞

取汁下粳米二合煮粥候熟下地黃汁一合再

煮勻食

●膽虛不寐

【本草方】心多驚悸用酸棗仁一兩炒香搗為末

每服二錢竹葉湯下 和劑方用人參一兩

辰砂半兩乳香二錢半煉蜜丸服

【聖惠方】用馬頭骨灰乳香各一兩酸棗仁炒二

兩為末每服二錢溫酒服

●虛勞不眠

【千金方】乾薑為末湯服三錢取微汗出

●振悸不眠

【圖經】楊榮方酸棗仁湯用酸棗二升茯苓白朮

人參甘草各二兩生薑六兩水八升煮三升分



服

●去熱少睡

【食醫心鏡】龍葵菜同米煮羹粥食之

●晝夜不眠

【肘后方】以新布火炙熨目並蒸大豆更番囊盛

枕之冷即易終夜常枕之即愈

●膽熱多眠

【聖惠方】馬頭骨灰鐵粉各一兩硃砂半兩龍腦

半分爲末煉蜜丸梧子大每服三十九竹葉湯

下

●穀勞嗜臥

【肘后方】飽食便臥得穀勞病令人四肢煩重嘿

嘿欲臥食畢輒甚用大麥蘖一升椒一兩並炒

乾薑三兩搗末每服方寸匕白湯下日三服

●人就睡臥

【楊堯輔方】花穀葉晒研末湯服一二錢取瘥止

●目澁好眠

【肘后方】取鼠目一枚燒研和魚膏點入目眇兼

以絳囊盛兩枚佩之

●膽風沉睡

【簡要濟衆方】膽風毒氣虛實不調昏沉多睡用

酸棗仁一兩生用全挺臘茶二兩以生薑汁塗

炙微焦爲散每服二錢水七分煎六分溫服

●人好覺寐

【千金方】桃仁熬去皮尖三七枚以小便服之

●鬼魘不寤

【千金方】卓莢末刀圭吹之能起死人

【肘后方】以青牛蹄或馬蹄臨人頭上即活

●夜臥斃死

【瑣碎錄】勿用火照急取梁塵納鼻中卽活

●夜臥禁斃

【起居雜忌】凡臥時以鞋一仰一覆則無斃及惡

夢

●房勞不眠

【三十六黃方】黃病體重不眠眼赤如珠心下塊

起若瘕十死一生宜烙舌下灸心俞關元二七

壯以婦人內衣燒灰酒服二錢

●睡中汗出

【簡便方】酸棗仁人參茯苓等分爲末每服一錢

米飲下

●夜多惡夢

【發明】類編云錢不少卿夜多惡夢通宵不寐自

慮非吉遇鄧州推官胡用之曰昔常如此有道  
士教戴辰砂如箭鏃者涉旬卽驗四五年不復  
有夢因解髻中一絳囊遺之卽夕無夢神魂安  
靜道書謂丹砂辟惡安魂觀此二事可徵矣

●人夜讖語

【本草方】拾遺藏器云靈牀上果子人夜讖語食  
之卽止

●令臥不起

【發明】時珍曰淮南萬畢術云東行白馬蹄下土  
合三家井中泥置人臍下卽臥不能起也

●多忘喜臥

【主治蘇頌】萹花一名商陸花人心昏塞多忘喜  
臥取花陰乾百日搗末日暮水服方寸七乃臥  
思念所欲事卽於眠中醒悞也

●神困多睡

【發明】時珍曰危氏得效方麻藥煮酒方中用之  
聖濟錄治膈上虛熱咽喉噎塞小便赤澀神困  
多睡有坐拏丸用坐拏草大黃赤芍藥木香升  
麻麥門冬黃芪木通酸棗仁薏苡仁枳殼等分  
爲末蜜丸梧子大每服二十九麥門冬湯下

諸汗門

●汗後奔豚

【張仲景金匱要略】茯苓桂枝湯治發汗後臍下  
悸欲作奔豚者茯苓一兩炙甘草二錢半桂枝  
三錢大棗二枚以甘爛水二升煮茯苓減半服  
之日再服

●心悶汗出

【千金方】不識人新汲水和蜜飲之甚效

●脾虛汗出

【丹溪方】白朮四兩切片以一兩同牡礪炒一兩  
同石斛炒一兩同麥麩炒揀朮爲末每服三錢  
食遠粟米湯下日三服

●老小虛汗

【全幼心鑑】白朮五錢小麥一撮水煮乾去麥爲  
末用黃耆湯下一錢

●虛瘡自汗

【經效濟世方】用草菓一枚麵裹煨熟連麵研入  
平胃散二錢水煎服

●虛勞盜汗

【聖濟總錄】煩悶口乾用青蒿一斤取汁熬膏入  
人參末麥門冬末各一兩熬至可丸丸如梧子

大每食後米飲服二十九名青蒿丸

【本事方】牡蠣粉麥麩炒黃色等分爲末每服二

錢水二盞煎七分溫服日一

●身熱多汗

【千金方】胡粉半斤雷丸四兩爲末粉身

●濕溫多汗

【龐安常傷寒論】妄言煩渴石膏炙甘草等分爲

末每服二錢七漿水調下

●自汗不止

【千金方】白朮末飲服方寸七日二服

【集簡方】何首烏末津調封臍中

【本草方】防風去蘆爲末每服二錢浮麥煎湯服

朱氏集驗方防風用麩炒豬皮煎湯下

【集簡方】鬱金末臥時調塗于乳上

【本草方】糯米小麥麩同炒爲末每服三錢米飲

下或煮猪肉點食

【肘后方】粳米粉絹包頻頻撲之

●盜汗

【楊氏家藏方】婦人小兒一切盜汗又治傷寒後

盜汗不止龍膽草研末每服一錢豬膽汁三兩

點入溫酒少許調服

【朱氏集驗方】太平白芷一兩辰砂半兩爲末每

服二錢溫酒下屢驗

【通妙真人方】熟艾二錢白茯神三錢烏梅三個

水一盞煎八分臨臥溫服

●小兒盜汗

【古今錄驗】麻黃根三分故蒲扇灰一分爲末以

乳服三分日服三仍以乾薑三分同爲末三分

撲之

【本草方】洗日以豉一升微炒香清酒三斤漬三

日取汁冷暖任服不瘥更作三兩劑即止

【奇效良方】麻黃根椒目等分爲末每服一錢無

灰酒下外以麻黃根故蒲扇爲末撲之

【經驗方】樹上乾桃子一枚霜梅兩個葱根七個

燈心二莖陳皮一錢稻根大麥芽各一撮水二

鍾煎服之

【發明】宗奭曰蜀椒目治盜汗有功將椒目微炒

碾細用半錢以生豬上唇煎湯一合睡時調服

無不效蓋椒目能行水又治水蟲也

【發明】經霜桑葉研末米飲服止盜汗

●夜睡盜汗

【易簡方】防風二兩芎藭一兩人參半兩爲末每

服三錢臨臥飲下

【本草方】麥麵作彈丸空心臥時煮食之次早服

妙香散一帖取效

【千金方】韭根四十九根水二升煮一升頓服

【集靈方】五倍子末蒿麥麵等分水作餅煨熟

夜臥待飢時乾吃二三個勿飲茶水甚妙

●病後虛汗

【聖惠方】口乾心躁熟地黃五兩水三鍾煎一鍾

半分三服一日盡

【肘后方】及目中流汗杜仲牡蠣等分爲末臥時

水服五七不止更服

【聖惠方】傷寒後虛弱日夜汗出不止口乾心躁

用黃雌雞一隻去腸胃治淨麻黃根一兩水七

大盞煮汁三大盞去滓及雞入肉菘荅酒浸一



宿刮淨一兩牡蠣煨粉二兩煎取一盞半一日服盡

● 虛汗無度

【談楚翁試驗方】麻黃根黃芪等分爲末飛麵糊作丸梧子大每用浮麥湯下百丸以止爲度

● 諸虛自汗

【和劑局方】夜臥卽甚久則枯瘦黃芪麻黃根各一兩牡蠣米泔浸洗煨過爲散每服五錢水二盞小麥百粒煎服

● 氣虛盜汗

【千金方】牡蠣粉杜仲等分爲末每酒服方寸匕

● 心虛自汗

【證治要訣】不睡用積豬心一個帶血破開入人參當歸各二兩煮熟去藥食之不過數服卽愈

● 血虛心汗

【證治要訣】別處無汗獨心孔有汗思慮多則汗亦多宜養心血以艾湯調茯苓末日服一錢

● 皮膚血汗

【聖濟總錄】郁李仁去皮研一錢鵝梨搗汁調下

● 盜汗陰汗

【本草方】麻黃根牡蠣粉爲末撲之

● 盜汗自汗

【醫林集要】每夜臥時帶饑喫蒸餅一枚不過數日卽止

日卽止

【集靈方】常出爲自汗睡中出爲盜汗用五倍子

研末津調填臍中縛定一夜卽止也

● 虛汗盜汗

【衛生寶鑑】用浮小麥文武火炒爲末每服二錢

半米飲下日三服或煎湯代茶飲 一方以猪

嘴唇煮熟切片蘸食亦良

● 卒汗不止

【外臺方】牛羊脂温酒類化服之

● 盜汗遺精

【普濟方】鹿角霜二兩生龍骨炒牡蠣煨各一兩

爲末酒糊丸梧子大每鹽湯下四十九

● 出汗不滴

【經驗後方】瘦却腰脚并耳聾者米醋浸荆三稜

夏四日冬六日爲末醋湯調下二錢卽瘥

● 食卽出汗

【心鏡方】乃脾胃虛也猪肝一斤薄切瓦焙爲末

煮白粥布絞汁衆手丸梧子大空心飲下五十

九日五

● 諸病汗法

【發明】震亨曰浮萍發汗勝於麻黃頌曰俗醫用

治時行熱病亦堪發汗甚有功其方用浮萍一

兩四月十五日采之麻黃去根節桂心附子炮

裂去臍皮各半兩四物搗細篩每服一錢以水

一中盞生薑半分煎至六分滓熱服汗出乃

瘥

消渴門

● 消渴引飲

【聖濟錄】瓦窰突上黑煤乾似鐵屎者半斤爲末

入生薑四兩同搗絹袋盛水五升浸汁每飲五

合

【選奇方】神效丸用蜜陀僧二兩研末湯浸蒸餅

九梧子大濃煎蠶繭鹽湯或茄根湯或酒下一日五九日增五九至三十九不可多服五六服後以見水惡心為度惡心時以乾物壓之日後自定甚奇

【聖濟錄】無名異一兩黃連二兩為末蒸餅丸綠

豆大每服百丸以茄根蠶繭煎湯送下

【本事方】浮石舶上青黛等分麝香少許為末温

湯服一錢 又方白浮石蛤粉蟬殼等分為末

鯽魚膽汁七個調服三錢神效

【聖濟錄】湯瓶內蘼葛根水萍焙等分每服五錢

水煎服 又方湯瓶內鱗拔蕞根炒各一兩烏

梅連核二兩焙為散每服二錢水一盞石器煎

七分温呷日一服

【本草方】人參為末雞子清調服一後日三四服

集驗用人參括樓根等分生研為末煉蜜丸梧

子大每服百丸食前麥門冬湯下日二服以愈

為度名玉壺丸忌酒麵炙燻 鄭氏家藏消渴

方人參一兩粉草二兩以雄豬膽汁浸炙腦子

半錢為末蜜丸芡子大每嚼一丸冷水下 聖

濟錄用人參一兩葛粉二兩為末發時以燻豬

湯一升入藥三錢蜜二兩慢火熬至三合狀如

黑錫以瓶收之每夜以一匙含嚥不過三服取

效也

【陳日華經驗方】白芍藥甘草等分為末每用一

錢水煎服日三服鄂渚辛祐之患此九年服藥

止而復作蘇樸授此方服之七日頓愈古人處

方殆不可曉不可以平易而忽之也

【聖惠方】骨節煩熱用生芭蕉根搗汁時飲一二

合

【崔元亮海上集驗方】用上元板橋麥門冬鮮肥者二大兩宜州黃連九節者二大兩去兩頭尖三五節小刀子調理去皮毛了吹去塵更以生布摩拭秤之搗末以肥大苦匏汁浸麥門冬經宿然後去心卽於臼中搗爛納黃連末和丸並手丸如梧子大食後飲下五十九日再但服兩日其渴必定若重者卽初服一百五十九二日服一百二十九三日一百九四日八十九五天五十九合藥要天氣晴明之夜方浸藥須淨處禁婦人雞犬見之如覺可時只服二十五丸服訖覺虛卽取白羊頭一枚治淨以水三大斗煮爛取汁一斗以來細細飲之勿食肉勿入鹽不過三劑平復也

【聖惠方】小便不利葵根五兩水三大盞煮汁平

旦服日一服

【衛生家寶方】虎杖燒過海浮石烏賊魚骨丹砂等分爲末渴時以麥冬湯服二錢日三次忌酒色魚麵鮮醬生冷等物

【楊氏家藏方】甘遂麩炒半兩黃連一兩爲末蒸餅丸綠豆大每薄荷湯下二九忌甘草

【聖濟錄】凌霄花一兩搗碎水一盞半煎一盞分二服

【千金方】作粉法大栝樓根去皮寸切水浸五日逐日易水取出搗研瀝過澄粉曬乾每服方寸匕水化下日三服亦可入粥及乳酪中食之

【肘后方】用栝樓根薄切炙取五兩水五升煮四升隨意飲之外臺祕要用生栝樓根三十斤

以水一石煮取一斗半去滓以牛脂五合煎至水盡用煖酒先食服如雞子大日三服最妙

聖惠方用栝樓根黃連二兩爲末蜜丸梧子大每服三十九日二服 又玉壺丸用栝樓根人參等分爲末蜜丸梧子大每服三十九麥門冬湯下

【聖惠方】芫瓜俗名王瓜去皮每食後嚼二三兩五七度瘥

【千金方】日至一石者浮萍搗汁服之 又方用乾浮萍栝樓根等分爲末人乳汁和丸梧子大空腹飲服二十九三年者數日愈

【聖惠方】消渴飲水燕窠中草燒灰一兩牡蠣煨二兩白羊肺一具切曬研末每新汲水三錢愈  
【肘后方】日至數斗小便赤澀用秋蘇子仁一升

水三升煮三四沸飲汁不過五升瘥

【楊氏產乳】不止糯米三合水五升蜜一合研汁分服或煮汁服

【外臺祕要】煩渴不止糯米泔任意飲之卽定研汁亦可

【本草方】薏苡仁煮粥飲并煮粥食之

【肘后方】烏豆置牛膽中陰乾百日吞盡卽瘥

【普濟方】綠豆煮汁並作粥食

【存仁堂方】金豆丸用白扁豆浸去皮爲末以天

花粉汁同蜜和丸梧子大金箔爲衣每服三十

二九天花粉汁下日三服忌炙燂酒色次服滋

腎藥牽憲副方 韭苗日用三五兩或炒或作

羹勿入鹽入醬無妨喫至十斤卽住極效過清

明勿食有人病此引飲無度得此方而愈



【圖經本草】獨勝散用出了子蘿蔔三枚淨洗切片日乾爲末每服二錢煎猪肉湯澄清調下日三服漸增至三錢生者搗汁亦可或以汁煮粥食之

【聖惠方】乾生薑末一兩以鯽魚膽汁和九梧子大每服七九米飲下

【本草方】消渴累年不愈莎草根一兩白茯苓半兩爲末每陳粟米飲服三錢日二

【經驗方】日至一石者菠稊根雞內金等分爲末米飲服一錢日三服

【孟詵食療】消渴積熱白瓜去皮每食後喫三二兩五七度良

【普濟方】用香水梨或鵝梨或江南雪梨皆可取汁以蜜湯熬成餅收無時以熱水或冷水調服

愈乃止

【發明】時珍曰桑葉乃手足陽明之藥汁煎代茗能止消渴

【普濟方】牛鼻木兩個男用牝牛女用牡牛者洗剉八參甘草半兩大白梅一個水四盃煎三盃熱服甚妙

【危氏得效方】五倍子爲末水服方寸七日三服  
【斗門方】晚蠶沙焙乾爲末每用冷水下二錢不過數服效

【崔元亮海上方】用蝸牛十四枚形圓而大者以水三合密器浸一宿取水飲之不過一劑愈

【聖惠方】用蝸牛焙半兩蛤粉龍膽草桑根白皮炒各二錢半研末每服一錢楮葉湯下

【吳氏心統】用鯽魚一枚去腸留鱗以茶葉填滿

紙包煨熟食之不過數枚即愈

【本事方】用浮石蛤蚧蟬蛻等分爲末以鯽魚膽

七枚調服三錢神效

【普濟方】用泥鰱魚十頭陰乾去頭尾燒灰乾荷

葉等分爲末每服二錢新汲水調下日三名沃

焦散

【經驗方】臘日或端午日用黃泥固濟牡蠣煨赤

研末每服一錢用活鯽魚煎湯調下只二三服

愈

【心鏡方】消渴日夜不止小便數者用田螺五升

水一斗浸一夜渴即飲之每日一換水螺或煮

食飲汁亦妙

【聖惠方】用糯米二升煮稀粥一斗冷定入田中

活螺三升在內待粥盡吐沫出乃收飲之立妙

【心鏡方】小便數以黃雌雞煮汁冷飲并作羹食

肉

【心鏡方】小便數用野雞一隻五味煮取三升已

來汁飲之肉亦可食甚效

【心鏡方】不知足用白花鴿一隻切作小片以上

蘇煎含嚥

【保和集】竹籠散用五靈脂黑豆去皮等分爲末

每服三錢冬瓜湯下無皮用藥亦可日二服不

可更服熱藥宜八味丸去附子加五味子若小

渴者二三服即止

【食醫心鏡】日夜飲水數斗者心鏡用雄豬肚一

枚煮取汁入小鼓渴即飲之肚亦可食煮粥亦

可仲景豬肚黃連丸治消渴用雄豬肚一枚入

黃連末五兩栝樓根白梁米各四兩知母三兩

麥門冬二兩縫定蒸熟搗丸如梧子大每服三十九米飲下

【三因方】猪脊湯用猪脊骨一尺二寸大棗四十枚新蓮肉四十九枚炙甘草二兩西木香一錢水五碗同煎取汁渴則飲之

【正要方】羊肉一脚瓠子六枚薑汁半合白麵二兩同鹽葱炒

【濟生方】因飲酒或食果實過度雖能食而口渴飲水數尿以麝香常門子酒相作十餘丸枳椇子煎湯送下蓋麝香敗酒壞果枳椇亦敗酒也

●消渴煩悶

【聖惠方】黑鉛水銀等分結如泥常含豆許吞津  
【聖濟錄】消渴煩熱鉛白霜枯白礬等分爲末蜜丸芡子大綿裹含化嚙汁 又方鉛白霜一兩

根黃硝石各一兩爲末每冷水服一錢

【聖惠方】消渴煩亂黃丹新汲水服一錢以蕎麥粥壓之

【聖濟錄】水銀一兩鉛一兩結砂皂莢一挺酥炙麝香一錢爲末每服半錢白湯下

【聖惠方】消渴煩亂黃栝樓一個酒一盞洗去皮子取剉煎成膏入白礬末一兩丸梧子大每米飲下十九

【心鏡方】用小麥作飯及粥食

【聖惠方】冬瓜瓢乾者一兩水煎飲

【簡要濟衆方】烏梅肉二兩微炒爲末每服二錢水二盞煎一盞去滓入豉二百粒煎至半盞溫服

●遠行止渴

【發明】藏器曰水花主遠行無水止渴和苦栝樓

爲丸每日服二十九永無渴也

● 膈消飲水

【總錄方】鷄內金洗晒乾栝樓根炒五兩爲末糊

丸梧子大每服三十九溫水下日三

● 消渴不止

【經驗方】下元虛損牛膝五兩爲末生地黃汁五

升浸之日曝夜浸汁盡爲度蜜丸梧子大每空

心溫酒下三十九久服壯筋骨駐顏色黑髮津

液自生

【事林廣記】兔絲子煎汁任意飲之以止爲度

【普濟方】拔穀卽菝葜咬咀半兩水三盞烏梅一

個煎一盞溫服

【聖濟總錄】冬瓜一枚削皮埋濕地中一日取出

破開取清水日飲之或燒熟絞汁飲之

【摘元方】小便多用乾冬瓜子麥門冬黃連各二

兩水煎飲之冬瓜苗葉俱治消渴不拘新舊

【聖濟總錄】乾猪胞十個剪破去蒂燒存性爲末

每溫酒服一錢

【聖濟總錄】消渴無度雄猪膽五個定粉二兩同

煎成丸芡子大每含化二丸咽下日二

【總錄】栝樓根煎用生栝樓根切片十斤以水三

斗煮至一斗濾淨入煉淨黃牛脂一合慢火熬

成膏瓶收每酒服一杯日三服

【聖惠方】衆人溺坑中水取一盞服之勿令病人

知三度瘥

● 口中乾燥

【太平聖惠方】煩渴無津雄猪膽五枚酒煮皮爛

入定粉一個研勻丸芡子大每含化一九嘔汁

●乳石發渴

【聖濟錄】寒水石一塊含之以瘥爲度

●消渴尿多

【肘后方】用黃連末蜜丸梧子大每服三十九白

湯下 寶鑑用黃連半斤酒一升浸重湯內煮

一沸時取曬爲末水丸梧子大每服五十九溫

水下崔氏治消渴小便滑數如油黃連五兩括

樓根五兩爲末生地黃汁丸梧子大每牛乳下

五十九日二服忌冷水猪肉 總錄用黃連末

入豬肚內蒸爛搗丸梧子大飯飲下

【外臺祕要】消中尿多日夜尿七八升冬葵根五

斤水五斗煮三斗每日平旦服二升

【千金方】薔薇根一把水煎日服之

【韋宙獨行方】能食黃蘗一斤水一升煮三五沸

渴卽飲之恣飲數日卽止

【外臺祕要】非淋也用榆皮二片去黑皮以水一

斗煮取五升一服三合日三服

【肘后方】入地三尺桑根剝取白皮炙黃黑剉以

水煮濃汁隨意飲之亦可入少米勿用鹽

【肘后方】竹瀝恣飲數日愈

●消渴煩躁

【外臺方】糯米泔任意飲之卽定研汁亦可

【聖惠方】取七家井索近餅口結處燒灰新汲水

服二錢不過三五服效

【聖惠方】蠶蛹二兩以無灰酒一中盞水一大盞

同煮一中盞溫服

●腎虛消渴

【普濟妙方】難治者黑大豆炒天花粉等分爲末

糊丸梧子大每黑豆湯下七十九日二服名救

活丸

●消渴便閉

【發明】頌曰張仲景治消渴脈浮小便不利微熱

者猪苓散發其汗病欲飲水而復吐名爲水逆

冬時寒嗽如瘧狀者亦與猪苓此即五苓散也

猪苓茯苓白朮各三兩澤瀉五分桂二分細搗

篩水服方寸七日三多飲煖水汗出即愈利水

道諸湯劑無若此驗今人皆用之

●下虛消渴

【德生堂經驗方】上盛下虛心火炎燠腎水枯涸

不能交濟而成渴證白茯苓一斤黃連一斤爲

末熬天花粉作糊丸梧子大每温湯下五十九

【廣利方】心脾中熱下焦虛冷小便多者牛羊乳

每飲三四合

●胃虛消渴

【古今錄驗】羊肚爛煮空腹食之

●胃熱消渴

【醫方心鏡】以陳粟米炊飯乾食之良

●強中消渴

【並千金方】猪腎薺萆湯治強中之病莖長興盛

不交精液自出消渴之後即發癰疽皆由恣意

色慾或餌金石所致宜此以制腎中熱也用猪

腎一具薺萆石膏各三兩人參茯苓磁石知母

葛根黃芩栝樓根甘草各二兩黑大豆一升水

一斗半先煎猪腎大豆取汁一斗去滓下藥再

煮三升分三服後人名爲石子薺萆湯 又薺



芫丸用薺芫大豆茯神磁石栝樓根熟地黃地  
骨皮元參石斛鹿茸各一兩人參沉香各半兩  
爲末以豬腎治淨煮爛杵和丸梧子大每服七  
十九空心鹽湯下

●積熱消渴

【孟詵食療】白瓜去皮每食後喫三二兩五七度  
良

●消渴羸瘦

【崔元亮海上方】用兔一隻去皮爪五臟以水一  
斗半煎稠去滓澄冷渴卽飲之極重者不過二  
兔

●消渴有蟲

【洪邁夷堅志】苦楝根白皮一握切焙入麝香少  
許水二椀煎至一椀空心飲之雖困頓不妨下

蟲如虻而紅色其渴自止消渴有蟲人所不知

●消渴骨蒸

【經驗】大冬瓜一枚去瓢入黃連末填滿安甕內  
待瓜消盡同研丸梧子大每服三四丸煎冬  
瓜湯下

●老人消渴

【鄙事】鹿頭一個去毛煮爛和五味空心食以汁  
嚥之

【奉親書】寒食大麥一升水七升煎五升入赤飴  
二合渴卽飲之

●消渴便水

【聖濟總錄】服此令水從小便出用紫蘇子炒三  
兩蘿蔔子炒三兩爲末每服二錢桑根白皮煎  
湯服日二次

●虛勞苦渴

【千金方】骨節煩熱或寒用枸杞根白皮切五升

麥門冬三升小麥二升水二斗煮至麥熟去滓

每服一升口渴即飲

●消渴急方

【聖濟總錄】大豆苗嫩者三五十莖塗酥炙黃爲

末每服二錢人參湯下

●消渴補虛

【外科精要】男子婦人諸虛不足煩悸焦渴面色

萎黃不能飲食或先渴而後發瘡癩或先癰疽

而後發渴並宜常服此藥平補氣血安和臟腑

終身可免癰疽之疾用綿黃耆箭筈者去蘆六

兩一半生焙一半以鹽水潤濕飯上蒸三次焙

劉粉甘草一兩一半生用一半炙黃爲末每服

二錢白湯點服早晨日午各一服亦可煎服名

黃芪六一湯

【藥性論】補下治渴麻子仁一升水三升煮四五

沸去滓冷服半升日二服

●三消渴病

【三因方】梅花湯用糯穀炒出白花桑根白皮等

分每用一兩水二碗煎汁飲之

●除煩止渴

【居家必用】生蘿蔔搗瀘取汁以瓦器熬稠入熟

蜜少許同收點湯飲甚良

●三黃丸

【圖經本草】孫思邈千金方云巴郡太守奏加減

三黃丸療男子五癆七傷消渴不生肌肉婦人

帶下手足寒熱瀉五臟火春三月黃芩四兩大

黃三兩黃連四兩夏三月黃芩六兩大黃一兩  
黃連七兩秋三月黃芩六兩大黃三兩黃連三  
兩冬三月黃芩三兩大黃五兩黃連二兩三物  
隨時合搗下篩蜜丸烏豆大米飲每服五丸日  
三不知增至七丸服一月病愈久服走及奔馬  
人用有驗禁食豬肉

●生津丸

【本草方】治消渴飲水無度以黃頰魚涎和青蛤  
粉滑石末等分丸梧子大每粟米湯下三十九

●聖惠水蛇丸

【本草方】治消渴四肢煩熱口乾心跳水蛇一條  
活者剝皮炙黃爲末蝸牛五十個水浸五日取  
涎入天花粉末煎稠入麝香一分粟飯和丸綠  
豆大每服十九薑湯下

●忍冬圓

【外科精要】治消渴愈後預防發癰疽先宜服此  
悉癰疽門



# 古今名醫驗方類編目錄

## 卷五 通治部

### 咳嗽門

卒暴咳嗽	一	痰嗽骨蒸	六	濕痰咳嗽	九
久嗽	一	苦嗽不效	六	寒熱咳嗽	九
久嗽肺脹	二	老嗽不止	六	寒痰咳嗽	九
久嗽唾血	二	一切勞嗽	六	風痰咳嗽	九
久嗽肺癰	三	化痰治嗽	六	酒痰咳嗽	九
久嗽熏法	三	久嗽不止	七	喉痺痰嗽	九
肺痿久嗽	三	咳嗽遺矢	七	痰嗽帶血	九
咳嗽不止	四	三焦咳嗽	七	冷氣咳嗽	九
肺勞咳嗽	四	咳嗽膿血	七	經年氣嗽	九
肺傷咳嗽	四	久咳喘急	七	瘦病咳嗽	九
肺痿咳血	四	熱咳不止	七	酒後咳嗽	一〇
肺熱痰咳	四	肺痿多涎	八	乾咳無痰	一〇
肺熱咳嗽	五	痰嗽喘急	八	久患肺病	一〇
肺氣咳逆	五	氣痰咳嗽	八	虛熱咳嗽	一〇
		咳嗽吐血	八	急勞咳嗽	一〇
		咳嗽有痰	八	氣熱咳嗽	一〇
		痰飲咳嗽	九	老小咳嗽	一〇

老人喘嗽.....一〇

心虛嗽血.....一〇

喘嗽面浮.....一〇

咳逆氣短.....一〇

喘嗽失音.....一〇

喘嗽喉啞.....一〇

積年咳嗽.....一一

老人痰氣喘嗽.....一一

欽肺刮嗽.....一一

補肺丸.....一一

百祥膏.....一一

鹿髓煎.....一一

嘔吐門

病後嘔逆.....一一

嘔吐陽厥.....一一

乾嘔不息.....一一

吐逆不止.....一一

嘔噦不止.....一一

溫病冷嘔.....一一

溫病熱噦.....一一

暴得吐逆.....一二

肺癰得吐.....一二

食入即吐.....一二

食後喜嘔.....一二

口吐清水.....一二

嘔逆酸水.....一二

嘔吐痰水.....一二

胃冷有痰.....一二

支飲作嘔.....一二

虛寒嘔噦.....一二

胃弱嘔逆.....一二

痰壅嘔逆.....一二

卒嘔不止.....一二

乾嘔脇痛.....一二

嘔噦眩悸.....一二

嘔逆厥逆.....一二

嘔吐反胃.....一二

上氣嘔吐.....一二

心痞嘔噦.....一二

頭暈吐逆.....一二

嘔吐胸滿.....一四

嘔噦厥逆.....一四

嘔逆不食.....一四

嘔吐不藥.....一四

腎氣上噦.....一四

諸藥引吐.....一四

諸病應吐論.....一四

翻胃門

反胃結腸.....一四

翻胃吐食.....一四

多年反胃.....一七

脾虛吐食.....一七

脾虛反胃.....一七

反胃上氣.....一七

心下堅如盤.....一七

嘔吐反胃.....一七

反胃惡心.....一七

久冷反胃.....一七

反胃膈氣.....一八

虛寒反胃.....一八



反胃噎疾……………一八

反胃羸弱……………一八

反胃咳噎……………一八

反胃吐痰……………一八

反胃轉食……………一八

反胃關格……………一八

反胃止瀉……………一八

反胃噎膈……………一八

血風反胃……………一九

朝食暮吐……………一九

胃熱吐食……………一九

噎膈門

老人噎食……………一九

噎疾……………一九

噎膈反胃……………一九

噎食膈氣……………一九

卒然食噎……………一九

噎膈拒食……………二〇

噎膈不食……………二〇

食哽……………二〇

膈氣噎塞……………二〇

膈氣疼痛……………二〇

噎食……………二〇

五噎膈氣……………二〇

噎膈不利……………二〇

五噎吐逆……………二〇

膈氣吐食……………二〇

噎塞不通……………二一

噎不下食……………二一

惡心門

胃虛惡心……………二一

胃冷惡心……………二一

人忽惡心……………二一

冷痰惡心……………二一

吞酸嘈雜門

胃冷口酸……………二一

嘈雜吐水……………二一

食物醋心……………二一

醋心吐水……………二一

醋心上攻……………二一

食已吞酸……………二一  
噎吐酸漿……………二二

一八

一八

一八

一八

一八

一八

一八

一八

一八

一八

一八

一八

一八

一八

一八

一八

一八

一八

一八

一八

一八

一八

一八

一八

一八

一八

一八

一八

一八

一八

一八

一八

一八

一八

一八

一八

一八

一八

一八

一八

一八

一八

一八

一八

一八

一八

一八

一八

一八

一八

一八

一八

一八

一八

一八

一八

一八

一八

一八

一八

一八

一八

一八

一八

一八

一八

古今名醫驗方類編卷五

通治部

咳嗽門

● 卒暴咳嗽

【普濟方】白善土粉白礬一兩爲末薑汁糊丸梧

子大臨臥薑湯服二十九

【肘后方】釜月土一分豉七分搗丸梧子大每飲

下四十九

【備急方】爐中鉛屑桂心皂莢等分爲末蜜丸如

梧子大每飲下十五丸忌葱

【普濟方】老小暴嗽石灰一兩蛤粉四錢爲末蒸

餅丸豌豆大焙乾每服三十九丸溫薑汁下

【肘后方】芫花一升水三升煮汁一升以棗十四枚煮汁乾日食五枚必愈

【張文仲方】用百部根漬酒每溫服一升日三服

葛洪用百部生薑各搗汁等分煎服二合

續十全方用百部籐根搗自然汁和蜜等分沸

湯煎膏噉嚙 普濟方治卒咳不止用百部根

懸火上炙乾每含嚙汁勿令人知

【本草方】桃仁三升去皮杵着器中密封蒸熟日

乾絹袋盛浸二斗酒中七日可飲下飲四五合

【崔元亮海上方】頌曰用好梨去核搗汁一椀入

椒四十粒煎一沸去滓納黑錫一大兩消訖細

細含嚙立定 詵曰用梨一顆刺五一孔每孔

納椒一粒麵裹灰火煨熟停冷去椒食之 又

方去核納酥蜜麵裹燒熟冷食 又方切片酥

煎食 又方搗汁一升入酥蜜各一兩地黃汁

一升煎成含嚙凡治嗽須喘急定時冷食之若

熱食反傷肺令嗽更劇不可救也若反可作羊

肉湯餅飽食之即佳

【肘后方】屋上白螺或白蜆殼搗為末酒服方寸

七

【千金方】卒寒咳嗽皂莢燒研鼓湯服二錢

【救急良方】用白蜆殼搗為細末以熟米飲調每

服一錢日三服甚效

【肘后方】白雞一隻苦酒一斗煮取三升分三服

并淡食雞

【肘后方】烏雄雞一隻治如食法酒漬半日飲之

【肘后方】猪腎二枚乾薑三兩水七升煮二升稍

服取汁

●久嗽

【崔氏方】三十年呬嗽薰黃木香葇荑子等分為

末羊脂塗青紙上以末鋪之竹筒燒烟吸之

【勝金方】金粟丸用葉子雌黃一兩研以紙筋泥

固濟小合子一個令乾盛藥水調赤石脂封口

更以泥封待乾架在地上炭火十斤簇煨候火

消三分之一去火候冷取出當如鏡面光明紅

色鉢內細研蒸餅丸粟米大每服三丸五丸甘

草水服

【醫學集成】久近痰嗽自胸膈下塞停飲至於臍

腑用知母貝母各一兩為末巴豆三十枚去油

研勻每服一字用薑三片二面蘸藥細嚼嚙下

便睡次早必瀉一行其嗽立止壯人乃用之

一方不用巴豆 聖惠方出膿血貫衆蘇方木

等分每服三錢水一盞生薑三片煎服日二服

久咳漸成癆瘵鳳尾草爲末用魚鮮蘸食之

【圖經本草】紫苑款冬花各一兩百部半兩搗羅

爲末每服三錢薑三斤烏梅一個煎湯調下日

二甚佳 孟詵必效方有膿血葇荑子五錢淘

去浮者煮令芽出炒研真酥一雞子大大棗七

枚同煎令酥盡取棗日食三枚 又方葇荑子

三撮吞之日五六度光祿李丞服之神驗

【崔行功纂要方】至三十年者葇荑子木香薰黃

等分爲末以羊脂塗青紙上撒末于上卷作筒

燒烟薰吸之

【千金方】三十年嗽百部根二十斤搗取汁煎如

飴服方寸七日三服 深師加蜜二斤 外臺

加飴一斤

【普濟方】馬勃爲末蜜丸梧子大每服二十九白

湯下卽愈

【宣明方】久咳虛嗽買同知百勞散治咳嗽多年

自汗用罌粟殼二兩半去蒂膜醋炒取一兩烏

梅半兩焙爲末每服二錢臥時白湯下

【危氏方】穀氣素壯人用之卽效粟殼去筋蜜炙

爲末每服五分蜜湯下

【醫學集成】蘿蔔子炒杏仁去皮尖炒等分蒸餅

丸麻子大每服三五丸時時津嚥

【蕭大尹方】核桃仁五十個煮熟去皮人參五兩

杏仁三百五十個麩炒湯浸去皮研勻入煉蜜

丸梧子大每空心細嚼一丸人參湯下臨臥再

服

【經驗方】生訶黎勒一枚含之嚙汁瘥後口爽不

知食味却煎栝榔湯一碗服立便有味此知連

州成密方也

【古今錄驗】久嗽欲死許明則有效方用厚榆皮

削如指大長尺餘納喉中頻出入當吐膿血而

愈

【本草方】或十年或二十年醫不效者生龜三枚

治如食法去腸以水五升煮取三升浸麴釀秫

米四升如常飲之令盡永不發 又方用龜生

一枚着炊中令人溺之浸至三日燒研以醇酒

一升和末如乾飯頓服須臾大吐嗽囊出則愈

小兒減半

【必效方】鷄子白皮炒十四枚麻黃三兩焙為末

每服方寸七飲下日二

【張文仲方】豬腎二枚入椒四七粒水煮啖之

【本草方】二十年嗽豬脰三具大棗百枚酒五升

漬之秋冬七日春夏五日絞去滓七日服盡忌

鹽

【姚僧坦集驗方】肺痿時時寒熱頰赤氣急用薑

便去頭尾少許五合取大粉甘草一寸四破浸

之露一夜去甘草平旦頓服或入甘草末一錢

同服亦可一日一劑童子忌食五辛熱物

【鄧筆峯雜興】氣急知母去毛切五錢隔紙炒杏

仁薑水泡去皮尖焙五錢以水一鍾半煎一鍾

食遠溫服次以蘿蔔子杏仁等分米糊丸每服

五十九薑湯下以絕病根

●久嗽肺脹



【衛生家寶方】五味二兩粟殼白錫炒過半兩爲

末白錫丸彈子大每服一丸水煎服

【普濟方】皺肺丸用五靈脂二兩胡桃仁八個柏

子仁半兩研勻滴水和丸小豆大每服二十九

甘草湯下

●久嗽唾血

【外臺方】白前桔梗桑白皮三兩炒甘草一兩炙

水六升煮一升分三服忌豬肉菘菜

【食醫心鏡】勞瘦骨蒸日晚寒熱生地黃汁三合

煮白粥臨熟入地黃汁攪勻空心食之

●久嗽肺癰

【張仲景金匱玉函方】胸滿振寒脈數咽乾不渴

時出濁唾腥臭久久吐膿如粳米粥者桔梗湯

主之桔梗一兩甘草二兩水三升煮一升分溫

服再服朝暮吐膿血則瘥

【張仲景金匱玉函方】煩滿微熱心胸甲錯葶莖

湯用葶莖切二升水二斗煮汁五升入桃仁五

十枚薏苡仁瓜瓣各半升煮取二升服當吐膿

血而愈

【范汪方】心胸甲錯者以醇苦酒煮薏苡仁令濃

微溫頓服肺有血當吐出愈

【主治時珍方】膿血腥臭不問膿成未成用柘耳

一兩研末同百草霜二錢糊丸梧子大米飲下

三十九效甚捷

【本草方】宗奭曰久嗽不愈肺積虛熱成癰咳出

膿血曉夕不止喉中氣塞胸膈噎痛用蛤蚧阿

膠鹿角膠生犀角羚羊角各二錢半用河水三

升銀石器內文火熬至半升濾汁時時仰服細

呷日一服張刑部子臯病此田樞密况授方服之遂愈

●久嗽薰法

【發明】頌曰本經主欬逆古方用爲溫肺治嗽之最崔知悌療久咳薰法每旦取款冬花如雞子許少蜜拌花使潤納一升鐵鑊中又用一瓦盤鑽一孔孔內安一小筆管以麪泥縫勿令漏氣鑊下着炭火少時烟從管出以口含吸嘸之如胸中少悶須舉頭卽將指頭按住筒口勿使漏至烟盡乃止如是五日一爲之待至六日飽食羊肉餽飪一頓永瘥 宗奭曰有人病嗽多日或教燃款冬花三兩於無風處以筆管吸其烟滿口則嘸之數日果效

【發明】震亨曰治寒痰咳嗽宜用佛耳草熱痰嗽

宜用燈籠草 時珍曰別錄云治寒熱止咳東垣云治寒嗽言其標也日華云治熱嗽言其本也大抵寒嗽多是火鬱於內而寒覆於外也按陳氏經驗方云三奇散治一切咳嗽不問久近晝夜無時用佛耳草五十文款冬花二百文熟地黃二兩焙研末每用二錢於爐中燒之以筒吸烟嘸下有涎吐去予家一獲久病此醫治不效偶在沅州得一婢用此法兩服而愈也

●肺痿久嗽

【廣利方】涕唾多骨節煩悶寒熱以甘草三兩炙搗爲末每日取小便三合調甘草水一錢服之【食療本草】人參末二兩鹿角膠炙研一兩每服三錢用薄荷豆豉湯一盞葱少許入銚子煎一二沸傾入盞內遇咳時溫呷三五口甚佳

【聖濟錄】木鼈子款冬花各一兩爲末每用三錢

焚之吸烟良久吐涎以茶潤喉如此五六次後

服補肺藥 一方用木鼈子一個雄黃一錢

【肘后方】吐涎沫心中温温咽燥而不渴生天門

冬搗汁一斗酒一斗飴一升紫苑四合銅器煎

至可丸每服杏仁大一九日三服

【儒門事親】漢防己末二錢漿水一錢煎七分細

呷

【李絳兵部手集】大人小兒咳逆短氣胸中吸吸

咳出涕吐嗽出臭膿用淡竹瀝一合服之日三

五次以愈爲度

【普濟方】立效丸治肺虛隔熱咳嗽氣急煩滿咽

乾燥渴欲飲冷水體倦肌瘦發熱減食喉音嘶

不出黃蠟溶濾令淨漿水煮過八兩再化作一

百二十九丸以蛤粉四兩爲衣養藥每服一九胡

桃半個細嚼温水下卽臥閉口不語日二服

【葛可久方】作燥羊肺湯用羊肺一具洗淨以杏

仁柿霜真豆粉真酥各一兩白蜜二兩和勻灌

肺中白水煮食之

【集驗方】停久臭溺日日温服之

●咳嗽不止

【肘后方】浮石末湯服或蜜丸服

【摘元方】瓜萋仁一兩文蛤七分爲末以薑汁澄

濃脚丸彈子大噲之

【初虞世必效方】生薑五兩錫半升火煎熟食盡

愈段侍御用有效

【壽域神方】蝙蝠去翅足燒酒爲末一錢食後白

湯下

【食療方】黃明膠炙研每服一錢人參末二錢薄

豉湯二盞葱白少許煎沸嗽時溫呷三五口即

止

●肺勞咳嗽

【斗門方】雌黃一兩入瓦合內不固濟坐地上以

火焙之厚二寸以炭一斤簇定頂火煨三分去

一退火出毒為末糖酥和丸粟米大每日空心

杏仁湯下三丸

【聖濟錄】臥時盛者不灰木一兩半太陰元精石

二兩甘草炙半兩貝母一兩半天南星白礬水

煮過半兩為末每服半錢薑湯下

●肺傷咳嗽

【衛生易簡方】紫苑五錢水一盞煎七分溫服日

三次

【肘后方】豬脰一具苦酒煮食不過三服

●肺痿咳血

【聖濟錄】不止用栝樓五十個連瓢丸焙烏梅肉

五十個焙杏仁去皮尖炒二十一個為末每用

一捻以豬肺一片切薄摻末入內炙熟冷嚼嚥

之日二服

【發明】頌曰濟生方治肺損咯血以熟豬肺切蘸

薏苡仁末空心食之薏苡補肺豬肺引經也趙

君猷言屢用有效

【普濟方】蘿蔔和羊肉或鯽魚煮熟頻食

●肺熱痰咳

【嚴用和濟生方】胸膈塞滿用瓜萐仁半夏湯泡

七次焙研各一兩薑汁打麵糊丸梧子大每服

五十九食後薑湯下

【勝金方】萊菔子半升淘淨焙乾炒黃爲末以糖

和丸芡子大綿裹含之嚙汁甚妙

●肺熱咳嗽

【衛生易簡方】沙參半兩水煎服之

【濟生方】肺熱痰嗽製半夏栝樓仁各一兩爲末

薑汁打糊丸梧子大每服二三十丸白湯下或

以栝樓瓢煮熟丸

【發明】宗奭曰枇杷葉治肺熱嗽甚有功一婦人

患肺熱久嗽甚身如火炙肌瘦將成癆以枇杷

葉木通款冬花紫苑杏仁桑白皮各等分大黃

減半如常治訖爲末蜜丸櫻桃子大食後夜臥

各含化丸一顆未終劑而愈矣

【外臺祕要】蘇遊鳳髓湯用松子仁一兩胡桃仁

二兩研膏和熱蜜半兩收之每服二錢食後沸

湯點服

●肺氣咳逆

【深師方】體腫短氣脹滿晝夜倚壁不得臥當作

水雞聲者白前湯主之白前二兩紫苑半夏各

三兩大戟七合以水一斗漬一宿煮取三升分

作數服禁食羊肉錫鑪大佳

【簡便方】砂仁洗淨炒研生薑連皮等分搗爛熱

酒食遠泡服

【崔知悌方】不得臥或遍體氣腫或單面腫鼓足

腫並主之葶藶子三升微火熬研以絹袋盛浸

清酒五升中冬七日夏三日初服如桃許大日

三夜一冬月日二夜三量其氣力取微利下爲

度如患急者不待日滿亦可絞服

【梅師方】呷呀息氣喉中作唾粘以藍葉水浸搗

汁一升空腹頻服須臾以杏仁研汁煮粥食之

一兩日將息依前法更服吐痰盡方瘥

【張仲景金匱要略方】脹沉者澤漆湯主之澤漆

三斤以東流水五斗煮取一斗五升去滓入半

夏半升紫參白前生薑各五兩甘草黃岑人參

桂心各三兩煎取五升每服五合日三服

【儒門事親】蕎麥粉四兩茶末二錢生蜜二兩水

一碗順手攪千下飲之良久下氣不止即愈

【食醫心鏡】喘促唾膿血以菜菔子一合研細煎

湯食上服之

【劉禹錫傳信方】用合州乾薑炮皂莢炮去皮子

及蛀者桂心紫色者去皮並搗篩等分煉白蜜

和搗三千杵丸梧子大每飲服三丸嗽發即服

日三五服禁食葱麪油膩其效如神禹錫在淮

南與李亞同幕府每治人而不出方或謂其吝

李曰凡人患嗽多進冷藥若見此方用藥熱燥

必不肯服故但出藥即多效也試之信然

【千金方】不拘大人小兒以杏仁三升去皮尖炒

黃研膏入蜜一升杵熟每食前含之嚙汁

【心鏡】胸滿氣喘桃仁三兩去皮尖以水一大升

研汁和粳米二合煮粥食之

【聖惠方】治傷中筋脈急上氣咳嗽者用棗二十

枚去核以酥四兩微火煎入棗肉中泣盡酥取

收之常含一枚微微嚙之取瘥

【崔元亮海上集驗方】腹滿羸瘦者楸葉三升水

三斗煮二十沸去滓煎至可丸如棗大以筒納

入下部中立愈

【張仲景方】唾濁不得臥皂莢丸用皂莢炙去皮



子研末蜜丸梧子大每服一九棗湯下日三夜  
一服

【百一方】十年二十年諸藥不效用蝙蝠除翅足  
燒焦研末米飲服之

【心鏡】煩滿用猪肉切作鍾子猪脂煎熟食之

【心鏡】猪肪四兩煮百沸以來切和醬醋食之

【千金方】積年垂死用芫荽子炒熟羊肺切曝等  
分爲末以七月七日醋拌每夜服二方寸七粥  
飲下隔日一服

●痰嗽骨蒸

【發明】時珍曰王海藏言予年二十時因感冒咳  
嗽既久且犯戒遂病骨蒸發熱膚如火燎每日  
吐痰盈許暑月煩渴寢食幾廢六脈浮洪遍服  
柴胡麥門冬荆瀝諸藥月餘並劇皆以爲必死

矣先君偶思李東垣治肺熱如火燎煩躁引飲  
而晝盛者氣分熱也宜一味黃芩湯以瀉肺經

氣分之火遂按方用片芩一兩水二鍾煎一鍾  
頓服次日身熱盡退而痰嗽皆愈藥中肯綮如  
鼓應桴醫中之妙有如此者 奇效方潮熱團  
魚丸用團魚一個柴胡前胡貝母知母杏仁各  
五錢同煮待熟去骨甲裙再煮食肉飲汁將藥  
焙研爲末仍以骨甲裙煮汁和丸梧子大每空  
心黃芪湯下三十九日二服服盡仍以參芪藥  
調之

●苦嗽不效

【發明】時珍曰按趙潛齋痾漫筆云越州一學錄  
少年苦嗽百藥不效或令用南向柔桑條一束  
每條寸折納鍋中以水五盃煎至一盃盛瓦器

中渴即飲之服一月而愈此亦桑枝煎變法爾

●老嗽不止

【陳藏器本草方】故茅屋上塵年久着烟火者和

石黃款冬花婦人月經衣帶為末和塗茅上待

乾入竹筒中燒烟吸嘔無不瘥也

●一切勞嗽

【宣明方】胸膈痞滿焚香透膈散用鵝管石雄黃

佛耳草款冬花等分為末每用一錢安香爐上

焚之以筒吸烟入喉中日二次

【祕韞方】吐臭痰者尋水邊蛇吞青蛙末嘔者連

蛇打死黃泥固濟煨研空心酒服一二錢至效

忌生冷五七日永不發也

●化痰治嗽

【本草方】明礬二兩生參末一兩苦醋二升熬為

膏子以油紙包收旋丸豌豆大每用一九放舌

下其嗽立止痰即消 定西侯方只用明礬末

醋糊丸梧子大每睡時茶下二三十丸 摘要

用明礬半生半燒山卮子炒黑等分為末薑汁

糊丸如上服 雜興方用白礬建茶等分為末

糊丸服

【簡便方】人參末一兩明礬二兩以醋醋二升熬

礬成膏入人參末煉蜜和收每以豌豆大一丸

放舌下其嗽立止痰自消

【王璆百一選方】清氣化痰三仙丸治中腕氣滯

痰涎煩悶頭目不清生南星去皮半夏各五錢

並湯泡七次為末自然薑汁和作餅鋪竹篩內

以楮葉包覆待生黃成麴晒乾每用二兩入香

附末一兩糊丸梧子大每服四十九食後薑湯

下

【活法機要】結痰不出語音不清年久者亦宜玉

粉九半夏半兩桂心一字草烏頭半字爲末薑

汁浸蒸餅九芡子大每服一九夜臥含嚙

【普濟方】痰嗽並喘五味子白礬等分爲末每服

三錢以生豬肺炙熟蘸末細嚼白湯下漢陽庫

兵黃去病此百藥不效於岳陽遇一道人傳此

兩服病遂不發

【楊文蔚方】清痰利膈治咳嗽用肥大栝樓洗取

子切焙半夏四十九個湯洗十次搥焙等分爲

末用洗栝樓水并瓢同熬成膏和九梧子大每

薑湯下五十九良

【攝生妙用方】天羅卽絲瓜燒存性爲末棗肉和

丸彈子大每服一九溫酒化下

【瀕湖醫案】百藥煎片黃岑橘紅甘草各等分共

爲細末蒸餅丸菘豆大時時乾嚙數九佳

●久嗽不止

【丹溪方】用五味子五錢甘草一錢半五倍子風

化消各二錢爲末乾嚙 攝生方用五味子一

兩真茶四錢晒研爲末以甘草五錢煎膏丸菘

豆大每服三十九沸湯下數日卽愈也

【初虞世必效方】生薑五兩錫半升火煎熟食盡

愈段侍御用之有效

【本草方】烏梅肉微炒罌粟殼去筋膜蜜炒等分

爲末每服二錢睡時蜜湯調下

【危氏得效方】久咳羸弱九尖拒霜葉爲末以魚

鮮蘸食屢效

●咳嗽遺矢

【潔古家珍】咳則遺矢赤石脂禹餘糧湯主之太

乙丹禹餘糧四兩火煨醋淬烏頭一兩冷水浸

一夜去皮臍焙為末醋糊丸梧子大每食前溫

水下五丸

●三焦咳嗽

【聖濟錄】腹滿不飲食氣不順仙靈脾覆盆子五

味子炒各一兩為末煉蜜丸梧子大每薑茶下

二十九

●咳嗽膿血

【席延賞方】咽乾乃虛中有熱不可服涼藥以好

黃芪四兩甘草一兩為末每服二錢點湯服

【沈存中靈苑方】咳喘上氣喘急嗽血吐血脈無

力者人參末每服三錢雞子清調之五更初服

便睡去枕仰臥只一服愈年深者再服咯血者

服盡一兩甚效 一方以烏雞子水磨千遍自

然化作水調藥尤妙忌醋鹹腥醬麵鮓醉飽將

息乃佳 又方人參黃芪飛羅麵各一兩百合

五錢為末水丸梧子大每服五十九食前茅根

湯下 朱氏集驗方用人參乳香辰砂等分為

末烏梅肉和丸彈子大每白湯化下一丸日一

服

●久咳喘急

【總錄】猪蹄甲四十九枚以瓶子盛之安大南星

一枚蓋之鹽泥固濟煨烟出為度取出入款冬

花半兩麝香龍腦少許研勻每服一錢食後煎

桑白皮湯下名黑金散

●熱咳不止

【摘元方】用濃茶湯一鍾蜜一鍾大熟瓜萎一個

去皮將瓢入茶蜜湯洗去子以盤盛於飯上蒸至飯熟取出時時挑三四匙嚥之

●肺痿多涎

【張仲景金匱要略】吐涎沫頭眩小便數而不咳者肺中冷也甘草乾薑湯溫之甘草炙四兩乾薑炮二兩水三升煮一升五合分服

【梅師方】咳唾膿血薤苡仁十兩杵破水三升煎一升酒少許服之

●痰嗽喘急

【簡要濟衆方】桔梗一兩半爲末用童子小便半升煎四合去滓溫服

【祕韞方】白果七個煨熟以熟艾作七丸每果入艾一九紙包再煨香去艾喫

【發明】溧陽洪輯幼子病痰喘凡五晝夜不乳食

醫以危告其妻夜夢觀音授方令服人參胡桃湯輯急取新羅人參寸許胡桃肉一枚煎湯一蜆殼許灌之喘卽定明日以湯剝去胡桃皮用之喘復作仍連皮用信宿而瘳此方不載書冊蓋人參定喘胡桃連皮斂肺故也

【瑞竹堂方】不能睡臥好芽茶一兩白殭蠶一兩爲末放盤內蓋定傾沸湯一小盞臨臥再添湯點服

【余居士選奇方】長皂莢三條去皮子一莢入巴豆十粒一莢入半夏十粒一莢入杏仁十粒用薑汁製杏仁麻油製巴豆蜜製半夏一處火炙黃色爲末每用一字安手心臨臥以薑湯汁調之吃下神效

【心鏡】用鯉魚一頭去鱗紙裏煨熟去刺研末同

糯米煮粥空心食

【救急方】用白蜆殼並多年陳者燒過存性為極

細末以米飲調服一錢日三服

●氣痰咳嗽

【醫學正傳】芋根煨存性為末生豆腐蘸三五錢

食即效未全可以肥猪肉二三片蘸食甚妙

【東垣蘭室祕藏】玉粉丸南星麩半夏麩陳橘皮

各一兩為末自然薑汁打糊丸如梧子大每服

四十九薑湯下寒痰去橘皮加官桂

【活法機要】面白氣促洒浙惡寒愁憂不樂脈瀉

者玉粉丸用半夏南星各一兩官桂半兩為末

糊丸梧子大每服五十九薑湯下

【本草方】用香藥去核切砂餅內浸酒封固一夜

煮爛蜜拌勻時時含嚥

●咳嗽吐血

【本草方】用人參黃芪飛羅麵各一兩百合五錢

為末水丸梧子大每服五十九食前茅根湯下

【朱氏集驗方】用人參乳香辰砂等分為末烏梅

肉和丸彈子大每白湯化下一丸日一服

【指南方】吐血後咳者紫苑五味炒為末蜜丸芡

子大每含化一丸

【經驗方】甚者殷鮮桑根白皮一斤米泔浸三宿

刮去黃皮剉細入糯米四兩焙乾為末每服一

錢米飲下

【朱氏集驗方】小兒胎髮灰入麝香少許酒下每

個作一服男用女女用男

●咳嗽有痰

【醫方摘要】熟瓜萁十個明礬二兩搗和餅陰乾



研末糊丸梧子大每薑湯下五七十九

●痰飲咳嗽

【本草方】用真蚌粉新瓦炒紅入青黛少許用淡  
盞水滴麻油數點調服二錢 類編云徽宗時  
李防禦為入內醫官時有寵妃病痰嗽終夕不  
寐面浮如盤徽宗呼李治之詔令供狀三日不  
效當誅李憂惶技窮與妻泣別忽聞外叫賣咳  
嗽藥一文一帖吃了即得睡李市一帖視之其  
色淺碧恐藥性獷悍併二服自試之無他乃取  
三帖為一入內授妃服之是夕嗽止比曉面消  
內侍走報天顏大喜賜金帛值萬緡李恐索方  
乃尋訪前賣藥人飲以酒厚價求之則此方也  
云自少時從軍見主帥有此方剽得以度餘生  
耳

●濕痰咳嗽

【活法機要】面黃體重嗜臥驚兼食不消脈緩者  
白朮丸用半夏南星各一兩白朮一兩半為末  
薄糊丸梧子大每服五七十九薑湯下

●寒熱咳嗽

【潔古活法機要】熱痰咳嗽煩熱面赤口燥心痛  
脈洪數者小黃丸用半夏天南星各一兩黃芩  
一兩半為末薑汁浸蒸餅丸梧子大每服五七  
十九食後薑湯下

【本草衍義】初起者燒薑一塊含嚙之

【千金方】旦夕加重少喜多噎面色不潤忽進忽  
退積漸少食脈弦緊者杏仁半兩去皮尖童子  
小便浸七日漉出溫水淘洗砂盆內研如泥以  
小便三升煎如膏每服一錢熱水下婦人室女

服之尤妙

●寒痰咳嗽

【本草方】燒酒四兩猪脂蜜香油茶末各四兩同

浸酒內煮成一處每日挑食以茶下之取效

●風痰咳嗽

【瑞竹堂方】夜不能臥白殭蠶炒研好茶末各一

兩為末每用五錢臥時泡沸湯服

●酒痰咳嗽

【丹溪心法】用此救肺瓜萸仁青黛等分研末薑

汁蜜丸芡子大每噙一丸

●喉痺痰嗽

【陳藏器本草】杏仁去皮熬黃二分和桂末一分

研泥裹含之嚥汁

●痰嗽帶血

【濟生方】款冬花百合蒸焙等分為末蜜丸龍眼

大每臥時嚼一丸薑湯下

【丹溪纂要】青州大柿餅飯上蒸熟批開每用一

枚攪真青黛一錢臥時食之薄荷湯下

●冷氣咳嗽

【姚僧坦方】結脹者乾薑末熟酒調服半錢或錫

糖丸噙

●經年氣嗽

【寇氏衍義】橘皮神麴生薑焙乾等分為末蒸餅

和丸梧子大每服三五十九食後夜臥各一服

有人患此服之兼舊患膀胱氣皆愈也

【聖濟總錄】阿膠炒人參各二兩為末每用三錢

豉湯一盞葱白少許煎服日三次

●瘦病咳嗽

【拾遺方】猪膽和人溺薑汁橘皮訶黎勒皮同煮汁飲之

●酒後咳嗽

【怪證奇方】白殭蠶焙研末每茶服一錢

●乾咳無痰

【楊起簡便方】熟瓜萹搗爛絞汁入蜜等分加白礬一錢熬膏頻含嚙汁

●久患肺病

【勝金方】喘急至嗽甚者不過二劑永瘥杏仁去皮尖二兩童子小便浸一日一換夏月三四換滿半月取出焙乾研細每服一棗大薄荷一葉蜜一雞子大水一鍾煎七分食後溫服忌腥物

【本草方】猪脛一具膩粉一兩瓷瓶固濟上留小竅煨烟盡爲末每服二錢漿水下

【外臺方】咳嗽膿血不止用好酥五十煉三遍當出醍醐每服一合日三服以瘥爲度神效

●虛熱咳嗽

【集簡方】天花粉一兩人參三錢爲末每服一錢米湯下

【董氏方】口乾涕唾用甘蔗汁一升半青梁米四合煮粥日食二次極潤心肺

●急勞咳嗽

【聖惠方】煩熱用桃仁三兩去皮尖猪肝一枚童子小便五升同煮乾於木椿內杵爛入蒸餅和丸梧子大每溫水下三十九

●氣熱咳嗽

【聖濟錄方】石韋檳榔等分爲末薑湯服二錢

【發明】時珍曰宋醫錢乙治肺氣熱盛咳嗽而後

喘面腫身熱瀉白散用桑白皮炒一兩地骨皮

焙一兩甘草炒半兩每服一二錢入粳米百粒

水煎食後溫服桑白皮地骨皮皆能瀉火從小

便去甘草瀉火而緩中粳米清肺而養血此乃

瀉肺諸方之準繩也元醫羅天益言其瀉肺中

伏火而補正氣瀉邪所以補正也若肺虛而小

便利者不宜用之

●老小咳嗽

【仁存堂方】元胡索一兩枯礬二錢半為末每服

二錢軟錫一塊和含之

●老人喘嗽

【普濟方】氣促睡臥不得服此立定胡桃肉去皮

杏仁去皮尖生薑各一兩研膏入煉蜜少許和

丸彈子大每服臥時嚼一丸薑湯下

●心虛嗽血

【證治要訣】沉香末一錢半夏七枚入猪心中以

小便濕紙包煨熟去半夏食之

●喘嗽面浮

【普濟方】並四肢浮者蛤蚧一雌一雄頭尾全者

法酒和蜜塗之炙熟紫團人參似人形者半兩

為末化蠟四兩和作六餅每煮糯米薄粥一盞

投一餅攪化細細熱呷之

●咳逆氣短

【普濟方】紫蘇莖葉二錢人參一錢水一鍾煎服

●喘嗽失音

【古今錄驗】暴傷寒冷喘嗽失音取芫花連根一

虎口切暴乾令病人以薦自裹春令灰飛揚入

其七孔中當眼淚出口鼻皆辣待芫花根盡乃

止病即愈

【余居士方】白果仁四兩白茯苓桑白皮二兩烏

豆半升炒蜜半斤煮熟日乾爲末以乳汁半盃

拌濕九蒸九晒丸如綠豆大每服三五十九白

湯下神效

●喘嗽吸呷

【深師方】久患吸呷咳嗽喉中作聲不得眠取白

前焙搗爲末每溫酒服二錢

【崔行功纂要方】年久呷嗽至三十年者葇荑子

木香薰黃等分爲末以羊脂塗青紙上撒末於

上捲作筒燒烟薰吸之

●積年咳嗽

【聖惠方】呀呷作聲用鱖魚殼半兩貝母煨一兩

桔梗一分牙皂一分去皮酥炙爲末煉蜜丸彈

子大每含一丸嚥汁服三丸即吐出惡涎而瘥

●老人痰氣喘嗽

【發明】時珍曰按韓柔醫通云凡老人苦於痰氣

喘嗽胸滿懶食不可妄投燥利之藥反耗真氣

柔因人求治其親靜中處三子養親湯治之隨

試隨效蓋白芥子白色主痰下氣寬中紫蘇子

紫色主氣定喘止嗽蘿蔔子白種者主食開痞

降氣各微炒研破看所主爲君每劑不過三四

錢用生絹袋盛入煮湯飲之勿煎太過則味苦

辣若大便素實者入蜜一匙冬月加薑一片尤

良南陵末齋子有辭贊之

●歛肺却嗽

【丹溪心法】百藥煎訶黎勒荆芥蕙等分爲末薑

汁入蜜和丸芡子大時時噙之

●補肺丸

【劉禹錫傳信方】治咳嗽用杏仁二大升山中者不用去雙仁者以童子小便二斗浸之春夏七  
日秋冬二七日連皮尖於砂盆中研濾取汁煮  
令魚眼沸候軟如麵糊卽成以粗布攤曝之可  
丸卽丸服之食前後總須三五丸茶酒任下  
忌白水粥

●百祥膏

【本草方】治嗽而吐青綠水又治痘瘡歸腎紫黑  
乾陷不發寒者宜下之不黑者慎勿下紅芽大  
戟不拘多少陰乾漿水煮極軟去骨日乾復納  
原汁盡焙爲末水丸粟米大每服一二十九丸研  
赤脂麻湯下 潔古活法機要棗變百祥丸治  
斑瘡變黑大便閉結用大戟一兩棗三枚水一

盥同煮暴乾去大戟以棗肉焙丸服從少至多

以利爲度

●鹿髓煎

【聖惠方】治肺痿咳嗽傷中脈絕用鹿髓生地黃  
汁各七合酥蜜各一兩杏仁桃仁各三兩去皮  
尖炒酒一升同搗取汁先煎杏仁桃仁地黃汁  
減半入三味煎如稀餳每含一匙嚥下日三服

嘔吐門

●病後嘔逆

【外臺方】天行病後嘔逆食卽反出用青羊肝作  
生淡食不過三度食不出矣

●嘔吐陽厥

【千金方】卒死者飲新汲水三升佳



●乾嘔不息

【肘后方】葛根搗汁服一升瘥

【肘后方】蔗汁温服半升日三次入薑汁更佳

●吐逆不止

【集驗方】碧霞丹用北黃丹四兩米醋半斤煎乾

炭火三秤就銚內煨紅冷定爲末粟米飯丸梧

子大每服七丸醋湯下

【鄭氏小兒方】陰陽丸用硫黃半兩水銀一錢研

墨薑汁糊丸小豆大三歲三丸冷水下大人三

四十九

【外臺方】麻仁杵熬水研取汁着少鹽喫立效李

諫議常用極妙

【瀕湖方】眞火酒一盃新汲井水一杯和服甚妙

【經驗方】不拘男女連日粥飲湯藥不能下者卽

效五靈脂治淨爲末狗膽汁和丸芡子大每服

一丸煎生薑酒磨化猛口熱吞不得漱口急將

温粥少許壓之

●嘔噦不止

【肘后方】厥逆者蘆根三斤切水煮濃汁頻飲二

升必效若以童子小便煮服不過三升愈

【近效方】白油麻一大合清油半斤煎取三合去

麻温服

【兵部手集】醋和麵作彈丸二三十枚以沸湯煮

熟漉出投漿水中待温吞三兩於噦定卽不用

再吞未定至晚再吞

【食醫心鏡】生薑二兩醋漿二合銀器煎取四合

連滓呷之又殺腹內長蟲

●温病冷啗

【龐安常傷寒卒病論】因熱甚飲水成暴冷啗者

茅根切枇杷葉拭去毛炙香各半斤水四升煎

二升去滓稍稍飲之

●温病熱噦

【同上方】乃伏熱在胃令人胸滿則氣逆逆則噦

或大下胃虛冷亦致噦也茅根切葛根切各半

斤水三升煎一升半每温飲一盞噦止即停

●暴得吐逆

【寇氏衍義】不下食生滑石末二錢七温水服仍

以細麵半盞押定

●肺癰得吐

【聖惠方】黃耆二兩爲末每服二錢水一中盞煎

至六分温服日三四服

●食入即吐

【張仲景金匱方】人參半夏湯用人參一兩半夏

一兩五錢生薑十片水一斗以杓揚二百四十

遍取三升入白蜜三合煮一升半分服

【仲景金匱玉函方】胸中有火也大黃一兩甘草

二錢半水一升煮半升温服

●食後喜嘔

【肘后方】鹿角燒末二兩人參一兩爲末薑湯服

方寸七日三服

●口吐清水

【怪證奇方】乾蘄艾煎湯啜之

●嘔逆酸水

【兵部手集】羊屎十枚酒二合煎一合頓服未定

更服之

●嘔吐痰水

【千金方】白檳榔一顆烘熱橘皮二錢半炙爲末

水一盞煎溫服

●胃冷有痰

【奇效良方】脾弱嘔吐生附子半夏各二錢薑十

片水二盞煎七分空心溫服一方並炮熟加木

香五分

【十便良方】氣厥不通母丁香三個陳橘皮一塊

去白焙水煎熱服

●支飲作嘔

【張仲景金匱要略】嘔家本渴不渴者心下有支

飲也或似喘不喘似嘔不嘔似噦不噦心下憤

憤並宜小半夏湯用半夏泡七次一升生薑半

升水七升煮一升五合分服

●虛寒嘔噦

【本草方】飲食不下細辛去葉半兩丁香二錢半

爲末每服一錢柿蒂湯下

●胃弱嘔逆

【普濟方】不食用草豆蔻仁二枚高良薑半兩水

一盞煮取汁入生薑汁半合和白麵作撥刀以

羊肉臙汁煮熟空心食之

●痰壅嘔逆

【聖惠方】心胸滿悶不下飲食厚朴一兩薑汁炙

黃爲末臥時米飲調下二錢七

●卒嘔不止

【千金方】杏蘇濃煮頓服三升良

【肘后方】粳米粉井華水服之良

●乾嘔脅痛

【仲景傷寒論】傷寒有時頭痛心下痞滿痛引兩

脅乾嘔短氣汗出不惡寒者表解裏未和也十

棗湯主之芫花熬甘遂大戟各等分爲散以大

棗十枚水一升半煮取八合去滓納藥強人服

一錢羸人半錢平旦服之當下利病除如不除

明旦更服

●嘔噦眩悸

【金匱要略】穀不得下半夏加茯苓湯半夏一升

生薑半斤茯苓三兩以水七升煎一升半分溫

服之

●嘔逆厥逆

【外臺祕方】內有寒痰半夏一升洗滑焙研小麥

麩一升水和作彈丸水煮熟初吞四五枚日三

服稍增至五十枚旋吞覺病減再作忌羊肉錫

糖此乃許仁則方也

【本草方】頻嚼生薑嘔家聖藥也

●嘔吐反胃

【金匱要略】大半夏湯半夏三升人參三兩白蜜

一升水一斗二升和揚之一百二十遍煮取三

升半溫服一升日再服亦治膈間支飲

●上氣嘔吐

【千金方】芥子末蜜丸梧子大井華水寅時下七

丸申時再服

●心痞嘔噦

【千金方】心下痞堅生薑八兩水三升煮一升半

夏五合洗水五升煮一升取汁同煮一升半分

再服

●頭暈吐逆

【傳信適用方】胃冷生痰也用川乾薑炮二錢半

甘草炒一錢二分水一鍾半煎減半服累用有效

●嘔吐胸滿

【仲景方】吳茱萸湯用茱萸一升棗二十枚生薑一大兩人參一兩以水五升煎取三升每服七合日三服

●嘔哕厥逆

【肘后方】蓼萸藤煎汁呷之

●嘔逆不食

【廣濟方】訶黎勒皮二兩炒研糊丸梧子大空心湯服二十九日三服

●嘔吐不藥

【發明】頌曰戴元禮云凡人嘔吐服藥不納者必有虻在膈間虻聞藥則動動則藥出而虻不出

但於嘔吐藥中加炒川椒十粒良蓋虻見椒則頭伏也觀此則張仲景治虻厥烏梅丸中用蜀椒亦此義也許叔微云大凡腎氣上逆須以川椒引之歸經則安

●腎氣上噦

【孫氏仁存方】腎氣自腹中起上築于咽喉逆氣連屬而不能出或至數十聲上下不得喘息此由寒傷胃腕腎虛氣逆上乘于胃與氣相併難經謂之噦素問云病深者其聲噦宜服此方如不止灸期門關元腎俞穴用吳茱萸醋炒熱橘皮附子去皮各一兩爲末麪糊丸梧子大每薑湯下七十九

●諸藥引吐

【發明】時珍曰噦逆用吐藥亦反胃用吐法去痰

積之義也吐藥不一常山吐瘧痰瓜蒂吐熱痰  
烏附尖吐濕痰萊菔子吐氣痰藜蘆則吐風痰  
者也按張子和儒門事親云一婦人病瘋癩自  
六七年得驚風後每一二年一作至五七年五  
七作三十歲至四十歲則日作或甚至一日十  
餘作遂昏痴健忘求死而已值歲大飢采百草  
食於野中見草若葱狀采歸蒸熟飽食至五更  
忽覺心中不安吐涎如膠連日不止約一二斗  
汗出如洗甚昏困三日後遂輕健病去食進百  
脈皆和以所食葱訪人乃葱葱苗也即本草藜  
蘆是矣圖經言能吐風病此亦偶得吐法耳

●諸病應吐論

【發明】張機曰病如桂枝證頭不痛項不強寸脈  
微浮胸中痞硬氣上衝咽喉不得息者此為胸

中有寒也當吐之太陽中暈身熱頭痛而脈微  
弱此夏月傷冷水水行皮中也宜吐之少陽病  
頭痛發寒熱脈緊不大是膈上有痰也宜吐之  
病胸中諸實鬱鬱而痛不能食欲人按之而反  
有濁唾下利日十餘行寸口脈微弦者當吐之  
慎懷煩躁不得眠未經汗下者謂之實煩當吐  
之宿食在上腕者當吐之並宜以瓜蒂散主之  
惟諸亡血虛家不可與瓜蒂散也

翻胃門

●反胃結腸

【發明】時珍曰劉綽治例云反胃結腸甚者難治  
常食兔肉則便自行又可證其性之寒利矣

●翻胃吐食



【千金翼】男婦皆治白善土煨赤以米醋一升淬之再煨再淬醋乾爲度取一兩研乾薑二錢半炮爲末每服一錢調下服至一斤以止爲妙

【邵真人經驗方】地龍糞一兩木香三錢大黃七錢爲末每服五錢無根水調服忌煎燻酒醋椒薑熱物一二服其效如神

【主治時珍方】性涼主反胃吐食取螺螄一斗水浸取泥晒乾每服一錢火酒調下

【百一選方】竈中土年久者爲末米飲服三錢經  
驗

【集簡方】梁上塵黑驪尿調服之

【聖濟錄】氣逆者胃虛用鉛丹二兩白礬二兩生石亭脂半兩以丹礬研勻入坩鍋以炭半秤煨赤更養一夜出毒兩日入亭脂同研粟米飯和

丸綠豆大每日米飲下十五丸

【聖濟錄】水不能停黑鉛水銀各一錢半結砂舶硫黃五錢官桂一錢爲末每服六錢一半米湯一半自然薑汁調作一處服

【聖濟錄】雌黃一分甘草生半分爲末飯丸梧子大以五葉草糯米煎湯每服四丸

【聖惠方】絕好赤石脂爲末蜜丸梧子大每空心薑湯下一二十九丸先以巴豆仁一枚勿令破以津吞之後乃服藥

【普濟方】白礬硫黃各二兩銚內燒過入硃砂一分爲末麵糊丸小豆大每薑湯下十五丸 又方白礬枯三兩蒸餅丸梧子大每空心米飲服十五丸

【醫方摘要】白麵二斤半蒸作大饅頭一個頭上

開口痢空將皂礬填滿以新瓦圍住鹽泥封固  
挖土窰安放文武火燒一日夜取出研末棗肉  
爲丸梧子大每服二十九空心酒湯任下忌酒  
色

【李絳兵部手集】飲食入口卽吐困弱無力垂死  
者上黨人參三大兩拍破水一大升煮取四合  
熱服日再兼以人參汁入粟米雞子白薤白煮  
粥與噉李直方司勳於漢南患此兩月餘諸方  
不瘥遂與此方當時便定後十餘日遂入京師  
絳每與名醫論此藥難可爲儔也

【百一選方】火杵草焙爲末蜜丸梧子大每沸湯  
下五十九

【丹溪纂要】馬炮兒燈上燒存性一錢入好棗肉  
平胃散末二錢酒服食卽可下卽野甜瓜北方

多有之

【心鏡方】脾胃氣弱食不消化湯飲不下用粟米  
半升杵粉水丸梧子大七枚煮熟入少鹽空心  
和汁吞下或云納醋中吞之得下便已

【圖經方】罌粟粥用白罌粟米三合人參末三大  
錢生山芋五寸細切研三物以水二升三合煮  
取六合入生薑汁及鹽花少許和勻分服不計  
早晚亦不妨別服湯丸

【千金方】芥子末酒服方寸七日三服  
【本草方】大棗一枚去核用斑蝥一枚去頭翅入  
在內煨熟去蝥空食之白湯下良

【山居四要】棠梨葉油炒去刺爲末每旦酒服一

錢

【發明】經驗方云有人三世死于反胃病至孫得

一方用乾柿餅同乾飯日日食之絕不用水飲如法食之其病遂愈此又一徵也

【本草方】乾柿三枚連蒂搗爛酒服甚效切勿以他藥雜之

【直指方】真橘皮以日照西壁土炒香爲末每服

二錢生薑三片棗肉一枚水二鍾煎一鍾溫服

【戴原禮方】用胡椒醋浸日乾如此七次爲末酒

糊丸梧子大每服三四十九醋湯下

【聖惠方】用胡椒七錢半煨薑一兩水煎分二服

【是齋百一方】用胡椒半夏湯炮等分爲末薑汁

糊丸梧子大每薑湯下三十九

【永類鈴方】吐出黑汁治不愈者用畢登茄爲末

米糊丸梧子大每薑湯下三四十九日一服愈

後服平胃散三百帖

【梅師方】朝食暮吐暮食朝吐旋旋吐者用甘蔗汁七升生薑汁一升和勻日日細呷之

【直指方】石蓮肉爲末入少肉豆蔻末米湯調服之

【百一方】松節煎酒細飲之

【袖珍方】用母丁香一兩爲末以鹽梅入搗和丸

芡子大每嚙一丸

【聖惠方】用母丁香神麴炒等分爲末米飲服一

錢

【袖珍方】千葉百槿花陰乾爲末陳糯米湯調送

三五口不轉再服

【衛生易簡方】干槌花一枚燒研酒服

【惠濟方】蠶繭十個煮汁烹雞子三枚食之以無

灰酒下日二服神效或以線絲湯煮粟米粥食

之

【壽域方】用鯉魚一頭童便浸一夜炮焦研末同

米煮粥食之

【本事方】用大鱖魚一尾去腸留鱗入綠礬末令

滿泥固煨存性研末每米飲服一錢日二

【救急良方】用真正蛤粉每服稱過二錢搗生薑

汁一盞再入米醋同調送下

【百一方】用黃蜆殼並田螺殼并取久在泥中者

各等分炒成白灰每二錢入白梅肉四個搗和

為丸再入砂盒子內蓋定泥固煨存性研細末

每服二錢用人參縮砂湯調下不然用陳米飲

調服亦可凡覺心腹脹痛將發反胃即以此藥

治之

【本草方】用烏雄雞一隻治如食法入胡荽子半

斤在腹內烹食二隻愈

【主治時珍方】反胃以反毛雞一隻煮爛去骨入

人參當歸食鹽各半兩再同煮爛食之至盡

【千金方】雞臙脰一具燒存性酒調服男用雌女

用雄

【證治發明】以烏骨雞一隻與水飲四五日勿與

食將五蒲蛇二條竹刀切與食待雞下糞取陰

乾為末水丸粟米大每服一分桃仁湯下五七

服即愈

【本草方】不拘丈夫婦人老少遠年近日用五靈

脂末黃狗膽汁和丸龍眼大每服一丸好酒半

盞磨化服不過三服即效

【聖惠方】羊糞五錢童子小便一大盞煎六分去

滓分三服

【主治保壽堂方】反胃吐食取生虎肚勿洗存滓  
穢新瓦固煨存性入平胃散末一兩和勻每白  
湯服三錢神效

【壽域神方】一切反胃虎脂半斤切清油一斤瓦  
瓶浸一月密封勿令洩氣每以油一兩入無灰  
酒一盞溫服以瘥爲度油盡再添

【發明】時珍曰劉純治例云反胃結腸甚者難治  
常食兔肉則便自行又可證其性之寒利矣

【普濟方】鴉皮燒灰酒服或煮汁或五味淹炙食  
●多年反胃

【聖濟方】不止紫背鉛二兩石亭脂二兩鹽鹵汁  
五兩燒鉛以鹵汁淬盡與亭脂同炒焰起挑於  
水上焰止研勻蒸餅和丸梧子大每服二十九  
煎石蓮乾柿湯下

●脾虛吐食

【心鏡】羊肉半斤作生以蒜薤醬豉五味和拌空  
腹服食之

●脾虛反胃

【濟生方】白豆蔻縮砂仁各二兩丁香一兩陳廩  
米一升黃土炒焦去土研細薑汁和丸梧子大  
每服百丸薑湯下名太倉丸

●反胃上氣

【聖濟總錄】食入卽吐茅根二兩水四升煮二升  
頓服得下良

【千金方】蘆根茅根各二兩水四升煮二升分服  
【普濟方】白芥子末酒服一二錢

●心下堅如盤

【發明】好古曰張仲景治心下堅大如盤水飲所

作枳實白朮湯用枳實七枚白朮三兩水一斗煎服

●嘔吐反胃

【發明】時珍曰按繼洪澹寮方云甘露湯即乾餾糟治反胃嘔吐不止服此利胸膈養脾胃進飲食用乾餾糟六兩生薑四兩二味同搗作餅或焙或晒入炙甘草二兩鹽少許點湯服之常熟一富人病反胃往京口甘露寺設水陸泊舟岸下夢一僧持湯一杯與之飲罷便覺胸快次早入寺供湯者乃夢中所見僧常以此湯待賓故易名曰甘露湯予在臨汀療一小吏旋愈切勿忽之

【聖惠方】乾棗葉一兩藿香半兩丁香二錢半每服二錢薑三片水一盞煎服

【聖惠方】枇杷葉去毛炙丁香各一兩人參二兩每服三錢水一盞薑三片煎服

●反胃惡心

【聖濟總錄】藥食不下京三稜炮一兩半丁香三分為末每服一錢沸湯點服

●久冷反胃

【經驗方】用大附子一個生薑一兩剉細同煮研如麵糊每米飲化服一錢

【衛生家寶方】用薑汁打糊和附子末為丸大黃為衣每溫水服十丸

【斗門方】用長大附子一個坐於磚上四面着火漸逼以生薑自然汁淬之依前再逼再淬約薑汁盡半碗乃止研末每服一錢粟米飲下不過三服瘥或以豬腰子切片炙熟蘸食



【方便集】用大附子一個切下頭子剝一竅安丁香四十九個在內仍合定線紮入砂鍋內以薑汁浸過文火熬乾爲末每挑少許置掌心舐吃日十數次忌毒物生冷

●反胃膈氣

【普濟方】不下食者太倉散用倉米或白米日晒時以水微拌濕自想日氣如在米中次日晒乾袋盛掛風處每以一撮水煎和汁飲之即時便下

又方陳倉米炊飯焙研每五兩入沉香末半兩和勻每米飲服二三錢

【丹溪摘元】地塘蟲卽壁虎也七個砂鍋炒焦木香人參硃砂各一錢半乳香一錢爲末蜜丸梧子大每服七丸木香湯下早晚各一服

【楊氏頤真堂方】丁丹崔祖傳狗寶丸用硫黃水銀各一錢同炒成金色入狗寶三錢爲末以雞卵一枚去白留黃和藥攪勻紙封泥固塘火煨半日取出研細每服五分燒酒調服不過三服見效

●虛寒反胃

【和劑局方】養食丸治脾胃俱虛不能消化水穀胸膈痞悶腹脇膨脹連年累月食減嗜臥口無味神麪六兩麥蘖炒三兩乾薑炮四兩烏梅肉焙四兩爲末蜜丸梧子大每米飲服五十九日三服

【外臺方】虛冷反胃羊肉去脂作生以蒜薤空腹食之立效

●反胃噎疾

【普濟方】蘿蔔蜜煎浸細細嚼嚥良

【經驗方】田螺洗淨水養待吐出泥澄取晒半乾

丸梧子大每服三十九菴香湯下爛殼研服亦

可

●反胃羸弱

【兵部手集】用母薑二斤搗汁作粥食

【傳信適用方】用生薑切片麻油煎過為末軟棉

蘸末嚼嚥

●反胃咳嗽

【普濟方】生薑四兩搗爛入藷香葉一兩椒末一

錢鹽和麵四兩裹作燒餅煨熟空心吃不過兩

三度效反胃入甘蔗汁和之

●反胃吐痰

【活人心統】柳樹葦五七個煎湯服即愈

●反胃轉食

【總錄】藥物不下用大雪梨一個以丁香十五粒

刺入梨內濕紙包四五重煨熟食之

●反胃關格

【德生堂經驗方】氣噎不通丁香木通各一兩每

服四錢水一盞半煎一盞先以黃泥做成盃瀝

藥汁于內食前服此方乃椽史吳安之傳于都

事蓋耘夫有效試之果然土盃取其助脾也

●反胃止瀉

【斗門方】厚朴薑汁炙焦黑為末以陳米飲調服

二錢七日三服

●反胃噎膈

【發明】時珍曰有一貧叟病噎膈食入即吐胸中

刺痛或令取韭汁入鹽梅鹵汁少許細呷得入

漸加忽吐稠涎數斤而愈

●血風反胃

【婦人良方】香白芷一兩切片瓦炒黃為末用猪

肚七片沸湯炮七次蘸末食之日一次

●朝食暮吐

【摘元方】丁香十五個研末甘蔗汁和九蓮子大

噉嚙之

●胃熱吐食

【衛生家寶方】清膈散用蟬蛻五十個去泥滑石

一兩為末每服二錢水一盞入蜜調服

噎膈門

●老人噎食

【養老書】黃雌雞肉四兩切茯苓二兩白麵六兩

作餛飩入豉汁煮食三五服效

●噎疾

【壽域方】古塚內罐器中水但飲之即愈極有神

效

●噎膈反胃

【本事方】鄧才清與用北庭砂二錢水和蕎麥麵

包之煨焦待冷取中間溼者焙乾一錢入檳榔

二錢丁香二枚研勻每服七厘燒酒送下日三

服愈即止後吃白粥半月仍服助胃丸藥 孫

天仁集效方用北庭砂二兩一兩用人言末一

兩同入罐內文武火升三炷香取出燈盞上末

一兩以黃丹末一兩同入罐內如上法升過取

末用桑灰霜一兩研勻每服三分燒酒下愈即

止 又方平胃散各一錢入礪砂生薑各五分

為末沸湯點服二錢當吐出黑物如石屢驗

【集成方】用糯米末以牛涎拌作小丸煮熟食

危氏得效香牛飲用牛涎一盞入麝香少許銀

盞燉熱先以帛緊束胃腕令氣喘解開乘熱飲

之仍以丁香汁入粥與食 普濟千疔丹用牛

涎好蜜各半斤木鱉仁三十個研末入銅器熬

稠每以兩匙和粥與食日三服

【發明】震亨曰一婦病噎用四物加驢尿與服以

防其生蟲數十帖而愈時珍曰張文仲備急方

言幼年患反胃每食羹粥諸物須臾吐出真觀

中許奉御兄弟及柴蔣諸名醫奉勅調治竟不

能療漸疲困候絕旦夕忽一衛士云服驢小便

極驗遂服二合後食止吐一半晡時再服二合

食粥便定次日奏知則宮中五六人患反胃者

同服一時俱瘥此物稍有有毒服時不可過多須

熱飲之病深者七日當效後用屢驗

【醫方摘要】秋石每用一錢白湯下妙

【永類鈴方】諸藥不效真阿魏一錢野外乾人尿

三錢為末五更以薑片蘸食能起死人乃趙王

困方也

●噎食膈氣

【孫氏集效方】馬蹄香四兩為末好酒三升熬膏

每服二匙好酒調下日三服

【怪病奇方】甘遂麵煨五錢南木香一錢為末壯

者一錢弱者五分水酒調下

●卒然食噎

【食醫心鏡】橘皮一兩湯浸去瓢焙為末以水一

大盞煎半盞熱服

●噎膈拒食

【楊起簡便方】端午采頭次紅花無灰酒拌焙乾血竭瓜子樣者等分爲末無灰酒一盞隔湯燉熱徐嚥初服二分次日四分三日五分

【發明】時珍曰范曄後漢書云華佗見一人病噎食不得下令取餅店家蒜齏大可二升飲之立吐小蛇病者懸蛇於車造佗家見壁北懸蛇數十乃知其奇

●噎膈不食

【永類鈴方】黃犬乾餓數日用生粟或米乾飼之俟其下糞淘洗米粟令淨煮粥入薤白一握泡熟去薤入沉香末二錢食之

●食哽

【外臺方】鷹糞燒灰水服方寸七

●膈氣噎塞

【唐璠經驗方】成靈仙一把醋蜜各半盃煎五分服之吐出宿痰愈

【聖惠方】飲食不下用確嘴上細糠蜜丸彈子大時時含嚥津液

●膈氣疼痛

【孫氏方】白玉散用壁上陳白螺螄燒研每服一錢酒下甚效

●噎食

【海上方】蕎麥稽燒灰淋汁入鍋內煎取白霜一錢入蓬砂一錢研末每酒服半錢

【摘元妙方】赤稻細稍燒灰滾湯一碗隔絹淋汁三次取汁入丁香一枚白豆蔻半枚米一盞煮粥食神效

【本草方】白鵝毛尾燒灰米湯每服一錢

【壽域神方】取鵬雛未生毛者一對用黃泥固濟

煨存性爲末每服一匙以溫酒服

【杏林摘要】數月不愈者用狗寶爲末每服一分

以威靈仙二兩鹽二錢搗如泥將水一鍾攪勻

去滓調服日二不過三日愈後服補劑

●五噎膈氣

【扶壽精方】阿魏五錢五靈脂炒煙盡五錢爲末

以黃雄狗膽汁和丸黍米大空心唾津送下三

十九忌羊肉醋麵

【集簡方】生桑寄生搗汁一盞服之

●噎膈不利

【寇氏本草衍義】疏風壅涎唾牛蒡子微炒荆芥

穗一兩炙甘草半兩爲末食後湯服二錢當緩

緩取效

【本草方】用蛇含蝦蟆泥包燒存性研末米飲服

●五噎吐逆

【金匱玉函方】心膈氣滯煩悶不下食蘆根五兩

剉以水三大盞煮取二盞去滓溫服

●膈氣吐食

【孫氏集效方】用地牛兒二個推屎蟲一公一母

同入罐中待蟲食盡牛兒以泥裹煨存性用去

白陳皮二錢以巴豆同炒過去豆將陳皮及及

蟲爲水每用一二分吹入咽中吐痰三四次即

愈

【經驗方】用大鯽魚去腸留鱗切大蒜片填滿紙

包十重泥封晒半乾炭火煨熟取肉和平胃散

末一兩杵丸梧子大蜜收每服三十九米飲下

●噎塞不通

【生生編】寡婦木梳一枚燒灰煎鎖匙婦調下二錢

【本草方】雞嗑二枚連食以濕紙包黃泥固煨存性為末入木香沉香丁香末各一錢棗肉和丸梧子大每米汁下三丸

【外臺方】羚羊角屑為末飲服方寸匕並以角磨噎上

●噎不下食

【發明】時珍曰按廣五行記云唐永徽中絳州一僧病噎不下食數年臨終命其徒曰吾死後可開我胸喉視有何物苦我如此及死其徒依命開視胸中得一物形似魚而有兩頭遍體悉似肉鱗安鉢中跳躍不已戲投諸味雖不見食皆

化為水又投諸毒物亦借消化一僧方作藍澱

因以少澱投之即怖懼奔走須臾化成水世傳澱水能治噎疾蓋本於此今方上或以染缸水飲治噎膈皆取其殺蟲也

【廣利方】取崖蜜含微微嚙下

【海上名方】人屎入蘿蔔內火煉三炷香取研每服三分黃酒下三服效

惡心門

●胃虛惡心

【簡便方】或嘔吐有痰人參一兩水二盞煎一盞入竹瀝一盞薑汁三匙食遠溫服以知為度老人尤宜

●胃冷惡心



【張文仲備急方】凡食即欲吐用白豆蔻子三枚

搗細好酒一盞溫服并飲數服佳

●人忽惡心

【肘后方】多嚼白豆蔻子最佳

●冷痰惡心

【聖惠方】藜苳一兩為末食前用米湯服半錢

### 吞酸嘈雜門

●胃冷口酸

【余居士選奇方】流清水心下連臍痛用藜苳半

兩厚朴薑汁浸炙一兩為末入熟鯽魚肉研和

丸綠豆大每米飲下二十九立效

【發明】汪穎曰魚膾辛辣有却病之功予在蒼梧

見一婦人病吞酸諸藥不效偶食魚膾其疾遂

愈蓋此意也

●嘈雜吐水

【怪證奇方】真橘皮去白為末五更安五分於掌

心舐之即睡三日必效皮不真則不驗

●食物醋心

【傳信適用方】胡桃爛嚼以生薑湯下立止

●醋心吐水

【梅師方】檳榔四兩橘皮一兩為末每服方寸七

空心生薑湯調下

●醋心上攻

【經心錄】如濃酸用茱萸一合水三盞煎七分頓

服之近有人心如蜚破服此二十年不發也累

用有效

●食已吞酸

【聖惠方】胃氣虛冷者吳茱萸湯泡七次焙乾薑泡等分爲末湯服一錢

● 噎吐酸漿

【普濟方】漿水煎頭垢豆許服一盞效

古今醫驗方類編卷五終

# 古今名醫驗方類編目錄

## 卷六 通治部

### 呃逆門

咳逆打呃	一
嘔逆欲死	一
胃寒呃逆	一
暴逆氣上	一
諸氣呃逆	一
傷寒呃逆	一
呃逆不止	一
胃冷久呃	一
陰症呃逆	一
呃因痰怒	一
病後呃逆	一
嘔逆厥逆	一
痞滿門	一
心腹煩滿	一

心下有水	二
胸滿痞痛	二
飲水停滯	二
腹中痞積	二
癰痞腹脹	二
傷寒痞滿	二
膈間支飲	三
支飲苦冒	三
痞症發熱	三
冷痰痞滿	三
嘔吐胸滿	三
下早成痞	三
痞塊疝積	三
腹中冷痞	三
老人膈痞	三
治中湯	三
枳朮丸	三

枳朮湯	四
寬中丸	四
香橙湯	四
快膈湯	四
哮喘門	四
傷水喘急	四
哮喘有聲	四
痰喘哮喘	四
喘急欲死	五
陽虛氣喘	五
上氣喘息	五
定喘下氣	五
肺虛喘息	五
肺濕痰喘	五
肺壅喘急	五
肺熱氣喘	五
風痰喘逆	五

胸喘咳嗽.....五

痰喘氣急.....六

寒痰哮喘.....六

諸喘不止.....六

痰氣喘急.....六

高年氣喘.....六

肺風喘促.....六

喘促浮腫.....六

哮喘不止.....六

年深哮喘.....六

鹽哮痰喘.....六

失血門

九竅出血.....六

衄血不止.....七

吐血不止.....九

諸般吐血.....一

虛勞吐血.....一

陽虛吐血.....一

吐血損肺.....一

勞心吐血.....一

積熱吐血.....二

中蠱吐血.....二

吐血刺痛.....二

肺疽吐血.....二

吐血燥渴.....二

吐血不定.....二

老幼吐血.....二

肺病吐血.....二

卒然吐血.....二

心熱吐血.....二

吐血喘嗽.....二

氣鬱吐血.....二

吐血瘀聚.....三

鼻血時作.....三

衄血一月.....三

大衄久衄.....三

少小鼻衄.....三

舌衄出血.....三

病後常衄.....三

傷寒衄血.....三

膽熱衄蟻.....三

鼻衄頭痛.....三

肺壅鼻衄.....四

肺熱血衄.....四

鼻衄眩冒.....四

口鼻出血.....四

齒縫衄血.....四

肺損嘔血.....四

嘔血吐痰.....四

嘔血熱極.....四

嘔血不止.....四

憂恚嘔血.....四

肺癰咯血.....四

肺熱咯血.....四

肺病咯血.....四

肺痿咯血.....四

下血瀉血.....五

下血年久.....五

下血數升.....六

脾濕下血.....六

瀉血萎黃	一六
暴下血病	一六
中蠱下血	一六
結陰下血	一六
陽毒下血	一六
蟲痢下血	一七
下血脫肛	一七
熱毒下血	一七
下血虛寒	一七
酒積下血	一七
漏血欲死	一七
陰虛尿血	一七
大小便血	一七
衄血吐血	一七
衄血咯血	一八
吐血鼻洪	一八
吐血嗽血	一八
吐血嘔血	一八
咯血唾血	一八
吐血咯血	一八

吐血痔血	一九
皮膚血澱	一九
吐血便血	一九
吐血瀉血	一九
血汗不止	一九
失血眩暈	一九
血症黃腫	一九
肺破出血	一九
男女病血	一九
男女血虛	二〇
上下諸血	二〇
花藥石散	二〇
地黃煎	二〇

[Faint, illegible text in vertical columns, likely bleed-through from the reverse side of the page]



古今名醫驗方類編卷六

通治部

呃逆門

一盞薑七片煎服

●暴逆氣上

【寇氏衍義】嚼薑兩三片屢效

●諸氣呃逆

【孫尚藥方】橘皮二兩去瓢水一升煎五合頓服

或加枳殼尤良

●傷寒呃逆

【醫林集要】聲聞四鄰四花青皮全者研末每服

二錢白湯下

【本事方】枳殼半兩木香一錢為末每白湯服一

錢未止再服

●呃逆不止

●咳逆打呃

【醫方摘要】硫黃燒煙嗅之立止

●噦逆欲死

【金匱要略】半夏生薑湯主之

【蘇頌圖經】石蓮肉六枚炒赤黃色研末冷熱水

半盞和服便止

●胃寒呃逆

【和劑局方】停痰留飲藿香半夏湯用半夏湯泡

炒黃二兩藿香葉一兩丁香半兩每服四錢水

【發明】時珍曰欬逆者氣自臍下衝脈直上至咽

膈作呃忒蹇逆之聲也朱肱南陽書以噦為欬

逆王履湖洄集以欬嗽為欬逆皆誤矣噦者乾

嘔有聲也欬逆有傷寒吐下後及久病產後老

人虛人陰氣大虧陽氣暴逆自下焦逆至上焦

而不能出者有傷寒失下及平人痰氣抑遏而

然者當視其虛實陰陽或溫或補或泄熱或降

氣或吐或下可也古方單用柿蒂煮汁飲之取

其苦溫能降逆氣也濟生柿蒂散加以丁香生

薑之辛熱以開痰散鬱蓋從治之法而昔人亦

常用之收效矣

【濟生方】柿蒂散治欬逆胸滿用柿蒂丁香各二

錢生薑五片水煎服或為末白湯服 潔古加

人參一錢治虛人欬逆 三因加良薑甘草等

分 衛生寶鑑加青皮陳皮 王氏易簡加半

夏生薑

【醫方摘要】荔枝七個連皮核燒存性為末白湯

調下立止

【經驗方】川椒四兩炒研麪糊丸梧子大每服十

丸醋湯下神效

【醫方摘要】黃蠟燒煙薰二三次即止

●胃冷久呃

【活人心鏡】沉香紫蘇白豆蔻仁各一錢為末每

柿蒂湯服五七分

●陰症呃逆

【傷寒蘊要】乳香同硫黃燒煙嗅之

●呃因痰怒

【發明】震亨曰一女子性躁味厚暑月因怒而病

呃每作則舉身跳動昏冒不知人其形氣俱實  
乃痰因怒鬱氣不得降非吐不可遂以人參蘆  
半兩逆流水一盞半煎一大盃飲之吐頑痰數  
盃大汗昏睡一日而安

●病後呃逆

【發明】時珍曰刀豆本草失載惟近時小書載其  
暖而補元陽也又有人病後呃逆不止聲聞四  
鄰或令取刀豆子燒存性白湯調服二錢卽止  
此亦取其下氣歸元而逆自止也

●嘔逆厥逆

【外臺祕要】內有寒痰半夏一升洗滑焙研小麥  
麩一升水和作丸彈子大水煮熟初吞四五枚  
日三服稍增至十五枚旋煮旋吞覺病減再作  
忌羊肉錫糖此乃許仁則方也

痞滿門

●心腹煩滿

【肘后方】及胸脇痛欲死者比輪古錢二十枚水  
五升煮三升分三服

【千金方】短氣用草豆蔻一兩去皮爲末以木瓜  
生薑湯調服半錢

●心下有水

【梅師方】白朮三兩澤瀉五兩水三升煎一升半  
分三服

●胸滿痞痛

【南陽活人書】桔梗枳殼等分水二鍾煎一鍾溫  
服

【聖濟總錄】口乾肌瘦食減或時壯熱石三稜京

三稜雞爪三稜並泡蓬莖莖三枚檳榔一枚青

橘皮五十斤醋浸去白陳倉米一合醋浸淘過

巴豆五十個去皮同青皮倉米炒乾去豆爲末

糊丸綠豆大每米飲下三九日一服

●飲水停滯

【肘后方】大熱行極及食熱餅後飲冷水過多不

消停滯在胸不利呼吸喘息者杜衡三分瓜蒂

二分人參一分爲末湯服一錢日二服取吐爲

度

●腹中痞積

【劉松石保壽堂方】水荳花或子一盃以水三盃

用桑柴文武火煎成膏量痞大小攤貼仍以酒

調膏服忌腥葷油膩之物

【外臺祕要】大黃十兩爲散醋三升蜜兩匙和煎

九梧子大每服二十九生薑湯下吐利爲度

●癰痞腹脹

【蘭氏經驗方】及堅硬如盃碗者用水荳花子一

升另研獨顆蒜三十個去皮新狗腦一個皮硝

四兩石臼搗爛攤在患處上用油紙以長帛束

之酉時貼之次日辰時取之未效再貼二三次

倘有膿潰勿怪仍看虛實日逐間服錢氏白餅

子紫霜丸場氣丸消積丸利之磨之服之半月

甚者一月無不瘥矣以喘滿者爲實不喘者爲

虛

●傷寒痞滿

【仲景傷寒論】病發於陰而反下之心下滿而不

痛按之濡此爲痞也大黃黃連瀉心湯主之大

黃二兩黃連一兩以麻沸湯二升漬之須臾絞

汁分作二次温服

● 膈間支飲

【張仲景方】其人喘滿心下痞堅面黎黑其脈沉

緊得之數十日醫吐下之不愈木防己湯主之

虛者即愈實者三日復與之不愈去石膏加茯

苓芒硝主之用木防己三兩人參四兩桂枝二

兩石膏雞子大十二枚水六升煮二升分服

● 支飲苦胃

【仲景澤瀉湯】用澤瀉五兩白朮二兩水二升煮

一升分二服 深師方先以水二升煮二物取

一升又以水一升煮澤瀉取五合二汁分再服

病甚欲眩者服之必瘥

● 痞症發熱

【普濟方】盜汗胸背疼痛甘遂麪包漿水煮十沸

去麪以細糠火炒黃爲末大人三錢小兒一錢

冷蜜水臥時服忌油膩魚肉

● 冷痰痞滿

【普濟方】黑芥子白芥子大戟甘遂胡椒桂心等

分爲末糊丸梧子大每服十九薑湯下名黑芥

丸

● 嘔吐胸滿

【仲景方】吳茱萸湯用茱萸一升棗二十枚生薑

一大兩人參一兩以水五升煎取三升每服七

合日三服

● 下早成痞

【宣明方】傷寒陰症下早成痞心下滿而不痛按

之虛軟枳殼檳榔等分爲末每服三錢黃連湯

調下

●痞塊疳積

【簡便方】五靈脂炒煙盡真阿魏去砂研等分用

黃雄狗膽汁和丸黍米大空心津嚥三十九忌

羊肉醋麪

●腹中冷癖

【肘后方】水穀癥結心下停痰兩脅痞滿按之鳴

轉逆害飲食大蟾蜍一枚去皮腸支解之芒硝

強人一升中人七合弱人五合水七升煮四升

頓服得下為度

●老人膈痞

【多能鄙事】不下飲食用羊肉四兩切白麪六兩

橘皮末一分薑汁搜如常法入五味作臠食每

日一次大效

●治中湯

【和劑局方】頌曰張仲景治胸痺心中痞堅留氣

結胸胸滿脅下逆氣搶心治中湯主之即理中

湯人參白朮乾薑甘草各三兩四味以水八升

煮三升每服一升日三服隨證加減此方自晉

宋以後至唐名醫治心腹病者無不用之或作

湯或蜜丸或為散皆有奇效胡洽居士治霍亂

謂之溫中湯陶隱居百一方云霍亂餘藥乃或

難求而治中方四順湯厚朴湯不可暫缺常須

預合自隨也唐石泉公王方慶云數方不惟霍

亂可醫諸病皆療也四順湯用人參甘草乾薑

附子炮各二兩水六升煎二升半分四服

●枳朮丸

【潔古家珍】消痞強胃久服令人食自不停也白

朮一兩黃壁土炒過去土枳實麩炒去麩一兩

爲末荷葉包飯燒熟搗和丸梧子大每服五十丸白湯下氣滯加橘皮一兩有火加黃連一兩有痰加半夏一兩有寒加乾薑五錢木香三錢有食加神曲麥蘖各五錢

●枳朮湯

【仲景金匱玉函】心下堅大如盤邊如旋盃水飲所作寒氣不足則手足厥逆腹滿脇鳴相逐陽氣不通卽水冷陰氣不通卽骨疼陽前通則惡寒陰前通則痺不仁陰陽相得其氣乃行大氣一轉其氣乃散實則失氣虛則遺尿名曰氣分宜此主之白朮一兩枳實七個水五升煮三升分三服胸中軟卽散

●寬中丸

【指迷方】治脾氣不和冷氣客於中壅遏不通是

爲脹滿用橘皮四兩白朮二兩爲末酒糊丸梧子大每食前木香湯下三十九日三服

●香橙湯

【奇效良方】寬中快氣消酒用橙皮二斤切片生薑五兩切焙搗爛入炙甘草末一兩檀香末半兩和作小餅每嚼一餅沸湯入鹽送下

●快膈湯

【本草方】治冷膈氣及酒食後飽滿用青橘皮一斤作四分四兩用鹽湯浸四兩用白沸湯浸四兩用醋浸四兩用酒浸各三日取出去白切絲以鹽一兩炒微焦研末每用二錢以茶末五分水煎溫服亦可點服

哮喘門



●傷水喘急

【仁存方】因年少飲冷水驚恐所致者古文錢七

枚洗淨白枚七個水一鍾同浸三宿空心一呷

良久得吐效

●哮喘有聲

【普濟方】臥睡不得土朱末米醋調時時進一二

服

●痰喘哮喘

【普濟方】馬蹄香焙研每服二三錢正發時淡醋

調下少頃吐出痰涎爲驗

【皆效方】凡天雨便發坐臥不得飲食不進乃肺

竅久積冷痰遇陰氣觸動則發也用此一服卽

愈服至七八次卽出惡痰數升藥性亦隨痰而

出卽斷根矣用江西淡豆豉一兩蒸搗如泥入

砒霜末一錢枯白礬三錢丸綠豆大每用冷茶

冷水送下七丸甚者九丸小兒五丸卽高枕仰

臥忌食熱物等

【醫學集成】遇厚味卽發者蘿蔔子淘淨蒸熟晒

研薑汁浸蒸餅丸綠豆大每服三十九用口津

嚥下日三服名清金丸

【並攝生方】鴨掌散用銀杏一個麻黃二錢半甘

草炙二錢水一鍾半煎八分臥時服 又金陵

一鋪治哮喘白果定喘湯服之無不效者其人

以此起家其方用白果二十一箇炒黃麻黃三

錢蘇子二錢款冬花法製半夏桑白皮蜜炙各

二錢杏仁去皮尖黃芩微炒各一錢半甘草一

錢水三鍾煎二鍾隨時分作二服不用薑

【醫學正傳】貓頭骨燒灰酒服三錢便止

【葉氏摘元】貓糞燒灰砂糖湯服一錢

●喘急欲死

【肘后方】上氣鳴息者人參末湯服方寸七日五

六服效

【危氏得效方】不能語言涎流吐逆牙齒動搖氣

出轉大絕而復蘇名傷寒併熱霍亂大黃人參

各半兩水二盞煎一盞熱服可安

●陽虛氣喘

【濟生方】自汗盜汗氣短頭暈人參五錢熟附子

一兩分作四帖每帖以生薑十片流水二盞煎

一盞食遠溫服

●上氣喘息

【聖濟總錄】杏仁桃仁各半兩去皮尖炒研用水

調生麪和九梧子大每服十九丸薑蜜湯下微利

為度

【聖惠方】時有咳嗽茶子百合等分為末蜜丸梧

子大每服七丸新汲水下

【本草方】煩熱食即吐逆用砂糖薑汁等分相和

慢煎二十沸每嚙半匙取效

【普濟方】故錦一寸燒灰茶服神效

●定喘下氣

【三因方】補心腎神祕散用白仙茅半兩米泔浸

三宿晒炒團參二錢半阿膠一兩半炒雞臄脰

一兩燒為末每服二錢糯米飲空心下日二三

服

●肺虛喘息

【聖濟錄】連綿不息生鍾乳粉光明者五錢蠟三

兩化和飯飯內蒸熟研丸梧子大每溫水下一

九

●肺濕痰喘

【摘元方】甜葶藶炒為末棗肉丸服

●肺癆喘急

【金匱玉函方】不得臥葶藶大棗瀉肺湯主之葶

藶炒黃搗末蜜丸彈子大每用大棗二十枚水

三升煎取二升乃入葶藶一九更煎取一升頓

服亦主支飲不得息

【簡要濟衆方】馬兜鈴二兩去殼及膜酥半兩入

盤內拌勻慢火炒乾甘草炙一兩為末每服一

錢水一盞煎六分溫呷或噙之

●肺熱氣喘

【聖惠方】生茅根一握咬咀水二盞煎一盞食後

溫服甚者三服止名如神湯

【圖經】集驗治肺熱悶喘急客熱往來欲死不堪

服藥者用桃皮芫花各一升以水四升煮取一

升以故布納汁中取薄胸口溫四肢盈數刻即

止

●風痰喘逆

【活法機要】兀兀欲吐眩暈欲倒半夏一兩雄黃

三錢為末薑汁浸蒸餅丸梧子大每服三十九

薑湯下已吐者加檳榔

【和劑局方】干縉湯用半夏湯洗七個甘草炙皂

莢炒各一寸薑二片水一盞煎七分溫服

●胸喘咳嗽

【衛生易簡方】蓖麻子去殼炒熟揀甜者食之須

多服見效終身不可食炒豆

【儒門事親方】用九尖蓖麻葉三錢入飛過白礬

二錢以猪肉四兩薄批搗藥在內荷葉裹之文  
武火煨熟細嚼以白湯送下名九仙散

【普濟方】治咳嗽涎喘不問年深日近用經霜薑  
麻葉經霜桑葉御米殼蜜炒各一兩爲末蜜丸  
彈子大每服一丸白湯化下日一服名無憂丸

【經驗良方】不拘大人小兒用糯米泔少許磨茶  
子滴入鼻中令吸入口服之口咬竹筒少頃涎  
出如線不過二三次絕根屢驗

【普濟方】猪爪甲二枚燒灰研入麝香一分同研  
搽服

【經驗良方】用猪蹄甲四十九個洗淨每甲納半  
夏白礬各一字罐盛固濟煨赤爲末入麝香一  
錢七分每用糯米飲下半錢

●痰喘氣急

【普濟方】菴藶二個明礬一棗大同燒存性研末  
以熟蘿蔔蘸食藥盡病除

【簡便單方】生山藥搗爛半盃入甘蔗汁半盃和  
勻燉熱飲之立止

【摘元】梨剉空納小黑豆令滿留蓋合住繫定糠  
火煨熟搗作餅每日食之至效

●寒痰哮喘

【集簡方】野園荈研汁和酒服卽住

【張杲醫說】青橘皮一片展開入剛子一個麻絮  
定火上燒存性研末薑汁和酒一鍾呷服天台  
李翰林用此治莫秀才到口便止神方也

●諸喘不止

【發明】震亨曰諸喘不止用椒目炒礮二錢白湯  
調服二三服以上刼之後乃隨痰火用藥時珍

曰椒目下達能行滲道不行穀道所以能下水

燥濕定喘消蟲也

●痰氣喘急

【簡便單方】蘿蔔子炒皂莢燒存性等分為末薑

汁和煉蜜丸梧子大每服五七十九白湯下

●高年氣喘

【濟生祕覽】蘿蔔子炒研蜜丸梧子大每服五十

丸白湯下

●肺風喘促

【直指方】涎潮眼竄用透明阿膠切炒以紫蘇烏

梅肉焙研等分水煎服之

●喘促浮腫

【心鏡】小便淋瀝用杏仁一兩去皮尖熬研和米

煮粥空心喫二合妙

●哮喘不止

【食療本草】榆白皮陰乾焙為末每日旦夜用水

五合末二錢煎如膠服

●年深哮喘

【集成】雞子略敲損浸尿缸中三四日煮食能去

風痰

●鹽哮痰喘

【摘元方】柏樹皮去粗搗汁和飛麪作餅烙熟早

晨與兒喫三四個待吐下鹽涎乃佳如不行熱

茶催之

### 失血門

●九竅出血

【主治嘉祐】四肢指岐皆出血以井水噴面即止

【楊仁齋直指方】因暴驚而得其脈虛者靈砂三十粒人參湯下三服愈此證不可錯認作血得熱則流妄用涼藥誤事

【直指方】荆芥煎酒通口服之

【簡要濟衆】刺薊搗汁和酒服乾者爲末冷水服

【聖濟總錄】服藥不止者南天竺草卽瞿麥拇指

大一把山卮子仁三十個生薑一塊甘草炙半

兩燈草一小把大棗五枚水煎服

【海上方】墻頭苔按塞之

【本草方】石榴花揉塞之取效葉亦可

【三因方】並用龍骨末吹入鼻中昔人衄血一斛

衆方不止用此卽斷

【千金方】荊葉搗汁酒和服二合

【聖惠方】頭髮敗棧陳蓮蓬並燒灰等分每服三

錢木香湯下

【聖惠方】人中白一團雞子大綿五兩燒研每服

二錢溫水服

●衄血不止

【葉氏方】用新汲井華水隨左右洗足卽止累用

有效 一方用冷水噴面 一方冷水浸紙貼

額上以熨斗熨之立止 一方用冷水一瓶淋

射項上及啞門上或以濕紙貼之

【瑞竹堂方】白土末五錢井華水調服二服除根

【經驗方】定州白瓷細末吹少許立止

【梅師方】眩冒欲死濃墨汁滴入鼻中

【本草方】百草霜末吹之立止也

【十全博救方】鉛白霜末新汲水服一字

【聖惠方】胡粉炒黑醋服一錢卽止

【聖濟方】元明粉二錢水服

【集簡方】礪砂一錢水服立止

【聖濟方】枯礬末吹之妙

【聖濟總錄】人參柳枝寒食采者等分為末每服

一錢東流水服日三服無柳枝用蓮子心

【普濟方】桔梗為末水服方寸七日四服加生犀

角屑

【普濟方】貫衆根末水服一錢

【經驗方】津調白芨末塗山根上仍以水服一錢

立止

【普濟方】元胡索末綿裹塞耳內左衄塞右右衄

塞左

【普濟方】貝母炮研末漿水服二錢良久再服

【聖惠方】茅根為末米泔水服二錢

【聖濟錄】當歸焙研末每服一錢米飲調下

【簡便方】就以所出血調白芷末塗山根即止

【事林廣記】赤芍藥為末水服二錢七

【聖濟總錄】香薷研末水服一錢

【許學士本事方】薄荷汁滴之或以乾者水煮綿

裹塞鼻

【梅師方】用雞蘇五合香豉二合同搗搓如棗核

大納鼻孔中即止 聖惠方用雞蘇二兩防風

一兩為末每服二錢溫水下仍以葉塞鼻 普

濟方用龍腦薄荷生地黃等分為末冷水服

【聖惠方】艾灰吹之亦可以艾葉煎服

【貞元廣利方】眩冒欲死青箱子汁三合灌入鼻

中

【聖惠方】蒼耳莖葉搗汁一小盞服



【聖濟總錄】燈心一兩爲末入丹砂一錢米飲每

服二錢

【衛生易簡方】青蒿搗汁服之并塞鼻中極驗

【孫兆祕寶方】乾地黃地龍薄荷等分爲末冷水

調下

【保命集】麥門冬去心生地黃各五錢水煎服立

止

【主治日華】鼻洪用決明子末水調塗胸心立止

【指南方】剪金花連莖葉陰乾濃煎汁溫服立效

【圖經本草】生車前葉搗汁飲之甚善

【聖惠方】穀精草爲末熟麪湯服二錢

【聖惠方】生葛搗汁服三服卽止

【簡要濟衆方】黃藥子爲末每服二錢煎淡膠湯

下良久以新水調麪一匙頭服之 兵部手集

方以新汲水磨汁一盃頓服

【經驗良方】紅棗白藥各燒存性等分爲末糯米

飲服或煎湯洗鼻頻頻縮藥令入

【本事方】茜根艾葉各一兩烏梅肉二錢半爲末

煉蜜丸梧子大每烏梅湯下五十九

【聖惠方】生防己末新汲水服二錢仍以少許啗

之

【聖濟錄】龍鱗薜荔研水飲之

【聖惠方】浮萍末吹之

【主治時珍方】垣衣搗汁服止衄血

【衛生寶鑑】寸金散用墻上土馬驥二錢半石州

黃藥子五錢爲末新水服二錢再服立止

【普濟方】紙條蘸真麻油入鼻取嚏卽愈有人一

夕衄血盈盆用此而效

【簡要濟衆方】服藥不應獨聖散用糯米微炒黃爲末每服二錢新汲水調下仍吹少許入鼻中

【證治要訣】頻飲浙米泔仍以真麻油或蘿蔔汁滴入之

【普濟方】粟米粉水煮服之

【千金方】韭根葱根同搗棗大塞入鼻中頻易兩

三度卽止

【發明】時珍曰勝金方取葱汁入酒少許滴鼻中

治衄血不止云卽覺血從腦散下也又唐瑤經

驗方以葱汁和蜜少許服之亦佳云鄰媪用此

甚效老僕試之亦驗二物同食害人向以能治

此疾恐人脾胃不同非甚急不可輕試也

【發明】宗奭曰鼻衄不止搗大蒜貼足心衄止卽

拭去時珍又云嘗有一婦衄血一晝夜不止諸

治不效時珍令以蒜傅足心卽時血止真奇方也

【簡要濟衆方】服藥不應用蒜一枚去皮研如泥作錢大餅子厚一豆許左鼻血出貼左足心右鼻血出貼右足心兩鼻俱出俱貼之立瘥

【十便良方】諸葛菜生搗汁飲

【發明】時珍曰按張杲醫說云饒民李七病鼻衄

甚危醫以蘿蔔自然汁和無灰酒飲之卽止蓋

血隨氣運氣滯故血妄行蘿蔔下氣而酒導之

故也

【衛生易簡方】蘿蔔搗汁半盞入酒少許熱服并

以汁注鼻中皆良或以酒煎服入蘿蔔再煎飲

之

【本草方】乾薑削尖煨塞鼻中卽止

【聖濟總錄】宣州大栗七枚刺破連皮燒存性出

火毒入麝香少許研勻每服二錢溫水下

【聖惠方】累醫不效栗殼燒存性研末粥飲服二

錢

【聖濟總錄】酢榴花二錢半黃蜀葵花一錢爲末

每服一錢水一盞煎服效乃止

【聖惠方】枇杷葉去毛焙研末茶服一二錢日一

服

【聖惠方】檉葉搗汁一小盞頓服卽止

【本草方】藕節搗汁飲并滴鼻中

【普濟方】柏葉榴花研末吹之

【醫林集要】血竭蒲黃等分爲末吹之

【普濟方】槐花烏賊魚骨等分半生半炒爲末吹

之

【黎居士方】椶櫚灰隨左右吹之

【黎居士易簡方】山卮子燒灰吹之屢用有效

【貞元廣利方】鞋韃燒灰吹之立效

【普濟方】屏風上故紙燒灰酒服一錢卽止

【本草方】五倍子末吹之仍以末同新綿灰等分

米飲服二錢

【聖濟總錄】蝸牛煇乾一枚烏賊魚骨半錢研末

吹之

【普濟方】鯉魚鱗炒成灰每冷水服二錢

【主治時珍方】鱒魚尾上血滴數點入鼻卽止

【楊氏家藏方】蛤粉一兩羅七遍槐花半兩炒焦

研勻每服一錢新汲水調下

【唐氏經驗方】雞矢取有白色半截者燒灰吹之

【總錄】牛耳中垢車前子等分和勻塞之良

【錄驗】用綿裹白馬屎塞之 千金用赤馬糞絞

汁飲一二升並滴鼻內乾者浸水亦可

【三因方】黃明膠盪軟貼山根至髮際

【聖惠方】獾皮一枚燒末半錢綿裹塞之

【本草方】血餘燒灰吹之立止永不發男用母髮

女用父髮 聖惠用亂髮灰一錢人中白五分

麝香少許為末嗜鼻名三奇散

【簡便方】刀刮指甲細末吹之立止試驗

【千金方】人屎尖燒灰水服一二錢并吹鼻中

【經驗方】五七日不住者人中白新瓦焙乾入麝

香少許溫酒調服立效

【聖濟總錄】用白紙一張接衄血令滿于燈上燒

灰作一服新汲水下勿令病人知 儒門事親

就用本衄血紙燃蘸點眼內左點右點左此

法大妙

●吐血不止

【聖惠方】石榴根下地龍糞研末新汲水服三錢

【聖濟方】上色白瓷器末二錢皂莢子仁煎湯下

連服三服即愈

【集簡方】金罌磨汁同萊菔汁飲或生地黃汁亦

可

【聖濟總錄】黃耆二錢半紫背浮萍五錢為末每

服一錢薑蜜水下

【聖惠方】紫參人參阿膠炒等分為末烏梅湯服

一錢 一方去人參加甘草以糯米湯服

【簡要濟衆方】黃連一兩搗散每服一錢水七分

入鼓二十粒煎至五分去滓溫服大人小兒皆

治

【聖惠方】貝母炮研溫漿水服二錢

【千金翼】用白茅根一握水煎服之 婦人良方

用根洗搗汁日飲一合

【發明】時珍曰按洪邁夷堅志云秀川進士陸迎

忽得吐血不止氣蹶驚顛狂躁直視至深夜欲

投戶而出如是兩夕徧用方藥弗療夜夢觀音

授一方命但服一料永除病根夢覺記之如方

治藥其病果愈其方用益智子仁一兩生硃砂

二錢青橘皮五錢麝香一錢碾爲細末每服一

錢空心燈心湯下

【經驗方】用荊芥連根洗搗汁半盞服乾穗爲末

亦可 聖惠方用荊芥穗爲末生地黃汁調服

二錢

【梅師方】血吐下血雞蘇莖葉煎汁飲之

【斗門方】諸失血病紫蘇不限多少入大鍋內水

煎令乾去滓熬膏以炒熟赤豆爲末和丸梧子

大每酒下三五十丸常服之

【聖濟總錄】男婦吐血後胸膈虛熱陰地厥紫河

車貫仲甘草各半兩每服三錢水煎服

【經驗方】白雞冠花醋浸煮七次爲末每服二錢

熱酒下

【衛生易簡方】皺面草卽地菘晒乾爲末每服一

二錢以茅花泡湯調服日二次

【聖惠方】蘆荻外皮燒灰勿令白爲末入蚌粉少

許研勻麥門冬湯服一二錢三服可救一人

【梅師方】生地黃汁一升二合白膠香二兩以磁

器盛入甑蒸令膠消服之

【聖濟總錄】天茄子苗半兩人參二錢半爲末每

服二錢新汲水下

【勝金方】天南星一兩剉如豆大以爐灰汁浸一

宿洗焙研末每服一錢以自然銅磨酒調下

【聖惠方】栝樓泥固煨存性研三錢糯米飲服日

再服

【聖惠方】黃藥子一兩水煎服

【聖惠方】白藥燒存性糯米飲服三錢

【聖濟總錄】紫背浮萍焙半兩黃芪炙二錢半為

末每服一錢薑蜜水調下

【醫學集成】內損吐血飛羅麪略炒以京墨汁或

藕節汁調服二錢

【普濟方】陳紅米泔水溫服一鍾日三次

【本草方】乾薑為末童子小便調服一錢良

【本草方】翻白草每用五七棵咬咀水二鍾煎一

鍾空心服

【本草方】嫩荷葉七個搗水服之甚佳 又方乾

荷葉生蒲黃等分為末每服三錢桑白皮煎湯

調下 肘后方用經霜敗荷葉燒存性研末新

汲水服二錢

【張仲景柏葉湯】用青柏葉一把乾薑二片阿膠

一挺炙三味以水二升煮一升去滓別絞馬通

汁一升合煎取一升綿濾一服盡之 聖惠方

用柏葉米飲服二錢或蜜丸或水煎服並良

【簡要濟衆】白膠香為散每服二錢新汲水調下

【普濟方】槐花燒存性入麝香少許研勻糯米飲

下三錢

【聖濟總錄】晚桑葉焙研涼茶服三錢只一服止

後用補肝肺藥

【聖濟總錄】枸杞根子皮爲散水煎日日飲之

【聖惠方】紅錦三寸燒灰水服

【普濟方】白薄紙五張燒灰水服效不可言

【集驗方】蠶蛻紙燒存性蜜和丸芡實大含化嚙

津

【聖濟錄】鼈甲蛤粉各一兩同炒色黃熟地黃一

兩半晒乾爲末每服二錢食後茶下

【梅師方】燒白馬通以水研絞汁一升服

【千金翼】用阿膠炒二兩蒲黃六合生地黃三升

水五升煮三升分服 經驗方治大人小兒吐

血用阿膠炒蛤粉各一兩辰砂少許爲末藕節

搗汁入蜜調服

【總錄】以鵝鴨肝用生犀角生桔梗一兩爲末每

酒服一錢

【吳求諸症辨疑】就用吐血塊炒黑爲末每服

三分以麥門冬湯調服蓋血不歸元則積而上

逆以血導血歸元則止矣

●諸般吐血

【聖濟錄】硃砂蛤粉等分爲末酒服二錢 又方

丹砂半兩金箔四片蚯蚓三條同研丸小豆大

每冷酒下二丸

【華陀中藏經】因七情所感酒色內傷氣血妄行

口鼻俱出心肺脈破血如湧泉須臾不救用人

參焙側柏葉蒸焙荊芥穗燒存性各五錢爲末

用二錢入飛羅麪二錢以新汲水調如稀糊服

少頃再啜一服立止

【聖惠方】男女吐血地榆三兩米醋一升煮十餘

沸去滓食前稍熱服一合



●虛勞吐血

【葛可久十藥神書】甚者先以十灰散止之其人必困倦法當補陽生陰獨參湯主之好人參一兩肥棗五枚水二鍾煎一鍾服熟睡一覺即減五六繼服調理藥

●陽虛吐血

【余居士選奇方】生地黄一斤搗汁入酒少許以熟附子一兩半去皮臍切片入汁內石器煮成膏取附片焙乾入山藥三兩研末以膏和搗丸梧子大每空心米飲下三十九昔葛察判妻苦此疾百藥皆試得此而愈屢發屢驗

●吐血損肺

【十便良方】鍊成鍾乳粉每服二錢糯米湯下立止

【百一選方】香附末一錢米飲下日二服

【本草方】或舌上有孔出血生地黄黃八兩取汁童便五合同煎熟入鹿角膠炒研一兩分三服

【發明】時珍曰許學士本事方用牡丹皮天門冬麥門冬治勞瘵吐血損肺及血妄行名曰神傳膏其法每用一斤洗淨晒為末入生蜜二斤和為膏以器盛之不得犯鐵器一日一蒸九蒸九曝乃止病人五更起面東坐不得語言以匙抄藥四匙食之良久以稀粟米飲壓之藥只冷服米飲亦勿大熱或吐或否不妨如久病肺損咯血只一服愈尋常嗽血妄行每服一匙可也

【聖濟錄】九節菖蒲末白麵等分每服三錢新汲水下日一服

●勞心吐血

【澹寮】糯米半兩蓮子心七枚爲末酒服孫仲益云曾用多效或以墨汁作丸服之

【是齋百一方】蓮子心七個糯米二十一粒爲末酒服此臨安張上舍方也

●積熱吐血

【袖珍方】馬屁勃爲末沙糖丸如彈子大每服半丸冷水化下

●中蠱吐血

【小品方】或下血如肝鹽一升苦酒一升煎化頓服得吐卽愈乃支太醫方也

【廣記】小麥麪二合水調服半日當下出

●吐血刺痛

【簡要濟衆方】川大黃一兩爲散每服一錢以生地黃汁一合水半盞煎三五沸無時服

●肺疽吐血

【三因方】因啖辛辣熱物致傷者用紅棗連核燒存性百藥煎煨過等分爲末每服二錢米飲下

【三因方】髮灰一錢米醋二合白湯一盞調服

●吐血燥渴

【聖濟錄】及解毒用茜根雄黑豆去皮甘草炙等分爲末井水丸彈子大每溫水化服一九

●吐血不定

【周應簡要濟衆方】茜根一兩搗末每服二錢水煎冷服亦可水和二錢服

●老幼吐血

【聖濟總錄】蒲黃末每服半錢生地黃汁調下量人加減或入髮灰等分

●肺病吐血

【衛生易簡方】新百合搗汁和水飲之亦可煮食

【普濟方】黃明膠炙乾花桑葉陰乾各二兩研末

每服三錢生地黃汁調下

●卒然吐血

【普濟方】石灰于刀頭上燒研井水下二錢

【千金方】一二口或心衄或內崩熟艾三團水五

升煮二升服一方燒灰水服二錢

【簡要濟衆】榭葉爲末每服二錢水一盞煎七分

和滓服

【聖濟總錄】先食蒸餅兩三個以榭子爲末白湯

服三錢日三服

【聖惠方】雙荷散用藕節荷蒂各七個以蜜少許

搗爛用水二鍾煎八分去滓溫服或爲末丸服

亦可

【發明】時珍曰按侯延賞退齋閑錄云凡人卒暴

吐血者用大蜘蛛網搓成小團米飲吞之一服

立止此乃孫紹先所傳方也

【聖惠方】烏賊骨末米飲服二錢

●心熱吐血

【聖惠方】口乾用刺薊葉及根搗絞取汁每頓服

二小盞

【聖惠方】脈洪數者生芡汁半升熬至一合入大

黃末一兩待成膏丸梧子大每熟水下五丸至

十九

【廣利方】不止生葛搗汁半升頓服立瘥

●吐血喘嗽

【本草方】龍腦薄荷焙研末米飲服一錢取效

【聖惠方】熟地黃末酒服一錢日三服

【指南方】吐血後效者紫苑五味炒爲末蜜丸芡

子大每含化一丸

【濟生方】款冬花百合蒸焙等分爲末蜜丸龍眼

大每臥時嚼一丸薑湯下

【直指方】吐血下血崩中帶下喘急痰嘔中滿宿

痰用半夏搗扁以薑汁和麪包煨黃研末米糊

丸梧子大每服三十九白湯下

【經驗方】甚者殷鮮桑根白皮一斤米泔浸三宿

刮去黃皮剉細入糯米四兩焙乾爲末每服一

錢米飲下

【普濟方】青豨羊角炙焦二枚桂末二兩爲末每

服一七糯米飲下日三服

【朱氏集驗方】小兒胎髮灰入麝香少許酒下每

個作一服男用女女用男

●氣鬱吐血

【丹溪方】用童子小便調香附末二錢服

【澹寮方】治吐血不止莎草根一兩白茯苓半兩

爲末每服二錢陳粟米飲下

●吐血瘀聚

【肘后方】凡吐血後心中不悶者必止若煩躁悶

亂刺脹者尚有瘀血在胃宜吐之杜衡三分瓜

蒂二分人參一分爲末湯服一錢日二服取吐

爲度

●鼻血時作

【本草方】乾鹿血炒枯將酒醇薰二三次仍用酒

酌半盞和服之

●衄血一月

【聖惠方】不止刺羊血熱飲卽瘥

●大衄久衄

【聖惠方】口耳大衄蒲黃阿膠炙各半兩每用二

錢水二盞生地黃汁一合煎至六分溫服急以

帛繫兩乳止乃已

【普濟方】口耳皆出者用白麪入鹽少許冷水調

服三錢

【聖惠方】用阿膠炙蒲黃半兩每服二錢水一盞

生地黃汁一合煎至六分溫服急以帛繫兩乳

【聖惠方】人中白一團雞子大綿五兩燒研每服

二錢溫水服

●少小鼻衄

【肘后方】小勞輒出桑耳熬焦搗末每發時以杏

仁大塞鼻中數度即可斷

●舌衄出血

【朱氏集驗】槐花末傅之即止

●病後常衄

【肘后方】小勞即作牡蠣十分石膏五分爲末酒

服方寸七亦可蜜丸日三服

●傷寒衄血

【本事方】滑石末飯丸梧子大每服十九微嚼破

新水嚥下立止湯晦叔云鼻衄乃當汗不汗所

致其血紫黑時不以多少不可止之且服溫和

藥調其營衛待血鮮時急服此藥止之也

●膽熱衄血

【宣明方】血上妄行水銀硃砂麝香等分爲末每

服半錢新汲水下

●鼻衄頭痛

【普濟方】心煩石膏牡蠣一兩爲末每新汲水服

二錢并滴鼻內

●肺壅鼻衄

【聖濟總錄】箬葉燒灰白麪三錢研勻并華水服

二錢

●肺熱血衄

【簡便單方】蒲黃青黛各一錢新汲水服之或去

青黛入油髮灰等分生地黃汁調下

●鼻衄眩冒

【梅師方】欲死者龍骨末吹之

【梅師方】欲死者亂髮燒研末水服方寸匕仍吹

之

●口鼻出血

【本草方】如涌泉因酒色太過者荆芥燒研陳皮

湯服二錢不過二服也

●齒縫衄血

【聖惠方】童便溫熱含之立止

●肺損嘔血

【普濟方】并開胃用阿膠炒三錢木香一錢糯米

一合半爲末每服一錢百沸湯點服日一

●嘔血吐痰

【丹溪心法】心煩骨蒸者人中黃爲末每服三錢

茜根汁竹瀝薑汁和勻服之

●嘔血熱極

【經驗方】黃蘗蜜塗炙乾爲末麥門冬湯調服二

錢立瘥

●嘔血不止

【經驗方】鱧膠長八寸廣二寸炙黃刮二錢以甘

蔗節三十五個取汁調下

●憂恚嘔血

【聖惠方】煩滿少氣胸中疼痛柏葉為散米飲調

服二方寸七

●肺癰咯血

【濟生方】薏苡仁三合搗爛水二大盞一盞入酒

少許分二服

●肺熱咯血

【華陀中藏經】青餅子用青黛一兩杏仁以牡蠣

粉炒過一兩研勻黃蠟化和作三十餅子每服

一餅以乾柿半個夾定濕紙裏煨香嚼食粥飲

送下日三服

●肺病咯血

【發明】震亨曰凡吐血不止宜加白芨時珍曰白

芨性瀼而收得秋金之令故能入肺止血生肌

治瘡也按洪邁夷堅志云台州獄吏憫一大囚

囚感之因言吾七次犯死罪遭訊拷肺皆損傷

至于嘔血八傳一方只用白芨為末米飲日服

其效如神後其囚凌遲劍者剖其胸見肺間竅

穴數十處皆白芨填補色猶不變也洪貫之聞

其說赴任洋州一卒忽苦咯血甚危用此救之

一日即止也

【丹溪方】杏仁四十個以黃蠟炒黃研入青黛一

錢作餅用柿餅一個破開包藥濕紙裏煨熟食

之取效

●肺痿咯血

【古今錄驗】多痰者漢防己葶藶等分為末糯米

飲每服一錢

【普濟方】蘿蔔和羊肉或鯽魚煮熟頻食



●下血瀉血

【普濟方】諸般下血腸風酒痢血痔鼠痔下血黑狗脊黃者不用須內肉赤色者卽本草貫仲也去皮毛剉焙爲末每服二錢空心米飲下或醋糊丸梧子大每米飲下三四十九或燒存性出火毒爲末入麝香少許米飲服二錢

【肘后方】二十年者取地榆鼠尾草各二兩水二升煮一升頓服若不斷以水漬屋塵飲一小盃投之

【楊氏家藏方】積熱下血聚金丸治腸胃積熱或因酒毒下血腹痛作渴脈弦數黃連四兩分作四分一分生用一分切炒一分炮切一分水浸晒研末條黃芩一兩防風一兩爲末麪糊丸如梧子大每服五十九米泔浸枳殼水食前送下

冬月加酒蒸大黃一兩

【濟生方】臟毒下血黃連爲末獨頭蒜煨研和丸梧子大每空心陳米飲下四十九

【醫學集成】酒痔下血黃連酒浸煮熟爲末酒糊丸梧子大每服三四十九白湯下 一方用自然薑汁浸焙炒

【十便良方】三代相傳者縮砂仁爲末米飲熱服二錢以愈爲度

【本草方】諸般下血香附童子小便浸一日搗碎米醋拌焙爲末每服二錢米飲下 直指方用香附以醋酒各半煮熟焙研爲末黃穉米糊丸梧子大每服四十九米飲下日二服 戴原禮云只以香附子末二錢入百草霜麝香各少許同服效尤速也

【梅師方】吐血下血雞蘇莖葉煎汁飲之

【廣利方】木賊五錢水煎溫服一日二服

【華陀中藏經】一切下血雄黑豆緊小者以皂角

湯微浸炒熟去皮爲末煉豬脂和丸梧子大每

服三十九陳米飲下

【聖惠方】積年下血寒食蒸餅烏龍尾各一兩皂

角七挺去皮酥炙爲末蜜丸米飲每服二十九

【仁存方】下血經年樗根二錢卽龍眼樹水一盞

煎七分入酒半盞服或作丸服虛者加人參等

分

【集簡方】大腸下血椶筍煮熟切片晒乾爲末蜜

湯或酒服一二錢

【百一選方】下血不止椶櫚皮半斤栝樓一個燒

灰每服二錢米飲調下

【普濟方】巴豆一個去皮以雞子開一孔納入紙

封煨熟去豆食之其病卽止虛人分作二服決

效

【食醫心鏡】久痔下血野豬肉二斤著五味炙空

腹食之作羹亦得

【飲膳正要】下血不止用獺肝一副煮熟入五味

食之妙

【聖濟總錄】積年瀉血百藥不效用人指甲炒焦

麝香各二錢半乾薑炮三兩白礬枯過敗皮巾

燒灰各一兩爲末每粥飲一錢日二服

●下血年久

【千金方】鼠尾草地榆二兩水二升煮一升頓服

二十年者不過再服亦可爲末飲服之

【百一選方】卷柏地榆焙等分每用一兩水一盃

煎數十沸通口服

【發明】時珍曰柿乃脾肺血分之果也其味甘而氣平性瀟而能收故有健脾澀腸治嗽止血之功蓋大腸者肺之合而胃之子也真正柿霜乃其精液入肺病上焦藥尤佳按方勺泊宅編云外兄劉椽云病臟毒下血凡半月自分必死得一方只以乾柿燒灰飲服二錢遂愈又王珍百一方云曾通判子病下血十年亦用此方一服而愈爲散爲丸皆可與本草治腸澼消宿血解熱毒之義相合則柿爲太陰血分之藥益可徵矣又經驗方云有人三世死于反胃病至孫得一方用乾柿餅同乾飯日日食之絕不用水飲如法食之其病遂愈此又一徵也

●下血數升

【普濟方】黃蘗一兩去皮雞子白塗炙爲末水丸綠豆大每服七丸溫水下名金虎丸

●脾濕下血

【保命集】蒼朮二兩地榆一兩分作二服水二盞煎一盞食前溫服久痢虛滑以此下桃花丸

●瀉血萎黃

【普濟方】腸風痔漏脫肛瀉血面色萎黃積年不瘥者白朮一斤黃土炒過研末乾地黃半斤飯上蒸熟搗和乾則入少酒丸梧子大每服十五丸米飲下日三服

●暴下血病

【梅師方】小蘗葉搗汁溫服一升

【寇宗奭本草衍義】用胡蒜五七枚去皮研膏入豆豉搗丸梧子大每米飲下五六十九丸無不愈

者

【全幼心鑑】大便下血藕節晒乾研末人參白蜜

煎湯調服二錢日二服

【永類鈴方】生豬臟一條洗淨控乾以炒槐花末

填滿紮定米醋炒鍋內煮爛搗九彈子大日乾

每服一丸空心當歸煎酒化下

●中蠱下血

【初虞古今錄驗】如雞肝晝夜出血石餘四臟皆

捐惟心未毀或鼻破將死者苦桔梗為末以酒

服方寸七日三服不能下藥以物拗口灌之當

煩須臾自定七日止當食豬肝肺以補之神良

一方加犀角等分

【本草方】榭木北陰白皮一大握長五寸以水三

升煮取一升空腹分服即吐毒出也

【肘后方】如爛肝者以蚯蚓十四枚苦酒三升漬

至蚓死服水已死者皆可治

●結陰下血

【宣明方】腹痛不已地榆四兩炙甘草三兩每服

五錢水一盞入縮砂四七枚煎一盞半分二服

【聖濟總錄】雞冠花椿根白皮等分為末煉蜜丸

梧子大每服三十九黃芪湯下日二服

【聖濟錄】腹痛草烏頭蛤粉炒去皮臍切一兩茴

香炒三兩每用三錢水一盞入鹽少許煎八分

去滓露一夜五更冷服

【普濟方】蕪荑一兩搗爛紙壓去油為末以雄豬

膽汁丸梧子大每服九丸甘草湯下日五服三

日斷根

●陽毒下血

【孫用和祕寶方】熱氣入胃痛不可忍鬱金五大個牛黃一皂莢子爲散每服用醋漿水一盞同煎三沸溫服

【梅師方】因食熱物發者生葛根二斤搗汁一升入藕汁一升和服

●蟲痢下血

【圖經】男子婦人小兒大腸下黑血茶脚色或膿血如淀色柏葉焙乾爲末與黃連同煎爲汁服之

●下血脫肛

【永類鈴方】白雞冠花防風等分爲末糊丸梧子大空心米飲下每服七十九一方白雞冠花炒櫻欄灰羌活一兩爲末每服二錢米飲下

●熱毒下血

【本事方】金星草陳乾薑各三兩爲末每服一錢新汲水下

【梅師方】或因食熱物發動赤小豆末水服方寸七

●下血虛寒

【並聖惠方】日久腸冷者熟附子去皮枯白礬一兩爲末每服三錢米飲下 又方熟附子一枚

去皮生薑三錢半水煎服或加黑豆一百粒

【楊子建護命方】下血止後但覺丹田元氣虛乏腰膝沉重少力桑寄生爲末每服一錢非時白

湯點服

●酒積下血

【摘元方】馬鞭草灰四錢白芷灰一錢蒸餅丸梧子大每米飲下五十九

【經驗良方】槐花半生半炒一兩山梔子焙五錢

爲末新汲水服二錢

【聖惠方】老山梔子仁焙研新汲水服一錢七

【便民食寮方】酒煮鱒魚常食最效

●漏血欲死

【梅師方】雞蘇煮汁一升服之

●陰虛尿血

【三因方】人參焙黃耆鹽水炙等分爲末用紅皮

大蘿蔔一枚切作四片以蜜二兩將蘿蔔逐片

蘸炙令乾再炙勿令焦以蜜盡爲度每用一片

蘸藥食之仍以鹽湯送下以瘥爲度

●大小便血

【寇氏本草衍義】好墨細末二錢阿膠化湯調服

熱多者尤相宜

【集簡方】劉寄奴爲末茶調空心服二錢卽止

【聖惠方】蠶黃散治腸風大小便血淋瀝疼痛用

蠶黃蠶蛻紙並燒存性晚蠶沙白殭蠶併炒等

分爲末入麝香少許每服二錢用米飲送下日

三服甚效

●衄血吐血

【廣利方】伏龍肝末半升新汲水一升淘汁和蜜

服

【劉長春經驗方】治吐血及傷酒食醉飽低頭掬

損肺臟吐血汗血口鼻妄行但聲未失者用鄉

外人家百草霜末糯米湯服二錢 一方百草

霜五錢槐花末二兩每服二錢茅根湯下

【斗門方】血師卽代赭石一兩火煨米醋淬盡醋

一升搗羅如麪每服一錢白湯下

【瀕湖集簡】山漆一錢自嚼米湯送下或以五分

加入八核湯

【普濟方】胡黃連生地黃等分爲末豬膽汁丸梧

子大臥時茅花湯下五十九

【聖惠方】或發或止積熱所致黃芩一兩去中心

黑朽者爲末每服三錢水一盞煎六分和滓温

服

【黎居士易簡方】川鬱金爲末井水服二錢甚者

再服二服

【張仲景金匱玉函】治心氣不足吐血衄血者瀉

心湯主之大黃二兩黃連黃芩各一兩水三升

煮一升熱服取利

【朱氏集驗方】鏡面草水洗搗酒服

【濟生方】陽乘於陰血熱妄行宜服四生丸陳日

華云屢用得效用生荷葉生艾葉生柏葉生地

黃等分搗爛丸鷄子大每服一九水三盞煎一

盞去滓服

【王珍百一選方】白膠香蛤粉等分爲末薑汁調

服

【聖惠方】楮葉搗汁一二升旋旋温服之

【普濟方】好綿燒灰打麵糊入清酒調服之

【雲臺方】用紫金沙卽露蜂房頂上實處一兩貝

母四錢盧會三錢爲末蜜和丸雷丸大每用一

丸水一小盞煎至五分温服吐血温酒調服

【三因方】並九竅出血用龍骨末吹入鼻中昔有

人衄血一斛衆方不止用此卽斷

【鈴方】用赤馬糞燒灰温酒服一錢

●衄血咯血



【古今錄驗】白芍藥一兩犀角末二錢半為末新

汲水服一錢七分血止為限

●吐血鼻洪

【日華子方】人溺薑汁和勻服一升

●吐血嗽血

【聖惠方】肺損者金星石銀星石元精石不灰木

陽起石雲母石等分用坩鍋一個鋪冬月水牛

糞一二寸鋪藥一層鋪灰二寸又藥一層重重

如此以灰蓋之鹽泥固濟用炭一秤火煨一日

夜埋土中一夜取出藥塊去灰為末每一兩入

龍腦麝香各半錢阿膠二錢半炒每服一錢糯

米湯下日三服

●吐血嘔血

【本草方】五靈脂一兩盧會三錢研末滴水丸芡

子大每漿水化服二丸 又治血妄行入胃吐

不止五靈脂一兩黃芪半兩為末新汲水服二

錢

●咯血唾血

【朱氏方】槐花炒研每服三錢糯米飲下仰臥一

時取效

●吐血咯血

【濟急方】鍋底墨炒過研細并華水服二錢連進

三服

【經驗方】效血黃丹新汲水服一錢

【百一渾方】用蒲黃黃藥子等分為末掌中舐之

【王堯博濟方】用黃藥子漢防己各一兩為末每

服一錢小麥湯食後調服一日二服

【本草方】荷葉焙乾為末米湯調服三錢一日二

服以知爲度 聖濟總錄用敗荷葉蒲黃各一兩爲末每服二錢麥門冬湯下

【澹寮方】用白膠香銅青各一錢爲末入乾柿內紙包煨熟食之 聖惠方用白膠香切片炙黃

一兩新綿一兩燒灰爲末每服一錢米飲下

【乾坤祕韜】五勞七傷用水牛腦一枚塗紙上陰乾杏仁煮去皮胡桃仁白蜜各一斤香油四兩

同熬乾爲末每空心燒酒服二錢七

【食寮】黃明膠一兩切片炙黃新綿一兩燒研每服一錢食後米飲服日再

●吐血痔血

【肘后方】向東囊荷根一把搗汁三升服之

●皮膚血澀

【王璆百一選方】出者以煮酒壘上紙扯碎如楊

花攤在出血處按之卽止

【證治要訣】胎髮燒灰傅之卽止或吹入鼻中

●吐血便血

【普濟方】桔梗爲末水服方寸七日四服一加生犀角屑

【龐安常卒病論】黃芩三兩水三升煎一升半每

溫服一盞亦治婦人漏下血

【聖惠方】地黃汁六合銅器煎沸入牛皮膠一兩待化入薑汁半杯分三服便止或微轉一行不

妨

【肘后方】用桂心爲末水服方寸七 王璆曰此

陰采陽之症也不可服涼藥南陽趙宣德暴吐血服二次而止其甥亦以二服而安

●吐血瀉血

【普濟方】心腹痛伏龍肝地壚土多年煙壁土等分每服五錢水二盃煎一盃澄清空心服白粥補之

●血汗不止

【宣明方】水銀硃砂麝香等分爲末每服半錢新

汲水下

【經驗方】人中白新瓦焙乾入麝香少許溫酒調

服立效

●失血眩暈

【婦人良方】凡傷胎去血產後去血崩中去血金

瘡去血拔牙去血一切去血過多心煩眩暈悶

絕不省人事當歸二兩川芎一兩每用五錢水

七分酒三分煎七分熱服日再

●血症黃腫

【簡便方】綠礬四兩百草霜一升炒麪半斤爲末

沙糖和丸梧子大每服三四十九食後薑湯下

鄭時舉所傳 又方小麥淘淨一斤皂礬半斤

同炒黃爲末黑棗肉半斤搗勻米醋打糊丸梧

子大每薑湯下八九十九日三服

●肺破出血

【斗門方】或嗽血不止用海犀膏卽水膠一大片

炙黃塗酥再炙研末用白湯化三錢服之立止

●男女病血

【集驗方】九仙驅紅散治嘔吐諸血及便血婦人

崩中神效用積雪草五錢當歸酒洗扈子仁酒

炒蒲黃炒黃連炒條黃芩酒炒生地黃酒洗陳

槐花炒各一錢上部加藕節一錢五分下部加

地榆一錢五分水二鍾煎一鍾服神效此方得

之甚祕此草與本草主治不同不可曉也

●男女血虛

【醫方摘要】麥門冬三斤取汁熬成膏生地黃三斤取汁熬成膏等分一處瀘過入蜜四之一再熬成餈收每日白湯點服忌鐵器

●上下諸血

【聖濟方】或吐血或心衄或內崩或舌上出血如簪孔或鼻衄或小便出血並用亂髮灰水服方寸七一日三服

●花藥石散

【葛可久十藥神書】治五內崩損噴血斗升用此治之花藥石煨存性研如粉以童子小便一鍾男人酒一半女人醋一半煎溫食後調服三錢甚者五錢能使瘀血化為黃水後以獨參湯補

之

●地黃煎

【千金方】補虛除熱治吐血唾血取乳石去癰癩等疾生地黃不拘多少三搗三壓取汁令盡以瓦器盛之密蓋勿洩氣湯上煮減半絞去滓再煎如錫丸彈子大每溫酒服一九日二服



# 古今名醫驗方類編目錄

## 卷七 通治部

### 諸氣門

驚氣失音……………  
 順氣利腸……………  
 走注氣痛……………  
 積年氣塊……………  
 痰癖氣塊……………  
 治風順氣……………  
 上氣咳逆……………  
 勞氣欲絕……………  
 氣鼈……………  
 心下結氣……………  
 氣奔怪疾……………  
 寒濕氣痛……………  
 中氣不省……………  
 氣脹懶食……………

上氣喘息……………  
 氣短不接……………  
 諸般氣痛……………  
 一切氣疾……………  
 升降諸氣……………  
 男婦氣痛……………  
 喘息欲絕……………  
 奔豚氣痛……………  
 氣脹氣蠱……………  
 諸氣不調……………  
 心腹結氣……………  
 伏梁結氣……………  
 氣積鬱冒……………  
 結氣欬逆……………  
 脾元氣痛……………  
 男女氣脹……………  
 下氣消食……………

氣嗽日久……………  
 五臟諸氣……………  
 胸脇氣逆……………  
 上氣發熱……………  
 氣逆煩滿……………  
 氣血撮痛……………  
 烏沉湯……………  
 靈脂散……………  
 膜外氣痛……………  
 痰飲門  
 痰結胸中……………  
 胸中痰飲……………  
 痰飲頭痛……………  
 痰飲吐水……………  
 痰飲迷悶……………  
 風痰壅滯……………  
 風痰疰痛……………

壯人風痰.....六

老小風痰.....六

膈壅風痰.....六

風痰濕痰.....六

風痰喘逆.....六

大風熱痰.....六

一切風痰.....六

宣吐風痰.....六

暖胃除痰.....六

搜風化痰.....六

痰熱喘嗽.....七

痰氣膈脹.....七

上焦熱痰.....七

肺熱痰嗽.....七

停痰宿飲.....七

痰飲咳嗽.....七

胸脇痰飲.....七

痰飲宿水.....八

痰膈氣脹.....八

肺壅痰滯.....八

冷積痰氣.....八

痰氣喘急.....八

一切痰氣.....八

冷痰痞滿.....八

痰涎爲害.....八

中焦痰涎.....八

濕痰咳嗽.....八

氣痰咳嗽.....八

冷痰虛熱.....八

痰癖卒風.....八

心下留飲.....八

積聚痰涎.....九

痰迷心竅.....九

飲酒痰癖.....九

痰注臂痛.....九

頑痰不化.....九

痰疾.....九

化食消痰.....九

化痰利痰.....九

消痰開胃.....一〇

支飲作喘.....一〇

生津化痰.....一〇

生犀丸.....一〇

滾痰丸.....一〇

天麻丸.....一〇

控涎丹.....一〇

法製半夏.....一〇

潤下丸.....一一

吳仙丹方.....一一

瓜蒂散.....一一

論痰.....一一

痰之爲物論.....一一

論五飲.....一一

五飲酒癖.....一一

痰厥氣.....一一

虛損門.....一一

元氣虛寒.....一二

虛損風濕.....一二

陽氣虛損.....一二

老人虛損.....一三



補益虛羸……………一三  
 男女虛損……………一三  
 補益虛損……………一三  
 虛勞瘦弱……………一四  
 虛損積勞百病……………一四  
 虛損勞傷……………一四  
 脫陽虛症……………一四  
 虛勞體痛……………一五  
 心氣虛損……………一五  
 補虛精氣……………一五  
 骨虛勞極……………一五  
 虛勞困乏……………一五  
 病後虛弱……………一五  
 虛勞不足……………一五  
 虛勞客熱……………一五  
 虛勞苦渴……………一五  
 補益勞傷……………一五  
 腎虛腰痛……………一五  
 注夏虛勞……………一五  
 定心補腎……………一五

精血耗涸……………一六  
 男婦怯症……………一六  
 上盛下虛……………一六  
 房後困倦……………一六  
 房勞黃病……………一六  
 補精潤肺……………一六  
 大補元陽……………一六  
 虛損風疾……………一六  
 人參膏……………一六  
 三建湯……………一七  
 補骨脂丸……………一七  
 交感丹……………一七  
 戊戌酒……………一七  
 戊戌丸……………一七  
 紫芝丸……………一七  
 白鳳膏……………一八  
 小刀圭……………一八  
 返本丸……………一八  
 異類有情丸……………一八  
 斑龍丸……………一八

二至丸……………一八  
 麋角丸……………一九  
 麋角丸……………一九  
 麋角丸……………一九  
 麋角霜丸……………一九  
 青木香丸……………二〇  
 羊肉湯……………二〇  
 鹿鯨丸……………二〇  
 癆瘵門  
 癆瘵有蟲……………二〇  
 骨蒸勞病……………二〇  
 虛勞不仁……………二〇  
 燒香治癆……………二一  
 癆瘵熏法……………二一  
 骨蒸肺痿……………二一  
 骨蒸久冷……………二一  
 骨蒸傳尸……………二一  
 五癆七傷……………二一  
 追癆取蟲……………二一  
 傳尸癆瘵……………二二

男婦癆瘦.....一三二

虛勞寒熱.....一三二

虛勞瘵疾.....一三二

虛勞口乾.....一三二

卒熱勞疾.....一三二

癆瘵失血.....一三二

急勞煩熱.....一三二

筋骨疼痛.....一三二

心氣勞傷.....一三二

三黃丸.....一三二

明目丹.....一三二

河車丸.....一三二

鬱症門

憂鬱不安.....一三三

抑結不散.....一三三

心氣鬱結.....一三三

七情鬱結.....一三三

結核門

結核氣鬱.....一三三

痰核紅腫.....一三三

惡核腫結.....一四四

梅核膈氣.....一四四

鼓脹門

鼓脹煩渴.....一四四

諸積鼓脹.....一四四

鼓脹便閉.....一四四

中滿鼓脹.....一四四

十種蠱脹.....一四四

水氣蠱脹.....一四四

蝦蟆蠱病.....一四四

蛇涎蠱瘕.....一四四

癥瘕蠱病.....一四四

腹大如鼓.....一四四

雞矢醴.....一四五

牽牛酒.....一四五

古今名醫驗方類編卷七

通治部

諸氣門

●驚氣失音

【發明】洪邁夷堅志云驚氣入心絡痞不能言語者用蜜佗僧末一七茶調服即愈昔有人伐薪爲狼所逐而得是疾或授此方而愈又一軍校采藤逢惡蛇病此亦用之而愈此乃驚則氣亂蜜佗僧之重以去怯而平肝也其功力與鉛丹同故膏藥中用代鉛丹云

●順氣利腸

【濟生方】紫蘇子麻子仁等分研爛水瀝取汁同

米煮粥食之

●走注氣痛

【千金方】車缸燒赤濕布裹熨病上

【簡便方】一切走注氣痛不和廣木香溫水磨濃

汁入熱酒調服

【生生編】走氣作痛用醞醋拌麩皮炒熱袋盛熨

之

【姚增坦集驗方】氣痛之病忽有一處如打扑之狀不可忍走注不定靜時其處冷如霜雪此皆暴寒傷之也以白酒煮楊柳白皮暖熨之有赤點處鏡去血妙凡諸卒腫急痛熨之皆即止

●積年氣塊

【聖惠方】臍腹痛疹砂醋煮二兩木瓜三枚切

須去瓢入碗在內碗盛于日中晒至瓜爛研勻

以米醋五升煎如稀餈蜜收用時旋以附子末

和九梧子大熱酒化下一丸

【本草方】遠年肺氣猪脰一具膩粉一兩瓷瓶固

封上留小竅煨烟盡爲末每服二錢漿水下

【聖濟總錄】氣積成塊牛腦散用牛腦子一個去

筋雄雞肫一個連黃並以好酒浸一宿搗爛入

木香沉香砂仁各三兩皮硝一碗杵千下入生

銅鍋內文武火焙乾爲末入輕粉三錢令勻每

服二錢空心燒酒服日三服

●痲癖氣塊

【奇效方】草三稜荆三稜石三稜青橘皮陳橘皮

木香各半兩肉豆蔻檳榔各一兩硃砂二錢爲

末糊九梧子大每薑湯服三十九

【發明】藏器曰昔有患痲癖者夢人教每日食大

蒜三顆初服遂至瞑眩吐逆下部如火後有人

教取數片合皮截却兩頭吞之名曰內炙果獲

大效

【聖惠方】用大鱉一枚以蠶沙一斗桑柴灰一斗

淋汁五度同煮如泥去骨再煮成膏搗九梧子

大每服十九日三服

●治風順氣

【聖惠方】利腸寬中用紫蘇子一升微炒杵以生

絹袋盛於三斗清酒中浸三宿炒飲之

●上氣咳逆

【簡便方】紫蘇子入水研濾汁同粳米煮粥食

●勞氣欲絕

【南陽活人書】麥門冬一兩甘草炙二兩杭米半合棗二枚竹葉十五片水二升煎一升分三服

●氣鼈

【直指方】嗜酒任氣血凝于氣則爲氣鼈嗜酒痛冷敗血入酒則爲血鼈搖頭掉尾大者如鼈小者如錢上侵人喉下蝕人肛或附脊背或隱腸腹用生硫黃末老酒調下常服之

●心下結氣

【聖惠方】凡心下硬按之則無常覺膨滿多食則吐氣引前後噫呃不除由思慮過多氣不以時而行則結滯謂之結氣人參一兩橘皮去白四兩爲末煉蜜丸梧子大每米飲下五六十九

●氣奔怪疾

【夏子益疾奇方】人忽遍身皮底混混如波浪聲

痒不可忍抓之血出不能解謂之氣奔以苦杖

人參青鹽細辛各一兩作一服水煮細飲盡便

愈

●寒濕氣痛

【集簡方】白朮切片煎汁熬膏白湯點服

●中氣不省

【濟生方】閉目不語如中風狀南木香爲末冬瓜

子煎湯灌下三錢痰盛者加竹瀝薑汁

●氣脹懶食

【聖惠方】頌曰續傳信方著張仲景青木香丸主陽衰諸不足用崑崙青木香六路訶子皮各二十兩搗篩糖和丸梧子大每空腹酒下三十九日再其效尤速鄭駙馬去砂糖用白蜜加羚羊角十二兩逢氣脹懶食熱者牛乳下冷者酒下

用藥不類古方而云張仲景不知從何而得也

●上氣喘息

【保生方】蓬莖莖五錢酒一盞半煎八分服

●氣短不接

【孫用和祕寶方】正元散治氣不接續兼治滑泄

及小便熱王丞相服之有驗用蓬莖莖一兩金

鈴子去核一兩為末入蓬砂一錢煉過研細每

服二錢溫酒或鹽湯空心服

●諸般氣痛

【存仁方】芫花醋煮半兩元胡索炒一兩半為末

每服一錢男子元臟痛葱酒下瘧疾烏梅湯下

婦人血氣痛當歸酒下諸氣痛香附湯下小腸

氣痛茴香湯下

●一切氣疾

【和劑局方】心腹脹滿噎塞噎氣香酸痰逆嘔吐

及宿酒不解香附子一斤縮砂仁八兩甘草炙

四兩為末每白湯入鹽點服為粗末煎服亦可

名快氣湯

【衛生家寶方】不拘男女冷氣血氣肥氣息賁氣

伏梁氣奔豚氣搶心切痛冷汗喘息欲絕天台

烏藥小者酒浸一夜炒茴香炒青橘皮去白炒

良薑炒等分為末溫酒童便調下

【千金方】宿食不消訶黎一枚入夜舍之至明嚼

嚙 又方訶黎三枚濕紙包煨熟去核細嚼以

牛乳下

【本草本】洗曰用大鯉一頭開肚入胡椒末半兩

大蒜片三顆縫合同小豆一升煮熟下蘿蔔三

五顆葱一握俱切碎煮熟空心服之至飽并飲

汁至夜洩惡氣無限也五日更一作

●升降諸氣

【和劑局方】治一切氣痛痞脹喘噦噎酸煩悶虛痛走注常服開胃消痰散壅思食早行山行尤宜服之去邪辟瘴香附子炒四百兩沉香十八兩縮砂仁四十八兩炙甘草一百二十兩爲末每服一錢入鹽少許白湯點服

【經效濟世方】藿香一兩香附炒五兩爲末每以白湯點服一錢

【和劑局方】暖則宜流熟附子一大個分作二服水二盞煎一盞入沉香汁溫服

●男婦氣痛

【摘元方】不拘久近威靈仙五兩生韭根二錢半烏藥五分好酒一盞雞子一個灰火煨一宿五

更視雞子殼軟爲度去渣溫服以乾物壓之側睡向塊邊渣再煎次日服覺塊刺痛是其驗也

●喘息欲絕

【本草方】韭汁飲一升效

●奔豚氣痛

【肘後方】薤白搗汁飲之

【聖濟錄】上沖心腹繫甲醋炙三兩京三稜煨二

兩桃仁去皮尖四兩湯浸研汁三升煎二升入

末煎良久下醋一升煎如錫以瓶收之每空心

酒服半匙

【外臺祕要】枳實炙爲末飲下方寸七日三夜一

●氣脹氣蠱

【朱氏集驗】萊菔子研以水瀘汁浸縮砂一兩一夜炊乾又浸又炒凡七次爲末每米飲服一錢



如神

●諸氣不調

【和劑局方】調中快氣心腹刺痛小烏沉湯香附子擦去毛焙二十兩烏藥十兩甘草炒一兩為末每服二錢鹽湯隨時點服

【食醫心鏡】馬齒莧粥食之

●心腹結氣

【孟詵食療】杏仁桂枝橘皮訶黎勒皮等分為丸每服三十九丸白湯下無忌

●伏梁結氣

【聖惠方】在心下不散桃奴三兩為末空心溫酒每服二錢

【小品方】伏梁心積銅器盛白馬尿一升旦旦服之妙

●氣積鬱冒

【總錄】人有氣從臍左右起上衝胸滿氣促鬱冒厥者用梨木灰伏在雞卵殼中白皮紫苑麻黃去節等分為末糊丸梧子大每服十九丸酒下亦可為末服方寸匕或煮湯服

●結氣欬逆

【本草方】三十年者服之亦瘥方同上

●脾元氣痛

【經驗方】發歇不可忍用茱萸一兩桃仁一兩和炒茶焦去茶取桃仁去皮尖研細葱白三莖煨熟酒浸溫服

●男女氣脹

【斗門方】心悶飲食不下冷熱相攻久患不愈厚朴薑汁炙焦黑為末以陳米飲調服二錢七日

三服

【廣濟方】久患氣脹烏牛尿一升空心温服氣散而止

●下氣消食

【食醫心鏡】訶黎一枚爲末瓦器中水一大升煎三兩沸下藥更煎三五沸如麴塵色入少許鹽飲之

●氣嗽日久

【經驗方】生訶黎一枚含之嚙汁擦後口爽不知食味却煎檳榔湯一盞服之便有味此知連州成密方也

●五臟諸氣

【丹溪纂要】益少陰血用梔子炒黑研末生薑同煎飲之甚捷

●胸脅氣逆

【聖濟總錄】脹滿茯苓一兩人參半兩每服三錢水煎服日三

●上氣發熱

【肘後方】因奔趁走馬後飲冷水所致者竹葉一斤橘皮三兩水一斗煎五升細服三日一劑

●氣逆煩滿

【普濟方】水羊角燒研水服方寸匕

●氣血撮痛

【經驗方】不可忍者用黑狗膽一個半乾半濕剉開以篋子排丸綠豆大蛤粉滾過每服四十九以鐵淬酒送下痛立止

●烏沉湯

【和劑局方】治一切氣一切冷補五臟調中壯陽

暖腰膝去邪氣冷風麻痺膀胱腎間冷氣攻冲  
背脊俯仰不利風水毒腫吐瀉轉筋癱瘓刺痛  
中惡心腹痛鬼氣疰忤天行瘴疫婦人血氣痛  
用天台烏藥一百兩沉香五十兩人參三兩甘  
草燼四兩爲末每服半錢薑鹽湯空心點服

●靈脂散

【永類鈴方】治丈夫脾積氣痛婦人血崩諸痛飛  
過五靈脂炒煙盡爲度研末每服一錢温酒調  
下此藥氣惡難吃燒存性乃妙也或以酒水童  
便煎服名抽刀散治產後心腹脅肋腰痛能  
散惡血如心煩口渴者加炒蒲黃減半霹靂酒  
下腸風下血者煎烏梅柏葉湯下中風麻痺痛  
者加草烏五分用童便水酒煎服

●膜外氣痛

【勝金方】及氣塊延胡索不限多少爲末猪胰一  
具切作塊子炙熟蘸末頻食之

痰飲門

●痰結胸中

【聖惠方】不散蜜佗僧一兩醋水各一盞煎乾爲  
末每服二錢以酒水各一小盞煎一盞温服少  
頃當吐出痰涎爲妙

【曾世榮活幼全書】鶴頂丹不問陰陽虛實炒過  
陷胸瀉心等藥用銀硃半兩明礬一兩同研以  
熨斗盛火瓦盞盛藥熔化急刮搓丸每服一錢  
真茶入薑汁少許服之心上隱隱有聲結胸自  
散不動臟腑不傷真氣明礬化痰銀硃破積故  
也

【仲景傷寒論】正在心下按之則痛脈浮滑者小陷胸湯主之半夏半升黃連一兩栝樓實大者一個水六升先煮栝樓至三升去滓內二味煮取二分三服

【活法機要方】結痰不出語音不清年久者亦宜玉粉九半夏兩桂心一字草烏頭半字爲末薑汁浸餅蒸丸芡子大每服一丸夜臥含嚥

【聖惠方】皂莢三十挺去皮切水五升浸一夜按取汁慢熬至可丸丸如梧子大每食後鹽漿水下十丸 又釣痰膏用半夏醋煮過以皂角膏和勻入明礬少許以柿餅搗膏丸如彈子大噙之

●胸中痰飲

【外臺祕要】傷寒熱病瘡疾須吐者並以鹽湯吐

之

【千金方】恆山甘草各一兩水五升煮取一升去滓入蜜二合溫服七合取吐不吐再服

【集解】時珍曰按漢書陸賈傳南越尉陀獻桂蠹二器又大業拾遺錄云隋時始安獻桂蠹四瓶以蜜漬之紫色辛香有味啖之去痰飲之疾則此物自漢隋以來用充珍味矣

●痰飲頭痛

【深師方】往來寒熱雲母粉二兩煉過恆山一兩爲末每服方寸匕湯服取吐忌生葱生菜

【外臺祕要】胸中痰澀頭痛不欲食礬石一兩水二升煮一升納蜜半合頻服須臾大吐未吐飲少熱湯引之

【發明】葛洪肘后方治胸中有痰頭痛不欲食氣

壯者用松蘿卽松樹寄生牡蘘三兩瓜蒂三十枚酒一升二合漬再宿旦飲一合取吐不吐晚再服一合孫思邈千金方治胸膈痰辟積熱斷膈湯用松蘿甘草各一兩恆山三兩瓜蒂二十一枚水酒各一升半煮取一升分三服取吐

●痰飲吐水

【千金翼方】無時節者其原因冷飲過度遂令脾胃氣弱不能消化飲食入胃皆變成冷水反吐不停赤石脂散主之赤石脂一斤搗篩服方寸匕酒飲自住稍加至三七服盡一斤則終身不吐痰水又不下痢補五臟令人肥健有人痰飲服諸藥不效用此遂愈

●風痰迷悶

【和劑局方】碧霞丹用石綠十兩烏頭尖附子尖

嫩梢各七十個爲末糊丸芡子大每服一九薄荷汁入酒半合化下須臾吐出痰涎 又發明下頰曰今醫家多用吐風痰其法揀上色精好綠青研篩水飛再研如風痰眩悶取二三錢同生龍腦三四豆許研勻以生薄荷汁合酒溫調服之偃臥須臾涎自口角流出 愈不嘔吐其功速于他藥今人用之比比皆效故著之宗奭曰同礪砂作吐上涎藥驗則驗矣亦能損心時珍曰痰在上宜吐之在下宜利之亦須觀人之虛實強弱而察其脈可投則投之初虞世有金虎碧霞之戒正此意也金虎丹治風痰用天雄膩粉諸藥者

●風痰壅滯

【經驗方】鬱金一分藜蘆十分爲末每服一字溫

漿水調下仍以漿水一盞漱口以食壓之

【聖惠方】風痰上壅咽喉不利白藥三兩黑牽牛半兩同炒香去牽牛一半爲末防風三兩和勻每茶服一錢

●風痰疰痛

【續傳信方】躑躅花天南星并生時同搗作餅飯上蒸四五遍以稀葛囊盛之臨時取焙爲末蒸餅丸梧子大每服三丸溫酒下腰脚骨痛空心服手臂痛食後服大良

●壯人風痰

【王頌易簡方】及中風中氣初起星香飲用南星四錢木香一錢水二盞生薑十四片煎六分溫服

●老小風痰

【譚氏小兒方】膽礬末一錢小兒一字溫醋湯調

下立愈吐出涎便醒

【普濟方】老人風痰大腑熱不識人及肺熱痰實不利半夏炮七次焙硝石半兩爲末入白麵搗勻水和丸綠豆大每薑湯下五十九

●膈壅風痰

【御藥院方】半夏半斤酸漿浸一宿溫湯洗五十遍去惡氣日乾爲末漿水搜作餅日乾再研爲末每五兩入生龍腦一錢以漿水濃脚和丸雞頭子大紗袋盛避風處陰乾每服一錢好茶或薄荷湯下

●風痰濕痰

【葉氏方】青壺丸半夏一斤天南星半兩各湯泡晒乾爲末薑汁和作餅焙乾入神麴半兩白朮

末二兩枳實末二兩薑汁麵糊丸梧子大每服

五十九薑湯下

●風痰喘逆

【活法機要】兀兀欲吐眩暈欲倒半夏一兩雄黃

三錢爲末薑汁浸蒸餅丸梧子大每服三十九

薑湯下已吐者加板榔

【簡便方】木槿花晒乾焙研每服一二匙空心沸

湯下白花尤良

●大風熱痰

【蘇頌圖經本草】用黃老茄子大者不計多少以

新瓶盛埋土中經一年盡化爲水取出入苦參

末同丸梧子大食已及臥時酒下三十九甚效

此方由江南人傳

●一切風痰

【勝金方】白殭蠶七個直者細研薑汁調灌之

●宣吐風痰

【發明】方同風痰迷悶

●熱丸

【濟生方】喘息不通呼吸欲絕雌黃一兩雄黃一

錢爲末化蠟丸彈子大每服一丸半夜時投熱

糯米粥中食之

●暖胃除痰

【普劑方】進食消食肉豆蔻二個半夏薑汁炒五

錢木香二錢半爲末蒸餅丸芥子大每食後津

液下五九十九

●搜風化痰

【和劑局方】定志安神利頭目辰砂化痰丸用半

夏麴三兩天南星泡一兩辰砂枯礬各半兩爲



末薑汁打糊丸梧子大每服三十九食後薑湯送下

●痰熱喘嗽

【保命集】痰涌如泉石膏寒水石各五錢爲末每人參湯服三錢

【潔古活法機要】煩熱面赤口燥心痛脈洪數者

小黃丸用半夏天南星各一兩黃芩一兩半爲

末薑汁浸炒餅丸梧子大每服五七十九食後

薑湯下

【勝金方】用蘿蔔子末溫水調服三錢良久吐出

涎沫如是癱瘓風者以此吐後用緊疎藥疎後

服和氣散取瘥 丹溪吐法用蘿蔔子半升搗

細以水一碗濾取汁入香油及蜜些許溫服後

以桐油浸過晒乾鵝翎探吐

【本草方】用連殼蝦半斤入葱薑醬煮汁先吃蝦後吃汁緊束肚腹以翎探引取吐

●痰氣膈脹

【簡便方】砂仁搗細以蘿蔔汁浸透焙乾爲末每服一二錢食遠沸湯下

●上焦熱痰

【袖珍方】欬嗽製過半夏一兩片黃芩末二錢薑

汁打糊丸綠豆大每服七十九淡薑湯食後服

此周憲王親製方也

【簡便方】藕汁梨汁各半盞和服

●肺熱痰嗽

【濟生方】製半夏栝樓仁各一兩爲末薑汁打糊

丸梧子大每服二三十丸白湯下或以栝樓瓢

煮下

●停痰宿飲

【仁存方】風氣上攻胸膈不利香附皂莢水浸半

夏各一兩白礬末半兩薑汁麵糊丸梧子大每

服三四十九薑湯隨時下

【和劑局方】胸膈滿悶氣短惡心飲食不下或吐

痰水茯苓半夏湯用半夏泡五兩茯苓三兩每

服四錢薑汁七片水一鍾半煎七分甚捷徑

【本草方】喘咳嘔逆全不入食威靈仙焙半夏薑

汁浸焙為末用皂莢水熬膏丸綠豆大每服七

丸至十九薑湯下一日三服一月為驗忌茶麵

【發明】按朱氏集驗方云中丞常子正苦痰飲每

食飽或陰晴節變率同十日一發頭疼背寒嘔

吐酸汁即數日伏枕不食服藥罔效宣和初為

順昌司祿于太守蔡達道席上得吳仙丹方服

之遂不再作每遇飲食過多腹滿服五七十丸

便已少頃小便作茶莢氣酒飲皆隨小便而去

前後痰藥甚衆無及此者用吳茱萸湯泡七次

茯苓等分為末煉蜜丸梧子大每熟水下五十

丸 梅楊卿方只用茶莢酒浸三宿以茯苓沫

拌之日乾每吞百粒温酒下

●痰飲咳嗽

【篋中方】含奇丸用曹州葶藶子一兩紙襯炒令

黑知母一兩貝母一兩為末棗肉半兩砂糖一

兩半和丸彈子大每以新綿裹一丸含之嚙津

甚者不過三丸

●胸脅痰飲

【摘元方】白芥子五錢白朮一兩為末棗肉搗丸

梧子大每白湯服五十九

●痰飲宿水

【崔行功纂要方】桃花散收桃花陰乾為末溫酒

服一合取利覺虛食少粥不似轉下藥也

●痰膈氣脹

【楊氏簡便】陳皮三錢水煎熱服

●肺壅痰滯

【聖惠方】上焦不利卒然咳嗽杉木屑一兩皂莢

去皮酥炙三兩為末蜜丸梧子大每米飲下十

丸一日四服

●冷積痰氣

【發明】按方勺泊宅編云橘皮寬膈降氣消痰飲

極有殊功他藥貴新惟此貴陳外舅莫強中令

豐城時得疾凡食已輒胸滿不下百方不效偶

家人合橘紅湯因取嘗之似相宜連日飲之一

日忽覺胸中有物墜下大驚目瞪自汗如雨須

臆腹痛下數塊如鐵彈子臭不可聞自此胸次

廓然其疾頓愈蓋脾之冷積也其方用橘皮去

瓢一斤甘草鹽花各四兩水五碗慢煎煮乾焙

研為末白湯點服名二賢散治一切痰氣特驗

●痰氣喘急

【簡便單方】生山藥搗爛半碗入甘蔗汁半碗和

勻燉熱飲之立止

●一切痰氣

【簡便方】皂莢燒存性蘿蔔子炒等分薑汁入煉

蜜丸梧子大每服五七十九白湯下

●冷痰痞滿

【普濟方】黑芥子白芥子大戟甘遂胡椒桂心等

分為末糊丸梧子大每服十九薑湯下名黑芥

丸

●痰涎爲害

【御藥院方】板榔爲末白湯每服一錢

●中焦痰涎

【和劑局方】利咽清頭目進飲食半夏泡七次四

兩枯礬一兩爲末薑汁打糊丸或煮棗肉和丸

梧子大每薑湯下十五丸寒痰加丁香五錢熱

痰加寒水石煨四兩名玉液丸

●濕痰咳嗽

【活法機要】面黃體重嗜臥驚兼食不消脈緩者

白朮丸用半夏南星各一兩白朮一兩半爲末

薄荷糊丸梧子大每服五七十九薑湯下

●氣痰咳嗽

【活法機要】面白氣促灑淅惡寒憂愁不樂脈瀟

者玉粉丸用半夏南星各一兩官桂半兩爲末

糊丸梧子大每服五十九薑湯下

●冷痰虛熱

【王好志醫壘元戎】諸虛寒熱冷香湯用沉香附

子炮等分水一盞煎七分露一夜空心溫服

●痰澀卒風

【外臺祕要】頭痛不欲食礬石一兩水二升煮一

升納蜜半合類服須臾大吐未吐飲少熱湯引

之

【千金方】生薑二兩附子一兩水五升煮取二升

分再服忌猪肉冷水

●心下留飲

【梅師方】心下有水白朮三兩澤瀉五兩水三升

煎一升半分三服

【張仲景金匱玉函】堅滿脈伏其人欲自利反快  
甘遂半夏湯用甘遂大者三枚半夏十二個以  
水一升煮半升去滓入芍藥五枚甘草一節水  
二升煮半升去滓以蜜半升同煎八合頓服取  
利其效如神

●積聚痰涎

【孫氏仁存方】結于胸膈之間心腹疼痛日夜不  
止或乾嘔曠食者炒粉丸主之用蚌粉一兩以  
巴豆七粒同炒赤去豆不用醋和粉丸梧子大  
每服二十九薑酒下丈夫臍腹痛茴香湯下女  
人血氣痛童便和酒下

●痰迷心竅

【和劑局方】壽星丸治心膽被驚神不守舍或痰  
迷心竅恍惚健忘妄言妄見天南星一斤先掘

土坑一尺以炭火三十斤燒赤入酒五升滲乾  
乃安南星在內盆覆定以灰塞之勿令走氣次  
日取出爲末琥珀一兩珠砂二兩爲末生薑汁  
打麵糊丸梧子大每服三十九至五十九人參  
石菖蒲湯下一日三服

●飲酒痰癖

【聖惠方】兩脅脹滿時復嘔吐腹中如水聲恬樓  
實去殼焙一兩神麴炒半兩爲末每服二錢葱  
白湯下

●痰注臂痛

【楊仁齋直指方】天仙藤白朮羌活白芷梢各三  
錢片子薑黃六錢半夏製五錢每服五錢薑五  
片水煎服仍間服千金五套丸

●頑痰不化

【瑞竹堂方】石青一兩石綠半兩並水飛為末麴

糊丸綠豆大每服十九丸溫水下吐去痰一二梳

不損人

●痰疾

【發明】洪邁云邁有痰疾因晚對上遣使諭令以

胡桃肉三枚生薑三片臥時嚼服即飲湯兩三

呷又再嚼桃薑如前數即靜臥必愈邁還玉堂

如旨服之及旦而痰消嗽止又溧陽洪輯幼子

病痰喘凡五晝夜不乳食醫以危告其妻夜夢

觀音授方令服人參胡桃湯輯急取新羅人參

寸許胡桃肉一枚煎湯一蜺壳許灌之喘即定

明日以湯剝去胡桃皮用之喘復作仍連皮用

信宿而瘳此方不載書冊蓋人參定喘胡桃連

皮能斂肺故也

●化食消痰

【心鏡方】胸中熱氣用橘皮半兩微炒為末水煎

代茶細呷

●化痰利痰

【筆峯方】化痰降氣止咳解鬱消食除脹有奇效

用貝母去心一兩薑製厚朴半兩蜜丸梧子大

每白湯下五十九

【簡便方】清上化痰利咽膈治風熱以薄荷末煉

蜜丸芡子大每噙一九白沙糖和之亦可

【王璆百一選方】清氣化痰三仙丸治中脘氣滯

痰涎煩悶頭目不清生南星去皮半夏各五錢

並湯泡七次為末自然薑汁和作餅鋪竹篩內

以楮葉包覆待生黃成麴晒乾每用二兩入香

附末一兩糊丸梧子大每服四十九食後薑湯

下

【袖珍方】化痰鎮心祛風利膈辰砂半夏丸用半

夏一斤泡七次爲末篩過以水浸三日生絹濾

去滓澄清去水曬乾一兩入辰砂一錢薑汁打

糊丸梧子大每薑湯下七十九此周府方也

●消痰開胃

【斗門方】去胸膈壅滯用半夏湯泡焙乾爲末自

然薑汁和作餅濕紙裹煨香以熱水二盞同餅

二錢入鹽五分煎一盞服之大壓痰毒及酒食

傷極驗 經驗方用半夏天南星各二兩爲末

水五升入壘內浸一宿去清水焙乾研細每服

二錢水二盞薑三片煎服

●支飲作嘔

【本草方】支飲苦胃仲景澤瀉湯用澤瀉五兩白

朮二兩水二升煮一升分二服 深師方先以

水二升煮二物取一升又以水一升煮澤瀉取

五合二汁分再服病甚欲眩者服之必瘥

●生津化痰

【主治時珍方】木犀花同百藥煎孩兒茶作膏餅

噉之能生精辟臭化痰

●生犀丸

【御藥院方】宋真宗賜高相國去痰清目進飲食

生犀丸用川芎十兩緊小者粟米泔浸二日換

切片子日乾爲末分作兩料每料入麝腦各一

分生犀半兩重湯煮蜜和丸小彈子大茶酒嚼

下一丸痰加硃砂半兩膈痰加牛黃一分水飛

鐵粉一分頭目昏加細辛一分口眼喎斜加泡

天南星一分



●滾痰丸

【王隱君養生主論】通治痰為百病惟水瀉雙娠者不可服礞石焰硝各二兩煨過研飛晒乾一兩大黃酒蒸八兩黃芩酒洗八兩沉香五錢為末水丸梧子大常服一二十九欲利大便則服一二百丸溫水下

●天麻丸

【普濟方】消風化痰清利頭目寬胸利膈治心忪煩悶頭暈欲倒項急肩背拘倦神昏多睡肢節煩痛皮膚瘙癢偏正頭痛鼻翳面目虛浮並宜服之天麻半兩芎藭二兩為末煉蜜丸如芡子大每食後嚼一丸茶酒任下

●控涎丹

【三因方】治痰涎留在胸膈上下變為諸病或頸

項胸背腰脅手足膀脾隱痛不可忍筋骨牽引鈞痛走易及皮膚麻痺似乎癱瘓不可誤作風氣風毒及瘡疽施治又治頭痛不可舉或睡中流涎或咳唾喘息或痰迷心竅並宜此藥數服痰涎自失諸疾尋愈紫大戟白甘遂白芥子微炒各一兩為末薑汁打麵糊丸梧子大每服七丸或二十九丸以津液嚥下若取利則服五六十丸

●法製半夏

【御藥院方】清痰化飲壯脾順氣用大半夏湯洗七次焙乾再洗如此七轉以濃米泔浸一日夜每一兩用白礬一兩半溫水化浸五日焙乾以鉛白霜一錢溫水化又浸七日以漿水慢火內煮沸焙乾收之每嚼一二粒薑湯送化下

【御藥院方】消風化痰清熱降氣利咽大半夏湯  
浸焙製如上法每一兩入龍腦五分硃砂爲衣  
染之先鋪燈草一重約一指厚排半夏于上再  
以燈草蓋一指厚以炒豆焙之候乾取出每嚼  
一兩粒溫水送下

●潤下丸

【丹溪方】治濕痰因火泛上停滯胸膈欬唾稠粘  
陳橘皮半斤入砂鍋內下鹽五錢化水淹過煮  
乾粉甘草二兩去皮蜜炙各取淨末蒸餅和丸  
梧桐子大每服百丸白湯下

●吳仙丹方

【發明】按朱氏集驗方云中丞常子正苦痰飲每  
食飽或陰晴節變率同十日一發頭冷背寒嘔  
吐酸汁卽數日伏枕不食服藥罔效宜和初爲

順昌司祿于太守蔡達道席上得吳仙丹方服  
之遂不再作每遇飲食過多腹滿服五七十九  
便已少頃小便作茱萸氣酒飲皆隨小便而去  
前後痰藥甚衆無及此者用吳茱萸湯泡七次  
茯苓等分爲末煉蜜丸梧子大每熟水下五十  
丸 梅楊卿方只用茱萸酒浸三宿以茯苓沫  
拌之日乾每吞百粒溫酒下

●瓜蒂散

【發明】張機曰病如桂枝證頭不痛項不強寸脈  
微浮胸中痞鞭氣上衝咽喉不得息者此爲胸  
中有寒也當吐之太陽中暈身熱頭痛而脈微  
弱此夏月傷冷水水行皮中也宜吐之少陽病  
頭痛發寒熱脈緊不大是膈上有痰也宜吐之  
病胸上諸實鬱鬱而痛不能食欲人按之而反

有濁唾下利日十餘行寸口脈微弦者當吐之  
懊憹煩躁不能眠未經汗者謂之實煩當吐之  
宿食在上脘者當吐之並宜以瓜蒂散主之其  
方用瓜蒂二錢半熬黃赤小豆二錢爲末每用  
一錢以香鼓一合熱湯七合煮糜去滓和服少  
少加之快吐乃止惟諸亡血虛家不可與瓜蒂  
散也

● 論痰

【發明】好古曰經云腎主五液化爲五濕自入爲  
唾入肝爲泣入心爲汗入脾爲痰入肺爲涕有  
痰曰嗽無痰曰欬痰者因欬而動脾之濕也半  
夏能泄痰之標不能泄痰之本泄本者泄腎也  
欬無形痰有形無形則潤有形則燥所以爲流  
濕潤燥也俗以半夏爲肺藥非也止嘔吐爲足

陽明除痰爲足太陰柴胡爲之使故今柴胡湯  
中用之雖爲止嘔亦助柴胡黃芩主往來寒熱  
是又爲足少陽陽明也宗爽曰今人惟知半夏  
去痰不言益脾蓋能分水故也脾惡濕濕則滯  
困因則不能治水經云水勝則瀉一男子夜數  
如廁或教以生薑一兩半夏大棗各三十枚水  
一升磁瓶中慢火燒爲熟水時呷之便已也趙  
繼宗曰丹溪言二陳湯治一身之痰世醫執之  
凡有痰者皆用夫二陳內有半夏其性燥烈若  
風痰寒痰濕痰食痰則相宜至于勞痰失血諸  
痰用之反能燥血液而加病不可不知機曰俗  
以半夏性燥有毒多以貝母代之貝母乃太陰  
肺經之藥半夏乃太陰脾經陽明胃經之藥何  
可代也夫欬嗽吐痰虛勞吐血或痰中見血諸

鬱咽痛喉痺肺癰肺痿癰疽婦人乳癰此皆貝母爲向導半夏乃禁用之藥若涎者脾之液美味膏梁炙博皆能生脾胃濕熱故涎化爲痰久則痰火上攻令人昏憤口噤偏廢僵仆蹇澹不語生死旦夕自非半夏南星曷可治乎若以貝母代之則翹首待斃矣時珍曰脾無留濕不生痰故脾爲生痰之源肺爲貯痰之器半夏能主痰飲及腹脹者爲其體滑而味辛性溫也涎滑能潤辛溫能散亦能潤故行濕而通大便秘竅而泄小便所謂辛走氣能化液辛以潤之是矣潔古張氏云半夏南星治其痰而欬嗽自愈

●痰之爲物論

【發明】時珍曰痰涎之爲物隨氣升降無處不到入于心則迷竅而成癩癩妄言妄見入于肺則

寒竅而成欬唾稠粘喘急背冷入于肝則留伏蓄聚而成脅痛乾嘔寒熱往來入于經絡則麻痺疼痛入于筋骨則頸項胸背腰脅手足牽引隱痛陳無擇三因方並以控涎丹主之殊有奇效此乃治痰之本痰之本水也濕也得氣與火則凝滯而爲痰爲飲爲涎爲涕爲癖大戟能泄臟腑之水濕甘遂能行經絡之水濕白芥子能散皮裏膜外之痰氣惟善用者能收奇功也

●論五飲

【發明】時珍曰夫飲有五皆由內啜水漿外受濕氣鬱蓄而爲留飲流于肝則爲支飲令人喘欬寒熱吐沫背寒流于肺則爲懸飲令人欬唾痛引缺盆兩脅流于心下則爲伏飲令人胸滿嘔吐寒熱眩暈流于腸胃則爲痰飲令人腹鳴吐

水胸脅支滿或作泄瀉忽肥忽瘦流于經絡則為溢飲令人沉重注痛或作水氣臑腫芫花大戟甘遂之性逐水消濕能直達水飲窠囊隱僻之處但可徐徐用之取效甚捷不可過劑洩人真元也

●五飲酒癖

【惠民和劑局方】一留飲水停心下二癖飲水在兩脅下三痰飲水在胃中四溢飲水在五臟間五流飲水在腸間皆因飲食胃寒或飲茶過多致此倍朮丸用白朮一斤乾薑炮桂心各半斤為末蜜丸梧子大每溫水服二三十丸

●痰厥氣

【集元方】心頭尚溫者千年石灰一合水一盞煎滾去清水再用一盞煎極滾澄清灌之少頃痰

下自甦

虛損門

●元氣虛寒

【濟生方】精滑不禁大腑溲泄手足厥冷陽起石煨研鍾乳粉各等分酒煮附子末同麵糊丸梧子大每空心米飲服五十九以愈為度

【發明】頌曰今人取雀肉和蛇床子熬膏和藥丸服補下有效謂之驛馬丸此法起于唐世云明皇服之有驗 時珍曰聖濟總錄治虛寒雀附丸用肥雀肉三四十枚同附子熬膏丸藥亦祖此意也

【千金翼】用精羊肉一斤碎白石英三兩以肉包之外用荷葉裹定於一石米下蒸熟取出去石

英和葱薑作小餛飩子每日空腹以冷漿水吞  
一百枚甚補益

●虛損風濕

【經心錄】陸杭膏用牛髓羊脂各二升白蜜薑汁  
酥各三升煎三上三下合成膏隨意以溫酒和  
服

●陽氣虛損

【簡便方】用兔絲子熟地黃等分爲末酒糊丸梧  
子大每服五十九氣虛人參湯下氣逆沉香湯  
下 經驗方用兔絲子酒浸十日水淘杜仲焙  
研蜜炙一兩以薯蕷末酒煮糊丸梧子大每空  
心酒下五十九

●老人虛損

【養老方】風濕腰肢痺痛慈石三十兩白石英二

十兩搥碎甕盛水二斗浸于露地每日取水作  
粥食經年氣力強盛顏如童子

【食治方】補益老人治老人臟腑虛損羸瘦陽氣

乏弱雀兒五隻如常治粟米一合葱白三莖先  
炒雀熟入酒一合煮少時入水二盞下葱米作  
粥食

【多能鄙事】白羊脊骨一具剉碎水煮取汁枸杞

根到一斗水五斗煮汁一斗五升合汁同骨煮  
至五升去骨瓷盒盛之每以一合和溫酒一盞  
調服

●補益虛羸

【金匱玉函】小兒羸瘦甘草三兩炙焦爲末蜜丸  
綠豆大每溫水下五九日二服

【外臺祕要】大人羸瘦甘草三兩炙每旦以小

煮三四沸頻服之良

【千金翼】用豬肚一具入人參五兩蜀椒一兩乾

薑一兩半葱白七個粳米半升在內密縫煮食

【張文仲方】久病虛羸不生肌肉水氣在脅下不

能飲食四肢煩熱者羊胃一枚白朮一升切水

二斗煮九升分九服日三不過三劑瘥

【千金方】鹿角煎用鹿角一具枸杞根二升各以

水一斗煎汁五升和勻共煎五升日二服

●男女虛損

【經驗方】男子女人五勞七傷下元久冷一切風

病四肢疼痛駐顏壯氣烏鬚髭補骨脂一斤浸

一宿晒乾却用烏油麻一斤和炒令麻子聲絕

簸去只取補骨脂爲末醋煮麵糊丸如梧子大

每服二三十丸空心温酒鹽湯任下

【肘后方】或大病後或積勞後四體沉滯骨肉酸

痛呼吸少氣或小腹拘急腰背強痛咽乾唇燥

或飲食無味多臥少起久者積年輕者百日漸

至瘦削用生地黄二斤麵一斤搗爛炒乾爲末

每空心酒服方寸七日三服忌如法

【孫氏集效方】坎離丸治男子婦人諸虛百損小

便淋漓遺精白濁等證黃蘗去皮切二斤熟糯

米一升童子小便浸之九浸九晒蒸過晒研爲

末酒煮麵糊丸梧子大每服一百丸温酒送下

●補益虛損

【千金方】極益房勞用羅摩四兩枸杞根皮五味

子柏子仁酸棗仁乾地黄各三兩爲末每服方

寸七酒下日三服

【醫學發明】水芝丹用蓮實半升酒浸三宿以牙



猪肚一個洗淨入蓮子在內縫定煮熟取出晒乾爲末酒煮米糊九梧子大每服五十九食前温酒下

【本草方】洗曰虛弱人用烏雄雞一隻洗淨五味煮極爛食生則反損人或五味淹炙食亦良

【千金翼崔尙書方】鍾乳粉一兩袋盛以牛乳一升煎減三分之一去袋飲乳日三 又方白石英末三斤和黑豆與十歲以上生犢犍牛食每日與一兩七日取牛乳或熱服一升或作粥食其糞以種菜食百無所忌能潤臟腑澤肌肉令人壯健

●虛勞瘦弱

【正要】用頗兒必卽羊脛骨四十枚以水一升熬減大半去滓及油待凝任食

●虛損積勞百病

【發明】時珍曰道藏經有菖蒲傳一卷其語粗陋今略節其要云菖蒲者水草之精英神仙之靈藥也其法采緊小似魚鱗者一斤水及米泔浸各一宿刮去皮切暴乾搗篩糯米粥和勻入熱蜜搜和丸如梧子大稀葛袋盛置當風處令乾每旦酒飲下三十九臨臥更服三十九至一月消食二月痰除服至五年骨髓充顏色澤白髮黑齒落更生其藥以五德配五行葉青花赤節白心黃根黑能治一切諸風手足頑痺癱緩不遂五勞七傷填血補腦堅骨髓長精神潤五臟裨六腑開胃口和血脈益口齒明耳目澤皮膚去寒熱除三尸九蟲天行時疾瘴疫瘦病瀉痢痔漏婦人帶下產後血運並以酒服

【簡便方】久服髮白再黑返老還童用女貞實十

月上巳日收陰乾用時以酒浸一日蒸透晒乾

一斤四兩旱蓮草五月收陰乾十兩為末桑椹

子三月收陰乾十兩為末煉蜜丸如梧子大每

服七八十丸淡鹽湯下若四月收桑椹搗汁和

藥七月收旱蓮搗汁和藥即不用蜜矣

【姚生坦方】治男女因積虛或大病後虛損沉困

酸疼盜汗少氣喘掇或小腹拘急心悸胃弱多

臥少起漸至瘦削若年深五臟氣絕則難治也

用烏雞雌者一頭治如食法以生地黃一斤切

飴糖一升納腹內縛定銅器貯于瓶中蒸五升

米熟取出食肉飲汁勿用鹽一月一作神效

●虛損勞傷

【肘後方】羊腎一枚米一升水一斗煮九升服日

三

【千金方】用新豬脂煎取一升入葱白一握煎黃

平旦服至三日以枸杞一斤水三斗煮汁入羊

肝一具羊脊膂肉一條麴末半斤着葱豉作羹

食

【集簡方】德生丹用無病婦人乳三酒杯將磁碟

晒極熱置乳於中次入麝香末少許木香末二

分調勻服後飲濃茶一酒盞即陽敗次日服接

命丹用乳三酒杯如前晒碟盛人乳并人胞末

一具調服服畢面膝俱赤如醉思睡只以白粥

少少養之

●脫陽虛症

【救急方】四肢厥冷不省人事或小腹緊痛冷汗

氣喘炒鹽熨臍下氣海取煖

【本草方】凡人大吐大泄之後四肢厥冷不省人事或與女子交後小腹腎痛外腎搐縮冷汗出厥逆須臾不救先以葱白炒熱熨臍後以葱白三七莖搗爛用酒煮灌之陽氣卽回此華陀救卒病方也

●虛勞體痛

【千金方】天門冬末酒服方寸七日三忌鯉魚

●心氣虛損

【百一選方】猪腰子一枚水二碗煮至一碗半切碎入人參當歸各半兩煮至八分吃腰子以汁送下未盡者同滓作丸服

●補虛精氣

【奇效良方】黃精枸杞子等分搗作餅日乾爲末煉蜜丸梧子大每湯下五十九

●骨虛勞極

【濟生方】面腫垢黑脊痛不能久立血氣衰憊髮落齒枯甚則喜睡用鹿角二兩牛膝酒浸焙一兩半爲末煉蜜丸梧子大每服五十九空心鹽酒下

●虛勞困乏

【必效方】地黃一石取汁酒三斗攪勻煎收日服

●病後虛弱

【外臺方】取七歲以下五歲以上黃牛乳一升水四升煎取一升稍稍飲至十日止

●虛勞不足

【本草方】糯米入猪肚內蒸乾搗作丸子日日服之

【千金方】五加皮枸杞根白皮各一斗水一石五

斗煮汁七斗分取四斗浸麴一斗以三斗拌飯如常釀酒法待熟任飲

●虛勞客熱

【千金方】枸杞根爲末白湯調服有痼疾人勿服

●虛勞苦渴

【千金方】骨節煩熱或寒用枸杞根白皮切五升麥門冬三升小麥二升水二升煮至麥熟去滓每服一升口渴卽飲

●補益勞傷

【藥性論】精敗而黑用菴蓉四兩水煮令爛薄細切研精羊肉分爲四度下五味以米煮粥空心食

●腎虛腰痛

【崔元亮海上集驗方】用杜仲去皮炙黃一大斤

分作十劑每夜取一劑以水一大升浸至五更煎三分減一取汁以羊腎三四枚切下再煮三五沸如作羹法和以椒鹽空心頓服 聖惠方入薤白七莖 篋中方加五味子半斤

【千金方】用羊腎去膜陰乾爲末酒服二方寸七日三服 正要治卒腰痛羊腎一對哨夫蘭一錢水一盞浸汁入鹽少許塗抹腎上徐徐炙熟空腹食之

●注夏虛勞

【攝生方】枸杞子五味子研細滾水泡封三日代茶飲之效

●定心補腎

【朱氏集驗方】養血返精丸破故紙炒二兩白茯苓一兩爲末沒藥五錢以無灰酒浸高一指煮

化和末丸梧子大每服三十九白湯下昔有服此至老不衰蓋故紙補腎茯苓補心沒藥養血三者既壯自然身安

【邵真人經驗方】補益心腎仙方椒荅丸補益心腎明目駐顏順氣祛風延年真川椒一斤炒去汗白茯苓十兩去皮為末煉蜜為丸梧子大每服五十九空心鹽湯下忌鐵器

●精血耗涸

【濟生方】耳聾口渴腰痛白濁上燥下寒不受峻補者鹿茸酒蒸當歸酒浸各一兩焙為末烏梅肉煮膏搗丸梧子大每米飲服五十九

●男婦怯症

【聖惠方】男用女童便女用男童便斬頭去尾日進二次乾炒餅壓之月餘全愈

●上盛下虛

【活人心統】水火偏盛消中等證黃藥一斤分作四分用醇酒蜜湯鹽水童便浸洗晒炒為末以知母一斤去毛切搗熬膏和丸梧子大每服七十九白湯下

●房後困倦

【趙永庵】人參七錢陳皮一錢水一盞半煎八分食前溫服日再服千金不傳

●房勞黃病

【三十六黃方】體重不眠眼赤如珠心下塊起若瘦十死一生宜烙舌下灸心俞關元二七壯以婦人內衣燒灰酒服二錢

●補精潤肺

【瑞竹方】壯陽助胃煉牛髓四兩胡桃肉四兩杏

仁泥四兩山藥末半斤煉蜜一斤同搗成膏以瓶盛湯煮一日每服一匙空心服之

●大補元陽

【發明】時珍曰白飛霞醫通云取鹿腦及猪骨髓煉成膏每一兩加煉蜜二兩煉勻瓷器密收用和滋補丸藥劑甚妙凡腰痛腎虛寒者以和古方摩腰膏薑汁化一粒擦腎堂則煖氣透入丹田如火大補元陽此法甚佳人鮮知之

●虛損風疾

【攝生衆妙方】接命丹治男婦氣血衰弱痰火上升虛損之症又治中風不語左癱右瘓手足疼痛動履不便飲食少進諸證用人乳二杯香甜白者為佳以好梨汁一杯和勻銀石器內燉滾每日五更一服能消痰補虛生血延壽此乃以

人補人其妙無加

●人參膏

【本草方】用人參十兩細切以活水二十盞浸透入銀石器內桑柴火緩緩煎取十盞濾汁再以水十盞煎取五盞與前汁合煎成膏瓶收隨病作湯使丹溪云多慾之人腎氣衰憊欬嗽不止用生薑橘皮煎湯化膏服之浦江鄭兄五月患痢又犯房室忽發昏暈不知人事手撒目暗自汗如雨喉中痰鳴如拽鋸聲小便遺失脈大無倫此陰虧陽絕之症也予令急煎大料人參膏仍與灸氣海十八壯右手能動再三壯唇口微動遂與膏服一盞半夜後服三盞眼能動盡三斤方能言而索粥盡五斤而痢止至十斤而全安若作風治則誤矣一人背疽服內托十宣藥

已多膿出作嘔發熱六脈沉數有力此潰瘍所忌也遂與大料人參膏入竹瀝飲之參盡十六斤竹伐百餘竿而安後經旬餘值大風拔木瘡起有膿中有紅線一道過肩脾抵右肋予曰急作參膏以芎歸橘皮作湯入竹瀝薑汁飲之盡三斤而瘡潰調理乃安若癰疽潰後氣血俱虛嘔逆不食變症不一者以參芪歸朮等分煎膏服之最妙

●三建湯

【肘后方】治元陽素虛寒邪外攻手足厥冷大小便滑數小便白渾六脈沉微除固冷扶元氣及傷寒陰毒用烏頭附子天雄並炮製去皮臍等分咬咀每服四錢水二盞薑十五片煎八分溫服

●補骨脂丸

【和劑局方】治下元虛敗脚手沉重夜多盜汗縱慾所致此藥壯筋骨益元氣補骨脂四兩炒香兔絲子四兩酒蒸胡桃肉一兩去皮乳香沒藥沉香各研一錢半煉蜜丸如梧子大每服二三十丸空心鹽湯溫酒任下自夏至起冬至止日一服此乃唐宣宗時張壽太尉知廣州得方南番人有詩云三年時節白邊隅人信方知藥力殊奪得春光來在手青娥休笑白鬚鬚

●交感丹

【薩謙齋瑞竹堂經驗方】凡人中年精耗神衰蓋由心血少火不下降腎氣饑水不上升致心腎隔絕營衛不和上則多驚中則痞塞飲食不下下則虛冷遺精愚醫徒知峻補下田非惟不能



生水滋陰而反見衰悴但服此方半年屏去一切暖藥絕嗜欲然後習祕固沂流之術其效不可殫述俞通奉年五十一遇鐵壘城申先生授此服之老猶如少年至八十五乃終也因普示郡人同登壽域香附子一斤新水浸一宿石上擦去毛炒黃茯神去皮木四兩爲末煉蜜丸彈子大每服一丸侵早細嚼以降氣湯下降氣湯用香附子如上法半兩茯神二兩炙甘草一兩半爲末點沸湯服前藥

●戊戌酒

【養老方】大補元氣用黃犬肉一隻煮一沸時搗如泥和汁拌炊糯米三斗入麴如常釀酒候熟每旦空心服之

●戊戌丸

【乾坤祕韜】治男子婦人一應諸虛不足骨蒸潮熱等證用黃童子狗一隻去皮毛腸肚同外腎於砂鍋內用酒醋八分水二升入地骨皮一斤前胡黃芪肉蓯蓉各四兩同煮一日去藥再煮一夜去骨再煮肉如泥搗濾入當歸末四兩蓮肉蒼朮末各一斤厚朴橘皮末十兩甘草末八兩和杵千下丸如梧子大每空心鹽酒下五七十九丸

●紫芝丸

【聖濟總錄】治虛勞短氣胸脅苦傷手足逆冷或時煩躁口乾目視眈眈腹內時痛不思飲食此藥安神保精也紫芝一兩半山辛焙天雄泡去皮柏子仁炒巴戟天去心白茯苓去皮枳實去瓢麸炒各三錢五分生地黃焙麥門冬去心焙

五味子炒半夏製炒附子炒去皮牡丹皮人參各七錢五分遠志去心麥實各二錢五分瓜子仁炒澤瀉各五錢爲末煉蜜丸梧子大每服十五丸漸至三十九丸溫酒下日三服

●白鳳膏

【十藥神書】葛可久云治久虛發熱欬嗽吐痰咳血火乘金位者用黑嘴白鴨一隻取血入溫酒量飲使直入肺經以酒補之將鴨乾擗去毛脅下開竅去腸拭淨入大棗肉二升參苓平胃散末一升縛定用砂甕一個置鴨于內以炭火慢煨將陳酒一瓶作三次入之酒乾爲度取鴨及棗頻食之取愈

●小刀圭

【本草方】韓飛霞曰凡一切虛病皆可服之用小

牛犢兒未交感者一隻臘月初八日或戊巳日殺之去血擗毛洗淨同臟腑不遺分寸大銅鍋煮之每十斤入黃芪十兩人參四兩茯苓六兩官桂良薑各五錢陳皮三兩甘草蜀椒各二兩食鹽二兩醇酒二斗同煮水以八斗爲率文火煮至如泥其骨皆槌碎併濾汁稠汁待冷以甕盛之埋于土內露出甕面凡飲食中皆任意食之或以酒調服更妙肥犬及鹿皆可依此法作之

●返本丸

【乾坤生意】補諸虛百損用黃犍牛肉去筋膜切片河水洗數遍仍浸一夜次日再洗三遍水清爲度用無灰好酒同入壘內重泥封固桑柴文武火煮一晝夜取出如黃沙爲佳焦黑無用焙

乾為末聽用山藥鹽炒過蓮肉去心鹽炒過並去鹽白茯苓小茴香炒各四兩為末每牛肉半斤入藥末一斤以紅棗蒸熟去皮和搗丸梧子大每空心酒下五十九日三服

●異類有情丸

【本草方】韓氏醫通云此方自製者凡丈夫中年覺衰便可服餌蓋鹿乃純陽龜虎屬陰血氣有情各從其類非金石草木比也其方用鹿角霜治法見修治龜板酒浸七日酥炙研各三兩六錢鹿茸燻乾酒洗淨酥塗炙研虎脛骨長流水浸七日蜜塗酥炙各二兩四錢水火煉蜜入豬脊髓九條搗丸梧子大每空心鹽湯下五七九十九如厚味善飲者加豬膽汁一二合以寓降火之義

●斑龍丸

【澹寮方】治諸虛用鹿茸酥炙或酒炙亦可鹿角膠炒成珠鹿角霜陽起石煨紅酒淬肉蓯蓉酒浸酸棗仁柏子仁黃芪蜜炙各一兩當歸黑附子炮地黃九蒸九焙各八錢辰硃砂五分各為末酒糊丸梧子大每空心溫酒下五十九

●二至丸

【楊氏家藏方】補虛損生精血去風濕壯筋骨用鹿角鎊細以真酥一兩無灰酒一升慢火炒乾取四兩麋角鎊細以真酥二兩米醋一升煮乾慢火炒乾取半兩蒼耳子酒浸一宿焙半斤山藥白茯苓黃芪蜜炙各四兩當歸酒浸焙五兩肉蓯蓉酒浸焙遠志去心人參沉香各二兩熟附子一兩通為末酒煮糯米糊丸梧子大每服

五十九 溫酒鹽湯任下日二服

●麋角丸

【本草】治五痿皮緩毛瘁血脈枯槁肌膚薄着筋骨羸弱飲食不美四肢無力爪枯髮落眼昏唇燥用麋角屑一斤酒浸一宿大附子生去皮臍一兩半熟地黄四兩用大麥米一升以一半藉底以一半在上以二布中隔覆炊一日取出藥麥各焙爲末以浸藥酒添清酒煮麥粉爲糊和杵三千下丸如梧子大每服五十九食前用溫酒或米湯送下日三服 一方只用麋角銹屑酥炒黃色五兩熟附子末半兩酒糊丸服

●麋角丸

【千金方】補心神安臟腑填骨髓理腰脚能久立聰耳明目髮白更黑貌老還少凡麋角取當年

新角連腦頂者爲上看角根有研痕處亦堪用

蛻角根下平者不堪取角五具或四具三具二

具一具爲一劑去尖一大寸卽角長七八寸取

勢截斷量把銹得卽于長流水中以竹器盛懸

浸十宿如無長流水處卽于淨盆中滿着水浸

每夜易換軟卽將出削去皺皮以利銹銹取白

處至心卽止以清粟米泔浸兩宿初經一宿卽

乾握瀝去舊水置新絹上曝乾擇去惡物粗骨

皮及銹不勻者以無灰美酒於大磁器中浸經

兩宿其藥及酒俱入淨釜中初用武火煮一食

久後以文火微煎如蟹目沸以柳木篋徐徐攪

不得住手時時添酒以成煎爲度煎時皆須平

且下手不得經宿仍着屑如稀膠卽以牛乳五

升酥一片以次漸下後項藥仍以麋角一條炙

令黃爲末與諸藥同製之檳榔通艸秦芫肉菘  
 蓉人參兔絲子酒浸兩宿別搗晒乾甘草各一  
 兩右搗爲末將膠再煎一食頃似稀稠粥即止  
 火少時投諸藥末相和稠粘堪作丸即以新器  
 盛貯以衆手一時丸如梧子大如粘手着少酥  
 塗手其服餌之法空腹以酒下之初服三十九  
 日加一九加至五十九爲度日二服至一百日  
 內忌房室服經一月腹內諸疾自相驅逐有微  
 利勿怪漸後多泄氣能食患氣者加枳實青木  
 香各一兩服至二百日面皺光澤一年齒落更  
 生強記身輕若風日行數百里二年令人肥飽  
 少食七十以上服之却成後生三年腸作筋體  
 預見未明四年常飽不食目見仙人三十下服  
 之不輟顏一定而不變修合時須在淨室中勿

令陰人雞犬孝子等見婦人服之尤佳如飲酒  
 食麵口乾眼澀內熱者即服三黃丸微利之如  
 此一度發動已後方始調暢也

●麋角丸

【彭祖服食經】彭祖丸使人丁壯不老房室不勞  
 損氣力顏色不衰者莫過麋角其法刮爲末十  
 兩用生附子一枚合之雀卵和丸日服二十九  
 溫酒下二十日大效亦可單熬爲末酒服亦令  
 人不老但性緩不及附子也

●麋角霜丸

【總錄】補元臟駐顏色用麋角一副水浸七日刮  
 去皺皮鏽爲屑盛在一銀瓶內以牛乳汁浸一  
 日常分乳高二寸如乳耗更添直候不耗用油  
 單紙重密封瓶口別用大麥一斗安在別瓶內

約厚三寸上安麋角瓶更用大麥周圍填實露  
瓶口不住火蒸一沸時如鍋內水耗卽旋添熱  
湯須頻看角屑粉爛如麵卽住火取出用細篩  
子漉去乳焙乾每料八兩附子炮製去皮乾山  
藥各三兩爲末蒸棗肉和丸如梧子大每服十  
五丸至二十九空心用溫鹽酒送下煉蜜丸亦  
可

●青木香丸

【發明】頤曰續傳信方著張仲景青木香丸主陽  
衰諸不足用崑崙青木香六路訶子皮各二十  
兩搗篩糖和丸梧子大每空心酒下三十九日  
再服其效尤速鄭駙馬去沙糖用白蜜加羚羊  
角十二兩用藥不類古方而云仲景不知從何  
而得也

●羊肉湯

【金匱要略】張仲景治寒勞虛羸及產後心腹疝  
痛用肥羊肉一斤水一斗煮汁八升入當歸五  
兩黃芪八兩生薑六兩煮取二升分四服胡洽  
方無黃芪千金方有芍藥

●鹿峻丸

【發明】韓悉曰王師授予鹿峻丸方云鹿稟純陽  
而峻者天地初分之氣牝牡相感之精也醫書  
稱鹿茸角血髓大有補益而此峻則入神矣其  
法用初生牡鹿三五隻苑圃馴養每日以人參  
煎湯同一切草藥任其飲食久之以硫黃細末  
和入從少至多燥則漸減周而復始大約三年  
之內一旦毛脫筋露骨盛陽極却以牝鹿隔苑  
誘之欲交不得則精洩於外或令其一交卽設

法取其精瓦器收之香粘如錫是為鮫也用和  
鹿角霜一味為丸空心鹽酒下大起胎羸虛瘵  
危疾凡服滋補丸藥用此入煉蜜和劑絕妙

### 瘵瘵門

#### ●瘵瘵有蟲

【乾坤祕韞】礪砂礪砂兔屎等分為末蜜丸梧子  
大每服七丸生甘草一分新水一種揉汁送下  
自朔至望五更時令病人勿言服之

【發明】機曰按三元延壽書云有人患瘵百物不  
忌見鄰家修菟菟求食之美遂多食而瘵愈又  
有病腮癰者數人多食之亦皆愈

【發明】時珍曰按張杲醫說云越州邵氏女年十  
八病瘵瘵累年偶食鱖魚羹遂愈觀此正與補

勞益胃殺蟲之說相符則仙人劉憑隱士張志  
和之嗜此魚非無謂也

#### ●骨蒸勞病

【外臺祕要】外寒內熱附骨而蒸也其根在五臟  
六腑之中必因患後得之骨肉日消飲食無味  
或皮燥而無光蒸盛之時四肢漸細足踈踵起  
石膏十兩研如乳粉水和服方寸七日再以身  
涼為度

【瑞竹堂方】猪脊髓一條猪膽汁一枚童便一盞  
紫胡前胡黃連烏梅各一錢韭白七根同煎七  
分溫服不過三服其效如神

#### ●虛勞不仁

【發明】頤曰小金牙酒主風疰百病虛勞濕冷緩  
弱不仁不能行步近人用之多效故著其法云



金牙細辛莽草防風地膚子地黃附子茵蘘續  
斷蜀椒蒟醬根各四兩獨活一斤十二物金牙  
搗末別盛練囊餘皆薄切同入一大囊以清酒  
四斗漬之密器泥口四宿酒成溫服二合日二  
次取效

●燒香治癆

【經驗方】用元參一斤甘松六兩爲末煉蜜一斤  
和勻入瓶中封閉地中埋窖十日取出更用灰  
末六兩煉蜜六兩同和入瓶更窖五日取出燒  
之令常聞香疾自愈頌曰初入瓶中封固煮一  
沸時破瓶取搗入蜜別以瓶盛埋地中窖過用  
亦可熏衣

●癆瘵熏法

【奇效方】甘松六兩元參一斤爲末每日焚之

●骨蒸肺痿

【外臺祕要】不能食者蘇遊蘆根飲主之蘆根麥  
門冬地骨皮生薑各十兩橘皮茯苓各五兩水  
一斗煮八升去滓分五服取汗乃瘥

●骨蒸久冷

【飲膳正要】羊肉一斤山藥一斤各煮爛研如泥  
下米煮粥食之

●骨蒸傳尸

【外臺】用羊肉一拳大煮熟皂莢一尺炙以無灰  
酒一升銅鑪內煮三五沸去滓入黑錫一兩令  
病人先啜肉汁乃服一合當吐蟲如馬尾爲效

●五勞七傷

【藥性論】精敗面黑用菘蓉四兩水煮令爛薄細  
切研精羊肉分爲四度下五味以米煮粥空心

食

【千金方】補益方用乾漆柏子仁山茱萸酸棗仁

各等分爲末蜜丸梧子大每服二七丸温酒下

日二服 又方五月五日采五加莖七月七日

采葉九月九日取根爲末篩過每酒服方寸七

日三服久服去風勞

【經驗良方】房事衰弱枸杞葉半斤切粳米二合

豉汁和煮作粥日日食之良

【壽域神方】吐血欬嗽用烏鴉一枚栝樓穰一枚

白礬少許入鴉肚中縫紮煮熟作四服

【本草方】虛冷用肥羊肉一腿蜜蓋煮爛絞取汁

服并食肉

【千金方】白羊頭蹄一具淨治更以稻草燒烟薰

令黃色水煮半熟納胡椒萸荑乾薑各一兩葱

豉各一升再煮去藥食日一具七日即愈

【經驗方】陽虛無力用羊腎一對去脂切肉菘蓉

一兩酒浸一夕去皮和作羹下葱鹽五味食

正要治陽氣衰敗腰脚疼痛五勞七傷用羊腎

三對羊肉半斤葱白一莖枸杞葉一斤同五味

煮成汁下米作粥食之

【朱氏集驗方】吐血虛瘦用初生胞衣長流水中

洗去惡血待清汁出乃止以酒煮爛搗如泥入

白茯神末和丸梧子大每米飲下百丸忌鐵器

●追癆取蟲

【胡雲翔經驗方】用啄木禽一隻硃砂四兩精猪

肉四兩餓令一晝夜將二味和勻服之至盡以

鹽泥固濟煨一夜五更取出勿打破連泥埋入

土中三尺次日取出破開入銀石器內研末以

無灰酒入麝香少許作一服須靜候安排待蟲  
出速鉗入油鍋煎之後服局方嘉禾散一劑

●傳尸勞瘵

【十藥神書】赤雹兒俗名王瓜焙爲末每酒服一  
錢

【發明】時珍曰稽神錄云有人病瘵相傳死者數  
人取病者置棺中棄於江以絕害流至金山漁  
人引起開視乃一女子猶活取置魚舍每以鰾  
鱸食之遂愈因爲漁人之妻

【邵真人經驗方】猪腰子一對童子小便二盞無  
灰酒一盞新磁瓶盛之泥封炭火溫養自戌至  
子時止待五更初溫熟取開飲酒食腰子病篤  
者只一月效平日瘦怯者亦可用之蓋以血養  
血絕勝金石草木之藥也

●男婦勞瘵

【斗門方】青蒿細切水三升童子小便五升同煎  
取一升半去滓入器中煎成膏丸如梧子大每  
空心及臥時溫酒吞下二十九

●虛勞寒熱

【靈苑方】肢體倦疼不拘男婦八九月青蒿成實  
時採之去梗枝以童子小便浸三日晒乾爲末  
每服二錢烏梅一個煎湯服

●虛勞瘵疾

【便民方】烏鴉一隻絞死去毛腸入人參片花椒  
各五錢縫合水煮熟食以湯下鴉骨參椒焙研  
棗肉丸服

●虛勞口乾

【千金方】用羊脂一雞子大醇酒半升棗七枚漬

七日食立愈 外臺用羊脂雞子大納半斤酢  
中一宿絞汁含之

● 卒熱勞疾

【崔元亮海上方】皂莢續成一尺以土酥一大兩  
微塗緩炙酥盡搗篩蜜丸梧子大每日空腹飲  
下十五丸漸增至二十九重者不過兩劑愈

● 癆瘵失血

【吳球便民食療】田龜煮取肉和葱椒醬油煮食  
補陰降火治虛勞失血咯血欬嗽寒熱累用經  
驗

● 急勞煩熱

【聖惠方】體瘦三皂丸用皂莢皂莢樹皮皂莢刺  
各一斤同燒灰以水三斗淋汁再淋如此三五  
度煎之候少凝入麝香末一分以童子小便浸

蒸餅丸小豆大每空心溫水下七丸 又方急

勞疾悴日晚即寒熱驚悸煩渴用獾豬肝一具  
切絲生甘草末十五兩於鑊中布肝一重搗甘  
草一重以盡爲度取童便五升文武火煮乾爛  
衆手丸梧子大每空心米飲下二十九漸加至  
三十九

● 筋骨疼痛

【纂要奇方】用烏龜一個分作四脚每用一脚入  
天花粉枸杞子各一錢雄黃五分麝香五分槐  
花二錢水一碗煎服

【食療方】虎骨和通草煮汁空腹服半升覆臥少  
時汗出爲效切忌熱食損齒小兒不可與食恐  
齒不生

【本草方】鹿角燒存性爲末酒服一錢日二服

●心氣勞傷

【奇效方】朱雀湯治心氣勞傷因變諸疾用雄雀

一隻取肉炙赤小豆一合人參赤茯苓大棗肉

紫石英小麥各一兩紫苑遠智肉丹參各半兩

甘草炙二錢半細剉拌勻每服三錢用水一盞

煎六分去滓食遠溫服

●三黃丸

【圖經本草】孫思邈千金方云巴郡太守奏加減

三黃丸療男子五勞七傷消渴不生肌肉婦人

帶下手足寒熱瀉五臟火春三月黃芩四兩黃

連四兩大黃三兩夏三月黃芩六兩大黃一兩

黃連七兩秋三月黃芩六兩大黃三兩黃連三

兩冬三月黃芩三兩大黃五兩黃連二兩三物

隨時合搗下篩蜜丸烏豆大米飲每服五丸日

三不知增至七丸服一月病愈久服走及奔馬  
人用有驗禁食豬肉

●明目丹

【蘇沈良方】治勞瘵追蟲用兔屎四十九粒礮砂

如兔屎大四十九粒爲末生蜜丸梧子大月望

前以水浸甘草一夜五更初取汁送下七丸有

蟲下急鉗入油鍋內煎殺三日不再服

●河車丸

【永類鈴方】治婦人瘵疾勞嗽虛損骨蒸等症用

紫河車初生男子者一具以長流水中洗淨熟

煮擘細焙乾研山藥二兩人參一兩白茯苓半

兩爲末酒糊丸梧子大麝香養七日每服三五

十九溫服鹽湯下

### 鬱症門

●憂鬱不安

【集效方】胸膈不寬貝母去心薑汁炒研薑汁麵

糊丸每服七十九征士鎖甲湯煎下

●抑結不散

【本草方】用龜下甲酒炙五兩側柏葉炒一兩半

香附童便浸炒一兩為末米糊丸梧子大每空

心溫酒服一百丸

●心氣鬱結

【正要方】羊心一枚咱夫蘭即回回紅花浸水一

盃入鹽少許徐徐塗心上炙熟食之令人心安

多喜

●七情鬱結

【發明】時珍曰嚴用和濟生方治七情鬱結上氣

喘急用四磨湯者降中兼升瀉中帶補也其方

以人參烏藥沉香檳榔各磨濃汁七分合煎細

細嚥之

【朱氏集驗方】治虛寒小便頻數縮泉丸用烏藥

同益智仁等分為丸服者取其通陽明少陰經

也

### 結核門

●結核氣鬱

【孟詵食療】葶菜日乾為末油煎成膏摩之日三

五度便瘥

●痰核紅腫

【活人心統】寒熱狀如瘰癧石灰火煨為末以白

果肉同搗貼之蜜調亦可

●惡核腫結

【肘后方】小蒜吳茱萸等分搗傅即散

●梅核膈氣

【龔氏經驗方】取半青半黃梅子每個用鹽一兩

醃一日夜曬乾又浸又曬至水盡乃止用青錢

三個夾二梅麻線縛定速裝磁罐內封埋地下

百日取出每用一枚含之嚙汁入喉即消收一

年者治一人二年者治二人其妙絕倫

鼓脹門

●鼓脹煩渴

【衛生易簡方】身乾黑瘦馬鞭草細到曝乾勿見

火以酒或水同煮至味出去滓溫服以六月中

旬雷鳴時採者有效

●諸積鼓脹

【奇效方】食積氣積血積之類石菖蒲八兩到斑

蝥四兩去翅足同炒黃去斑蝥不用以布袋盛

拽去蝥末爲末醋糊丸梧子大每服三五十九

溫白湯下治腫脹尤妙或入香附末二錢

●鼓脹便閉

【普濟方】大小便閉鼓脹氣促八角茴香七個火

麻仁半兩爲末生葱白三七根同研煎湯調五

苓散末服之日一服

●中滿鼓脹

【余居士選奇方】用三五年陳葫蘆瓢一個以糯

米一斗作酒待熟以瓢於炭火上炙熟入酒浸

之如此三五次將瓢燒存性研末每服三錢酒



下神效

●十種蠱氣

【瑞竹堂方】苦丁香爲末棗肉和丸梧子大每服

三十九棗湯下甚效

●水氣蠱脹

【潔古活法機要】楮實子丸以潔淨釜用楮實子

一斗水二斗熬成膏茯苓三兩白丁香一兩半

爲末以膏和丸梧子大從少至多至小便清利

脹減爲度後服治中湯養之忌甘苦峻補及發

動之物

●蝦蟆蠱病

【聖惠方】及蝌蚪蠱心腹脹滿痛口乾思水不能

食悶亂大喘用車轄脂半斤漸漸服之其蠱即

出

●蛇涎蠱瘕

【氣味注】思邈曰江南山間人一種蠱毒以蛇涎

合藥着飲食中使人病瘕積年乃死但以雄黃

蜈蚣之藥治之乃佳

●癥癖蠱病

【千金翼方】三稜煎用三稜根切一石水五石煮

三石去滓更煎取三斗汁入鍋中重湯煎如稠

糖密器收之每旦酒服一七日二服 又方烏

牛屎一升微火煎如稠飴空心服棗許當鳴轉

病出隔日更服之

●腹大如鼓

【發明】時珍曰諸腹大如鼓體寒者以鷓鴣燒存

性爲末米飲服之即愈切謂諸腹鼓大皆屬于

熱衛氣並循于血脈則體寒此乃水鳥其氣寒

冷而利水寒能勝熱利水能去濕故也

【發明】時珍曰集驗方云魏秀才妻病腹大如鼓四肢骨立不能貼席惟衣被懸臥穀食不下者數日矣忽思鶉食如法進之遂暈劇少頃雨汗莫能言但有更衣狀扶如圍小便突出白液凝如鵝脂如此數次下盡遂起此蓋中焦濕熱積久所致也

●雞矢醴

【普濟方】治鼓脹且食不能暮食由脾虛不能制水水反勝土水穀不運氣不宜流故令中滿其脈沉實滑宜雞矢醴主之何大英云諸腹脹大皆屬於熱精氣不得滲入膀胱別走于腑溢于皮裏膜外故成脹滿小便短澀雞矢性寒利小便誠萬金不傳之寶也用臘月乾雞矢白半

斤袋盛以酒醅一斗漬七日溫服三杯日三或爲末服二錢亦可 宜明用雞矢桃仁大黃各一錢水煎服 正傳用雞矢炒研沸湯淋汁調木香檳榔末二錢服 一方用雞矢川芎藭等分爲末酒糊丸服

●牽牛酒

【積善堂經驗方】治一切肚腹四肢腫脹不拘鼓脹氣脹濕脹水脹等有峨嵋山一僧用此治人得效其人牽牛來謝故名用乾雞矢一升炒黃以酒醅三椀煮一椀濾汁飲之少頃腹中氣大轉動利下即自脚下皮皺消也未盡隔日再作仍以田蠶二枚滾酒淪食後用白粥調理

古今名醫驗方類編卷七終

Faint vertical text columns in the upper section of the page, likely containing medical prescriptions or case studies.

Faint vertical text columns in the lower section of the page, continuing the medical content from the upper section.